

# Asun Wankláán Ání

## Luka

### Lówanlín

**1** <sup>1</sup>Onumnyampu Tiofilo:  
Ahá tsɔtsɔtsɔ babó mbódí wanlín tsá ɔleba anɔtsɔ tswɪ. <sup>2</sup>Bɔwanlín tsá ahá ámúú bubu unu tsú mú nfiásí, bɔgyi mú asúmpú amu bowun, dá mú ɔkan amu bebláa anɪ pépéépé. <sup>3</sup>Onumnyampu Tiofilo, mí é nabó mbódí kwí mótɔ wankláán tsú mú nfiásí. Mú su ndekléá nɔwanlín mú pépéépé há fú, <sup>4</sup>méni fébiá ató ámúú basúná fú ámu igyi ɔnɔkwali.

#### Asú Ɖɔpú Yohane Kwí Asún

<sup>5</sup>Bréá \*Herode dé iwíe gyí Yudea ɔmátɔ á, Bulu igyi ɔhapú ɔku létsiá, butetí mu Sakaria. Otsú Bulu igyi ahapú ɔpasua kvá butetí mú Abiatɔ. Mu ka gyí Elisabet, otsú Bulu igyi ɔhapú \*Aaron abí-anátɔ. <sup>6</sup>Mua mu ka asún da ɔkpa Bulu ansítɔ. Butegyi anɪ Wíe Bulu mbla pú mu nhúé féésú pépéépé. <sup>7</sup>Buma obí, tsúfé Elisabet mégyi ɔtsɪ kwíípú. Mua mu kulu féé bahíé dan.

<sup>8</sup>Èke ɔku ɔlɔtu Sakaria aná ɔpasua ání amú ɔbéha Bulu igyi. Sakaria lóyɔ ɔbu Bulu ansítɔ ɔde mu agyúamá yɔ. <sup>9</sup>Abi butɔtsɔwɪ pulé ɔhá ání obébitíwíe Ɖwankíkpa unu yɔwa ɔhíén ogyá, igyi ahapú ámu amándíé ɔnɔ. Bɔtsɔwɪ a, ileyi Sakariasu. <sup>10</sup>Bréá ɔde ɔhíén ámu ogyá wa á, ɔɔm ání ɔyɔ ɔtswékpa unu féé bulú kpankpa bude mpái bɔ.

<sup>11</sup>\*Bulu-ɔbɔpu ɔku lébelí \*afɔdɛ-asubwi ámu gyɔpɪsu, lé ɔwan súná Sakaria. <sup>12</sup>Bréá olowun Bulu-ɔbɔpu amu a, ɔɔwan, ifú lowie mu ayetɔ. <sup>13</sup>Unu Bulu-ɔbɔpu amu lébláa mu



29 Asón ánfu lèha Maria légyigyáa, ɔlefíté mu iwɪ ɔbéé, “Ngya nto itsiá odu ɔhá ánfu lahá mí alí?” 30 Bulu-ɔbɔpu amu lébláa mu ɔbéé, “Maria, mánya ifú. Bulu lahié yúlá fú! 31 Kɪ, fénya ɔmé kwíí obi yinhé. Dinka mu dá ‘Yesu.’ 32 ɔbɔbwe ɔha yilé. Bétu mu ɔsúsúsú Bulu mu Bi. Anɪ Wíe Bulu ɔbéyaí mu mu nain Owíe Dawid obiású. 33 Obégyi iwíe \*Yakob<sup>a</sup> wóyísú bré féétó. Mu iwíegyí mɔ́mɔ ɔnó ekekekeke.”

34 Maria léfíté Bulu-ɔbɔpu amu ɔbéé, “Nkálɪ ɪbɔbwe asa ɪnɪ ɪbéba mótó, tsúfé mmeyín oyin.”

35 Bulu-ɔbɔpu amu léle mú ɔnó ɔbéé, “ɔɣe Wankíhé ɔbéba fusu. ɔsúsúsú Bulu ámu túmi bóbusu fusu. ɪnɪ su ahá bétu Obi wankíhé amúb fɔkwíí ámu beé, ‘Bulu mu Bi.’ 36 Kɪ, fú obusuanyin Elisabet kóráá ɔbá bɔkwíí obi yinhé mu tsidhen anfito. Ahá beé, megýí ɔtsɪ kwíípu ogyi, táme mu ɔmé lahɔ tsra asie dodo. 37 Tsúfé tɔtɔ mɔdón Bulu bwe!”

38 ɪnu Maria lébláa Bulu-ɔbɔpu amu ɔbéé, “Bulu osúmbi ngyi. ɪbá mótó ha mu fé alá fablí.” ɪnu á, Bulu-ɔbɔpu amu lénatí sí mu.

### Maria Léyesunáa Elisabet

39 Nke ámutɔ á, Maria lɔkulá ató, wa ɔsa yó Yudea abusu wúlu kutɔ. 40 Múbú olowie Sakaria wóyító há Elisabet itsiá. 41 Elisabet lénya nú itsiá ámu alí kebi ámu lékan iwɪ mu iwɪtɔ, \*ɔɣe Wankíhé ɔbulá mutɔ. 42 ɪnu ɔɔkplón blí ɔbéé, “Bulu layúlá fú atsi féétó. Alayúlá fú iwɪtɔ obí ámu é. 43 Iyé! Mí Wíe mu yin onutó lába mí wá á? Ntogyi sú Bulu lawá mí numnyam anfi odu? 44 Kɪ, nenyánú fú itsiá ámu alí obí amúb ɔbu mí iwɪtɔ ámu lékan iwɪ ansigyísú. 45 Bulu layúlá fú, tsúfé fahogyi ání tɔá alahíé há fú ɪbéba mótó.”

### Maria Bulu Kanfó ɪlu

46 ɪnu Maria lɔwa ɪlu ɔbéé,

“Mí ɔkláa dé mí Wíe Bulu kanfó.

47 Mí Nkpa ɔhɔpu Bulu lahá ansí de mí gyi.

<sup>a</sup> 1:33 Israelfɔ gyí Yakob abí-aná.

- 48 Tsúfé alakáín mí mu osúmbi ání ɔma tɔtɔ  
bwetósó, wun mi nwe.  
Tsú séi púya a, abí-aná fée béblí bæ, Bulu layúlá  
mí.
- 49 Bulu Otúmípu amu labwé ató kpɔnkpɔnti há mí.  
ɔɔwankí.
- 50 Otowun ulín kugyíkɔtɔ  
ahá ání butenyá mu ifú nwe.
- 51 Alapú mu túmi bwé ató akpɔnkpɔnti,  
púdá iwɪ atsupú nwuntɔ asún sáín.
- 52 Alakplí awíe mbíású,  
tsú ahá ání buma tɔtɔ bwetó fúá.
- 53 Alahá ahiánfɔ bamlí iwɪ anyapú,  
há iwɪ anyapú banátí ibikpan.
- 54-55 Alakpá mu asúmpú Israelfɔ.  
ɔmetan ání ɔleblí ɔbéɛ, mówun anɪ anáin  
\*Abraham  
mva mu abí-aná nwe bré fée,  
fé alá ɔlebláa amú.”

Alɪ Maria lómɔ mu ulɔ ámu ɔnɔ ní. <sup>56</sup>Oletsíá Elisabet wá  
fé tsra asa asa oleyinkí yó wóyí.

### Asú ɔbɔpú Yohane Kwí

<sup>57</sup>Bréá Elisabet lóɔkwí á, ɔɔkwí obi yinhé. <sup>58</sup>Mu  
abusuanfɔ pú mu aba bonu ání anɪ Wíe Bulu lahté wun mu  
nwe. Mú su ansí légyi amú fée.

<sup>59</sup>Obí ámu lénya ndawótswí á, mu iwɪsu ahá beba mu  
obuto ɔlekpá, abutin mu \*keté, dɪnka mu dá. Tekɪ bæ abɔpu  
mu si dá Sakaria dɪnka mu, <sup>60</sup>táme mu yin lébláa amú ɔbéɛ,  
“Ó-o! Mlɪdɪnka mu Yohane.”

<sup>61</sup>Ahá ámu bebláa mu bæɛ, “Anumókúnú abuti fú  
obusuanyin ɔkuku alɪ kɪ.” <sup>62</sup>ɪnu ɔɔbwe mu si ibi, fíté mu  
alá butú kebi ámu.

<sup>63</sup>Sakaria lóɔbwe ibi ɔbéɛ butsíu tɔku ha mu amowanlɪn  
mú dɪnka mósú, ɔɔwanlín ɔbéɛ, “Mu dá gyí ‘Yohane.’”  
Ilofwie amú féeftɔ. <sup>64</sup>ɪnusu mu ɔdandu lesankí, ɔɔtɔɔ kánfú

Bulu. <sup>65</sup>Ifú lekítá apíó aba ámu féé. Alí asún ánfí lekíléí wá Yudea abusú awúlu amu féétó. <sup>66</sup>Ḑhagyícha ání olonu asún ánfí léfíté mu iwí ɔbéé, “Ntɔ obí kebi ánfí ɔbɔ́bwe ekekó?” Tsúfé ulwankí amó ání Bulu ibí dín musu.

### Sakaria Bulu Kanfó Ulo

<sup>67</sup>Ḑnu á, Ḑje Wankíhé lɔbulá Sakariatɔ, ɔlɔwa asún ání Bulu lapóhá mu blí bí.

<sup>68</sup>Ḑbéé,

“Mliha akanfu aní Wíe Israel Bulu.

Tsúfé alabele mu ahá, há anulagyi iwí.

<sup>69</sup>Alalé Ḑhópu Ḑwɔnlínú ɔku

tsú mu osúmpú Owíe Dawid abusuantɔ há aní.

<sup>70</sup>(Fé alíá ɔleblí tsun mu ɔnɔ́sú atɔ́pú wankíhé amusu tswi dodoodo.)

<sup>71</sup>Ḑbéé, méle aní tsú aní alupú

pú ahá ání butamafia aní ibitɔ.

<sup>72-73</sup>Ḑbéé, mówun aní anáin nwe.

Ḑméetan mu ntam wankíhé amúú ɔleka há aní náin Abraham amusu.

<sup>74</sup>Ḑbéé, méle aní tsú aní alupú ibitɔ,

méni abétalí súm mu, aníméenya adún ifú.

<sup>75</sup>Ḑbéha abɔ́bwe mu ahá,

bwé yilé mu ansísú aní nkpatɔ féé.

<sup>76</sup>Mí bí, fú mú á, ahá bétí fú beé, ‘Ḑsúsúúsú Bulu ámu ɔnɔ́sú ɔtɔ́pú.’

Tsúfé fégya aní Wíe nkpa,

lá ɔkpa há mu.

<sup>77</sup>Fébláa mu ahá féé, Bulu ɔbétalí hɔ amú nkpa

tsun lakpansikíésú.

<sup>78</sup>Aní Wíe Bulu nwewúun su

Kristo amu ɔbédalí fé owí tsú ɔsúsú ba aní wá.

<sup>79</sup>Ḑbɔ́wankí wúlí ahá amúú butsie oklúntɔ pú lowu ɔkpasu ámu féésú.

Ḑbékpa aní tsun iwilwii ɔkpasu.”

Ínu Sakaria lópumó mu asún ɔ́nó ní. <sup>80</sup>Kebi ámu lédan, nya Ɖhétó ɔwunlín. Oletsíá \*dimbísú alu yófun ekeá ɔlele ɪwɪ ɔwan súná Israelfo.

### Yesu Kristo Kwí

(Mateo 1:18-25)

**2** <sup>1</sup>Alí bré ámutɔ á, Roma owíe dehen Augusto lówa mbla ɔ́bée, bukíáa ahá ání bubu Romafɔ así féeé, abɔwanlun amú adá. <sup>2</sup>Múgyí ahákla gyankpapu ni. Alí bré ámutɔ á, oyin ɔ́kúá butetí mu Kirenio dé Siria ɔ́má sú gyí. <sup>3</sup>Ínu su ɔ́hagyíɔ́ha lóyɔ dá ɔwanlínkpá mu onutó wúlutɔ.

<sup>4</sup>\*Yosef é lókusú tsú Nasaret wúlu ání ɪbu Galilea ɔ́mátó dú yó Yudea ɔ́mátó, Owíe \*Dawid wúlutɔ Betlehem. Tsúfé Owíe Dawid mu na ógyi. <sup>5</sup>Mba \*Maria amúú bapúhá mu beɛ otsíá, ɔ́na odwinsu ámu nyɔ lóyɔ dá ámu ɔwanlínkpá. <sup>6</sup>Bréá bubu Betlehem unu á, ikwí lɛkan Maria, <sup>7</sup>ɔ́lɔkwí mu bití, ogyi oyin. Ɖlɛkíkíú mu wá tatidatɔ, pú mu tswi mbwɪ atogyihe dákatɔ, tsúfé bumenya otsiákpá afɔ́ ɔswíkpá.

### Akúfa Akpapú Pú Bulu-abɔpu

<sup>8</sup>Alí bré ámutɔ á, akúfa akpapú aku bubu unu fún dimbító, buɛ amú akúfa ɪwɪ gyo onyé. <sup>9</sup>\*Bulu-ɔ́bɔpu léle ɪwɪ ɔwan súná amú, Bulu numnyam lówankí wólí amú sú. Mú su ifú lehie kítá amú. <sup>10</sup>Ínu á, Bulu-ɔ́bɔpu amu lébláa amú ɔ́bée, “Mlumánya ifú! Mlíki, napú \*asun wankláán ání ɪbówa mli ɔ́yító ahá féeé ansigyí ba mli. <sup>11</sup>Nde bakwí nkpa Ɖhópu, anu Wíe \*Kristo, (ɔ́há amúú Bulu ladá mu ofúli amu) há mli Owíe Dawid wúlutɔ! <sup>12</sup>Tóá mlópubí mu gyí, mlówun kebi bɔ́bwe ɔ́kúá bapú tatida kíklí mu ɪwɪ, ɔ́da mbwɪ atogyihe dákatɔ.”

<sup>13</sup>Ɖtsáwule pé á, \*Bulu-abɔpu tsɔ́tsɔ́wtsɔ́ beba betsiá Bulu-ɔ́bɔpu amutɔ, buɛ Bulu kanfú beɛ,

<sup>14</sup>“Mliha apu numnyam ha Buluá ɔ́bu ɔ́súsúúsú! ɪwɪ ilwii ahá ání Bulu ansí tegyi amú ɪwɪ ɔ́sulósu.”



*Maria lékiklí Yesu wá tatidatɔ, pú mu tswi  
mbwi atogyihe dákatɔ. (Luka 2:7)*

15Bréá Bulu-abɔɔɔ amu beyinkí yɔ ɔsúsú á, akúfa akpapú ámu bebláa aba bæ, “Mliha ayɔ Betlehem, ayekú utɔ ánfú ulaba, Bulu lalé súná aní ánfú.”

16Íni su bɔwa ɔsa yɔ. Lélé á, bowun Maria mua Yosef pú kebi bɔbwe amu, ɔda mbwi atogyihe dákatɔ. 17Bréá bowun kebi ámu a, bele mu iwí asún ámuú bonu ámu blí. 18Akúfa akpapú asún ánfú lówa ahá aní bonu mú féé wánwan. 19Táme Maria mú lékutá asún ámu féé wá nwuntɔ, tsíá gywún mú iwí. 20Bréá akúfa akpapú ámu beyinkí bɔyɔ

á, buna buɗe Bulu adábi da, kánfú mu, asún ámúú bonu pú utó ámúú bayówun fé alí ámúú Bulu-ɔɓɔpu amu lébláa amú ámu su.

### Yesu Iɗá Dínká

<sup>21</sup>Kebi ámu obuto ɔleké á, betun mu \*keté, dínká mu dá Yesu. Iɗá ánfí Bulu-ɔɓɔpu amu léha mu asa mu yin lénya mu ɔmé ní.

### Yesu Puya Bulu Ɔtswékpa

<sup>22</sup>Bréá mu akwípu bógyuráa iwi Mose Mbla ɔnó lofun a, ɓɔpu mu dú yó Yerusalem, pú mu yópu wá Bulu ibutu. <sup>23</sup>(Tsúfé ɓowanlín wá Mose Mbla ámutɔ beɛ, “Ilehián ání Israelfɔ bópu amú bití okugyíɔku há Bulu.”) <sup>24</sup>Mú su ɓoyóɓo afɔɗie ámu Mbla ámu ɔnó. Abróɗuma anyɔ ntéɛ aklobi anyɔ ɓɔpuɓ alí afɔɗie ánfí há Bulu.

<sup>25</sup>Alí bré ámutɔ á, oyin dehen ɔku bu Yerusalem, butetí mu Simeon. Yilé ɔbwepú ógyi, otenyá Bulu ifú. \*Ɔɗe Wankíhé bu musu, otsie ogyo bréá Bulu ɔbópu Ɔlepú ba mu ahá Israelfɔ. <sup>26</sup>Ɔɗe Wankíhé amu léle súná mu ání omóowu, yófun bréá alawun Kristo, (ɔhá ámúú Bulu ladá mu ofúli amu) asa. <sup>27</sup>Ɔɗe Wankíhé amu léha Simeon lóyo \*Bulu ɔtswékpa wunsínésú. Alí bré ámutɔ á, Yesu akwípu baba mu amándíé ánfí ɔbwekpa fé alíá Mose Mbla ámu léblí.

<sup>28</sup>ɒnu Simeon lóho kebi ɔɓwe amu, ɔlekanfú Bulu ɔbéɛ,

<sup>29</sup>“Mí Wíé! Asún ámúú feblí tswi amu ilaba mútú.

Séi mú á, mí fú osúmbi anfi nétalí wú iwilwiiti  
ngya.

<sup>30</sup>Tsúfé mí onutó napú mí ansíbi wun Ɔlepú ámu.

<sup>31</sup>Fú onutó falá mu bwé ahá féé ansítú.

<sup>32</sup>Wanki ogyi, ɔbéle fú súná ahá ání bumegyí  
Israelfɔ,

pú numnyam ba fú ahá Israelfɔ.”

<sup>33</sup>Asún ánfí Simeon léblí tsú kebi ɔɓwe anfi iwi leha ɔnó lobwie mu akwípu. <sup>34</sup>Simeon lóyulá amú, ɔlebláa obí mu yin Maria ɔbéɛ, “ɒna kebi ánfí su Israelfɔ ɔfan bédida,



ɔfan é bélií. Osúna ogyi tsú Bulusu, ahá bókusú líí musu. <sup>35</sup>Íni su Bulu ɔbéha ahá tsɔtsɔɔtsɔ klunsu asún bélin ɔwan. Fú é á, awireho béhie kítá fú klun. Ibóho fu ɔsun fé ɔdayí ɔya anyɔ bakpié yi fu.”

<sup>36</sup>Ɖtsi dehen ɔkúá ogyi \*Bulu ɔnósú ɔtɔ́pú é bu unv. Mu dá gyí Hana. Mu si gyí Fanuel, otsú Asa abusuantɔ. Ɖtsi dehen anfi mu mu kulu betsiá aba nfinsienó, mu kulu lówu. <sup>37</sup>Olosu usura alu bɔfun bréá ɔlɔho nfi adukwe-na (84). Ɖlɔpu Bulu ɔtswékpa wunsunésú unv mlí mu ɔdikpa, ɔde Bulu súm, \*klí ɔnó, bó mpái ɔpa múa onyé. <sup>38</sup>Mu é ɔledali ba bekanfú Bulu, blí kebi bɔbwe amu iwí asún súná ahá ámúú buɔde Yerusalemfo iwígyí ɔkpa kí amu.

### Yesu Yinkía Ya Nasaret Wúluto

<sup>39</sup>Bréá Yesu akwíúpu bɔbwe amándié ámu tá Bulu mbla ámu ɔnó á, beyinkí kplí yó amú wúluto Nasaret, Galilea ɔsulósu. <sup>40</sup>Kebi ámu lédan, nyá ɔwunlín, nyá nyánsa, Bulu é lóyulá mu.

### Yesu Bu Bulu Ɖtswékpa

<sup>41</sup>Yesu akwíúpu butetsiá yó Yerusalem yégyi Israelfɔsu \*Katsun Nke ofífiyíofi. <sup>42</sup>Bréá Yesu lóho nfi dúanyɔ á, mu amúnyɔ bɔyɔ nke ámu ogyíkpa fé alá butɔyó yái. <sup>43</sup>Bréá begyi nke ámu tá beyinkí á, Yesu akwíúpu bumebi ání alasin unv. <sup>44</sup>Buki bee mu mu abanyɔ ná. Mú su benatí ekewóle owító asa bowa mu dunká apíó abato bi. <sup>45</sup>Bréá bodunká mu kásián á, beyinkí yó Yerusalem, yódunká mu. <sup>46</sup>Eke sáási a, boyówotií musu Bulu ɔtswékpa wunsunésú unv. Otsie Mose \*mbla asunápú wá, ɔde asu yáa amú asúntó, ɔde amú asún fité. <sup>47</sup>Ɖnó lobwie ahá ání bubu unv féé, tsú alá ɔde asún ámu así nu pú alá ɔde mú ɔnó le. <sup>48</sup>Ɖnó lobwie mu akwíúpu bréá bowun mu. Mu yin léfité mu ɔbéé, “Mí bí, ntogyi su fabwé aní alí? Mía fú sínyɔ ansí lapé anidé fú dunká.”

<sup>49</sup>Unv Yesu léfité amú ɔbéé, “Ntogyi su mlidé mí dunká? Ilehíán ání mlébi ání mí Sí wóyító nétsiá.” <sup>50</sup>Táme mu akwíúpu bumonu asún ání ɔde amú bláa así.

<sup>51</sup>Mva amúnyo beyinkí yó Nasaret, oḗba iwiasí há amú. Maria lékitá asún ámu fée wá kpawunuto, tsíá gywiún mú iwí. <sup>52</sup>Yesu lédan, wa owunlín, nyá nyánsa, Bulu móa anyánpósa fée ansí legyi mu iwí.

**Asú Ɔbɔpú Yohane Bulu Asún Ɔkanda**  
(Mateo 3:1-12; Marko 1:1-8; Yohane 1:19-28)

Luk

**3** <sup>1-2</sup>Roma owíe dehen Tiberio iwíegyí ofí dúanusito á, Bulu lébláa mu igyí ɔhapú Sakaria mu bi Yohane \*dimbísú ɔbée, ɔdáa mu asún ɔkan. (Alí bré ámutɔ á, Pontio Pilato dé Yudea ɔmású gyí. \*Herode dé Galilea ɔmású gyí. Herode mu dehen Filipino é dé Iturea pú Trakoniti ɔmású gyí, Lisania é dé Abilene ɔmású gyí. Bulu igyí ahapú dehen ání bubu unu alí bré ámutɔ é gyí Hana mva Kaiafa.) <sup>3</sup>Mú su Yohane léki Yordan bunkpa ɔnó, ɔde ɔkan da blí ɔbée, “Mludamli kluntɔ, amlisi lakpan bwe. Bulu osikie mli, ambo mli \*asú.”

<sup>4</sup>\*Bulu ɔnósú ɔtɔpú \*Yesaia lówanlín Yohane iwí asún wá mu ɔwulútɔ ɔbée,

“Ɔku dékplɔn dimbísú ɔbée,

‘Mlila aní Wíe ɔkpa.

Mlitswii ikpa ha mu!

<sup>5</sup>Mliti bunkpa kugyíku,

amlibwiebwie abu móa nkúku fée.

Mlitswíi ikpa,

amlila mósú wankláán.

<sup>6</sup>Ahá fée bówun Bulu nkpahó.’ ”

<sup>7</sup>Ɔɔm beba Yohane wá beɛ, ɔbó amú asú. Ɔlefíté amu ɔbée, “Abe abí-aná, ntɔ gyá mli, mlisrí Bulu usubití ámú ibá ámu? <sup>8</sup>Múmú mliswie abí oduá ibósuná ání lélé mliladámli kluntɔ. Mlumáki mlíaa, mli náin gyí \*Abraham. Nde mli bláa mbée, Bulu ɔbétalí há abwi ánfu ibédamli Abraham abí-aná. <sup>9</sup>Séi á, Bulu lapú efé yi nyí-atsitsitɔ. Oyígyíoyí ání imoswie abi wankláán á, bókun mú dá, wá mú fée ogyá.”

<sup>10</sup>Ɔɔm amu befité Yohane beɛ, “Ntɔ mɛɛ abwée?”

<sup>11</sup>Yohane lébláa amú ɔbée, “Fúá fubu atadiɛ anyo á, pu kule ha ɔhá ání ɔma kuku. Fúá fubu atogyihe é bwe mú alí.”

12\*Lampóo ahópu aku é beba asú ɔ̀ɔ̀kpá. Befité Yohane beɛ, “Osunápu, ntu ilehián ání abɔ̀bwe?”

13Yohane lébláa amú ɔ̀bée, “Mlumátswi dinká ahá. Mliho tɔ́a beɛ mliho.”

14Isá akɔ̀pu aku é befité Yohane beɛ, “Ani é mé, ntu abwée?”

Yohane lébláa amú ɔ̀bée, “Mlumápu ɔ̀wɔ̀nlín swíi ɔ̀haa kɔ̀ba, ntée wá afunu dínká ɔ̀haasu. Mli akatua igyí mli ansí.”

15Íniá amú ansí dín Kristo amusu, buɛ mu ɔ̀kpa kí su á, umɔ̀wánkí amú ní Yohane gyí Kristo amu. 16Mú su Yohane lébláa amú ɔ̀bée, “Ɖkúá ɔ̀ɔ̀ɔ̀n mi bu ɔ̀ma ɔ̀bá. Mmɔ̀fun ání nésankí mu ntukuta ɔ̀fé kúráá. Mí mú á, ntsu ndepubɔ́ mli asú. Mu ɔ̀bɔ̀pu \*Ɖɛ Wankíhé pú ogyá bɔ́ mli asú ní. 17Ɖɛ mu lín, ɔ̀bɔ̀pufúni ntéte lé ayó ámuɔ̀. Ɖbékpa ayó ámu wá mu odudutɔ̀. Táme ɔ̀béfí ofuníkpa unu wankláán, kpá ntéte amu wá ogyá ání itamaduntɔ̀.” 18Yohane léda asun wankláán ámu ɔ̀kan, bláa ahá ámu asún tsɔ̀tsɔ̀tsɔ̀ ɔ̀bée, budámli kluntɔ̀.

19Isu ogyípu \*Herode laswí mu dehen Filipino mu ka Herodia tsía, trá bwe lalahe tsɔ̀tsɔ̀tsɔ̀ tsía mútɔ́. Mú su Yohane lékiná há mu. 20Múá idun kúráá gyí, Herode léha bektá Yohane wá obu.

### Yesu Asúɔ̀

(Mateo 3:13-17; Marko 1:9-11)

21Bréa Yohane dé ahá ámu asú ɔ̀ á, Yesu é léba, Yohane lɔ̀ɔ̀ mu asú. Bréa Yesu dé mpáti ɔ̀ á, nwulútáa lefinkí, 22Ɖɛ Wankíhé lédamlí fé abróduma, kplí bogyonká musu. Ɖme ku lotsu ɔ̀sɔ̀sɔ̀ ɔ̀bée, “Fúgyí mí bíá ntɔ̀dwé, mi ansí tɛhíé gyi fú twi ní.”

### Yesu Anáin Uíntɔ̀

(Mateo 1:1-17)

23Bréa Yesu lɔ̀ho fé ní advasa á, olefi Bulu asún ɔ̀kanda asu. Ahá mú buyin ání \*Yosef mu bi ní. Yosef mu si gyí Eli. 24Eli mu si gyí Martat. Martat mu si gyí Lewi. Lewi mu

si gyí Melki. Melki mu si gyí Yanai. Yanai mu si gyí Yosef. <sup>25</sup>Yosef mu si gyí Martatia. Martatia mu si gyí Amos. Amos mu si gyí Nahum. Nahum mu si gyí Hesli. Hesli mu si gyí Nagai. <sup>26</sup>Nagai mu si gyí Mahat. Mahat mu si gyí Martatia. Martatia mu si gyí Semein. Semein mu si gyí Yosek. Yosek mu si gyí Yoda. <sup>27</sup>Yoda mu si gyí Yohanan. Yohanan mu si gyí Resa. Resa mu si gyí Serubabel. Serubabel mu si gyí Sealtiel. Sealtiel mu si gyí Neri. <sup>28</sup>Neri mu si gyí Melki. Melki mu si gyí Adi. Adi mu si gyí Kosam. Kosam mu si gyí Elmadam. Elmadam mu si gyí Er. <sup>29</sup>Er mu si gyí Yosua. Yosua mu si gyí Elieser. Elieser mu si gyí Yorim. Yorim mu si gyí Martat. Martat mu si gyí Lewi. <sup>30</sup>Lewi mu si gyí Simeon. Simeon mu si gyí Yuda. Yuda mu si gyí Yosef. Yosef mu si gyí Yonam. Yonam mu si gyí Eliakim. <sup>31</sup>Eliakim mu si gyí Melea. Melea mu si gyí Mena. Mena mu si gyí Martata. Martata mu si gyí Natan. Natan mu si gyí Owíe \*Dawid. <sup>32</sup>Owíe Dawid mu si gyí Yisai. Yisai mu si gyí Obed. Obed mu si gyí Boas. Boas mu si gyí Salmon. Salmon mu si gyí Nahson. <sup>33</sup>Nahson mu si gyí Aminadab. Aminadab mu si gyí Admin. Admin mu si gyí Arni. Arni mu si gyí Hesron. Hesron mu si gyí Peres. Peres mu si gyí Yuda. <sup>34</sup>Yuda mu si gyí Yakob. Yakob mu si gyí Isak. Isak mu si gyí Abraham. Abraham mu si gyí Tera. Tera mu si gyí Nahor. <sup>35</sup>Nahor mu si gyí Serug. Serug mu si gyí Reu. Reu mu si gyí Peleg. Peleg mu si gyí Eber. Eber mu si gyí Sala. <sup>36</sup>Sala mu si gyí Kainan. Kainan mu si gyí Arfaksad. Arfaksad mu si gyí Sem. Sem mu si gyí \*Noa, Noa é mu si gyí Lamek. <sup>37</sup>Lamek mu si gyí Metusela. Metusela mu si gyí Enok. Enok mu si gyí Yared. Yared mu si gyí Mehalaleel. Mehalaleel mu si gyí Kenan. <sup>38</sup>Kenan mu si gyí Enos. Enos mu si gyí Set. Set mu si gyí \*Adam. Adam é mu si gyí Bulu.

### Yesu Isóki

(Mateo 4:1-11; Marko 1:12-13)

**4** <sup>1</sup>Bréá Yesu léyinkí tsú Yordan ntsu ɔnó á, Ɖɔɛ Wankíhé lɔbulá mutɔ, ilekpa mu ya \*dimbísú. <sup>2</sup>Bréá ɔbu unu á,

Ɖbunsám létsiá ɔɔɔ mu ki nke advana kéké. Yesu mégyíi ɔɔɔ nke ámuɔ fée. Mú su bréá nke ámu ulɔɔ ɔɔ á, akún híe de mu.

<sup>3</sup>Ɔbunsám lébláa mu ɔbée, “Ní Bulu mu Bi fugyi á, múmú ha ibwi ánfí idamli bodobodo.”

<sup>4</sup>Yesu léle mú ɔɔ ɔbée, “Bɔwanlín wá Bulu asún ámuɔ bée, ‘Megyi atogyihe wule nyankpusa ogyíi tsia nkpa.’ ”

<sup>5</sup>Ɖbunsám lópu mu ya ibu fúáhé kusu. Olosuná mu ɔyító iwíe ogyíkpa fée ɔtsáwule pé. <sup>6</sup>Mú ɔlebláa mu ɔbée, “Nópu ɔmá ánfí fée túmi pú amú numnyam há fú, tsúfé mí ibiɔ bapúwá. Ɖhá ání ndeklé a, mu nópuhá. <sup>7</sup>Mú su ní fosúm mí á, nópu mú fée há fú.”

<sup>8</sup>Yesu lébláa mu ɔbée, “Bɔwanlín wá Bulu asún ámuɔ bée, ‘Da akpawunu ha fú Wíe Bulu. Mu nkule fu súm.’ ”

<sup>9</sup>Ɖbunsám lékpa mu ya Yerusalem, ɔɔpu mu yélí \*Bulu ɔtswékpa obu ámu ɔántra. Ɔbun ɔlebláa Yesu ɔbée, “Ní Bulu mu Bi fúgyi lélé á, tu kpai. <sup>10</sup>Tsúfé bɔwanlín wá Bulu asún ámuɔ bée, ‘Bulu ɔbéha mu abɔpu béki fusu. <sup>11</sup>Békpatá fú ibiɔ, méni fú yabi méeda ibwi kukusu.’ ”

<sup>12</sup>Yesu léle mú ɔɔ ɔbée, “Betrá wanlín bée, ‘Mákapú fú Wíe Bulu ki.’ ”

<sup>13</sup>Bréá Ɖbunsám lómɔ isóki anfi fée ɔɔ á, ɔɔku náti sí mu asa.

### Yesu Gyumagyihe Asitsuá Galilea Ɖmátó

*(Mateo 4:12-17; Marko 1:14-15)*

<sup>14</sup>Ɖɔe Wankíhé túmi lékpa Yesu, oleyinkí yó Galilea ɔmátó. Mu wei asún leklei wa ɔmá ámu féétó. <sup>15</sup>Oletsíá súná ató Yudafo \*ofiákpa, ahá ámu fée bekanfó mu.

### Bumɔho Yesu Mu Wúluto

*(Mateo 13:53-58; Marko 6:1-6)*

<sup>16</sup>Ɔbun Yesu léyinkí bá Nasaret, ɔtínéá oletsíá dan. Fé alíá otetsíá bwé á, ɔɔɔ Yudafo ofiákpa \*ɔkpúnú ɔdaké. Bréá ɔɔkusú yélí amú ansító ɔbékla Bulu asún á, <sup>17</sup>botsu Bulu ɔɔsú ɔɔpú \*Yesaia ɔwulú há mu. Ɖlesankí mú á, olowun ɔtinekvá bɔwanlín wá bée,

18 “Ani Wíe Bulu ladá mí ofúli.

Íni su mu ɔ́ǵé bu misu.

Alalé mí ɔ́bée, ndáa \*asun wankláán ámu ɔ́kan  
suna ahá ání buma tɔ́tɔ́.

ɔ́bée, mbébláa nkpábi mbée, masí amú iwí há  
amó.

Mí ambia ansibi abwiepú mbée, mabwíí amú ansíbi.

ɔ́bée mbébláa ahá ání bude amú ipiantɔ́ wa é  
mbée, malé amú ipiantɔ́.

19 Fówun mí ambli mbée,  
anu Wíe ahá nwewúunbi lafun.”

20 Inu olokuntá ɔ́wulú ámu, yínkíá ha músú ɔ́kírɔ́, ɔ́ɔ́wɔ́  
tíá asu. Ahá ámúú bubu ofiákpa unv ámu fée besi bude  
mu kí díín. 21 Inu Yesu lébláa amú ɔ́bée, “Nde, Bulu asun  
wanlínhé anfi laba mótó. Mú mlílanú á.”

22 Ahá ámu fée bonu asun wankláán ámúú iledali mu  
ɔ́nɔ́ ámu. ɔ́nɔ́ lobwie amú, befité bee, “Megyí \*Yosef mu bi  
ámu ni?”

23 Yesu lébláa amú ɔ́bée, “Nyin ání mléha mí yébi anfi  
mlíaa, ‘Uɔ́ ɔ́tsapú, tsa fú iwí!’ Mlélabláa mi mlíaa, ‘Bwe ató  
ámúú anlanú ání fúdebwe Kapernaum amu fú wúluto nfi  
é.’ ” 24 Inu oleyinkí bláa amú ɔ́bée, “ɔ́nɔ́kwali nde mli bláa.  
Butamahɔ́ Bulu ɔ́nɔ́sú ɔ́tɔ́pú ɔ́kuku asún mu wúluto.

25 “Mlinu, Bulu ɔ́nɔ́sú ɔ́tɔ́pú \*Elia bísu á, nyankpu  
mótswie nfinsa múa ifun kéké. Akún lehie ba Israel ɔ́mátó  
fée. Ibu mótó ání asurapu tsɔ́tsɔ́wtsɔ́ betsiá Israel ɔ́mátó alí  
bré ámutɔ́, 26 táme Bulu méha Elia ɔ́yɔ́ amótó ɔ́kuku wá.  
ɔ́surapu ɔ́kuá ɔ́bu Sarefat wúluto, Sidon ɔ́mátó nkule wá  
ɔ́leha mu ɔ́ɔ́yɔ́. 27 \*Uɔ́ pepe alɔ́pú tsɔ́tsɔ́wtsɔ́ é betsiá Israel  
ɔ́mátó Bulu ɔ́nɔ́sú ɔ́tɔ́pú Elisa bísu. Táme ɔ́meha ɔ́kuku iwí  
meplí, dun Naaman ání otsú Siria nkule.”

28 ɔ́bls lehie kítá ahá ámúú bubu ofiákpa unv ámu, bréá  
bonu Yesu asun blíhé anfi. 29 Bókusú gya mu dálí amú  
wúluto. Wúlu amu idin busu. Begya mu alu yówie wúlu  
amu ɔ́nɔ́, bee abuwuta mu wa tsonkolitɔ́. 30 Yesu lénatí tsun  
amótó yó ɔ́tínéá ɔ́yɔ́.

### Yesu Ōṣe Laláhe Gyáa

(Marko 1:21-28)

31 Inu Yesu lékplí yó Kapernaum, Galilea wúlu kuto. Olosuná amú ató amú ofiakpa ɔkpúnú ɔdaké. 32 Mu atosunáhé lobwie amú ɔnó, tsúfé olosuná amú ató túmisu. 33 Oyin ɔku bu ofiakpa unu, ɔṣe laláhe bu musu. Ɖɔkplón blí ɔbé, 34 “Kí mí! Yesu Nasaretyin, amansu bu ania funyo nsuné? Ntée aní ɔhíkpa febá lóó? Nyin ɔhá oduá fúgyi. Fúgyí Bulu Ōha Wankíhé amu ní!”

35 Yesu lókplun wa ɔṣe ámu ɔbé, “Kpa ɔnó bun, afudali mutɔ.” Inu \*ɔṣe laláhe amu léfin oyin ámu dá ahá ámutɔ unu, dáli mutɔ. Tɔto mɔbwe mu.

36 Ɖnó lobwie amú féé, befuté aba be, “Amansu ní? Oyin ánfu bu túmi, ɔdekplón wa ɔṣe laláhe, ide mu bu, dáli ahátɔ?” 37 Mu iwí asún leklei wá ɔmá ámu féétɔ.

### Alɔpu Tsɔtsɔtsɔ Tsa

(Mateo 8:14-17; Marko 1:29-34)

38 Yesu lédalí Yudafo ofiakpa unu yó Simon wóyítɔ. Ɖɔyo á, owísó lakítá Simon mu sia tsíhé, ɔda kínkíínkín. Bebláa Yesu be, ogyíi mu buale. 39 Yesu lókpukpé tú ɔtsi ámu, ɔkplón wa owísó ámu ɔbé, ikúsu musu. Inunu ulokusu musu, ɔtsi ámu lókusú bwé amú afɔɔɔ.

40 Bréá owí deta á, ahá ɔsura amú ahá aní buɔe ilo ɔtsan-ɔtsan lo ba, Yesu lópu ibi dínká amúsú tsá amútɔ okugyíku ilo. 41 Ɖṣe laláhe bu amútɔ akuto. Yesu lókplun wa ɔṣe laláhe amu. Bedali, buɔe okitikíti be, “Fúgyí Bulu mu Bi ámu ní.”

Táme Yesu lówa mbla wá ɔṣe laláhe amu aní bumátɔí, tsúfé buyin aní mgyí \*Kristo, (ɔhá amúb Bulu ladá mu ofúli amu) ní.

### Bulu Asún Ɖkanda Yudafo Ofiakpa

(Marko 1:35-39)

42 Mú ɔyi kehe bake a, Yesu lédalí wúlu amutɔ yó utsétɔ ɔtineku. Ahá bodunká mu alu yótu mu, bokokóli mu be

ománatí sí amú. <sup>43</sup>Táme ɔlebláa amú ɔbéé, “Ilehián ání néda \*Bulu iwíegýí iwí \*asun wankláán ámu ɔkan awúlu atráhe amu ésó. Tsúfé mú ɔbwekpá Bulu lówa mí ní.”

<sup>44</sup>Íni su oleki Yudea ɔmátó féé, dá Bulu asun wankláán amu ɔkan amú ofiakpa.

### Yesu Akasípú Gyankpawu Tɪ

(Mateo 4:18-22; Marko 1:16-20)

**5** <sup>1</sup>Eke ɔku Yesu líí Genesaret paatu<sup>b</sup> ɔnó, ahá tsɔtsɔɔtsɔ beba boputá mu ání bónu Bulu asún. <sup>2</sup>Olowun nklun anyɔ paatu ámu ɔnó. Aye alepú ámu bakplí yó buɔe amú asawutɔ da. <sup>3</sup>Yesu lódu wíé kuleá igyi Simon klétɔ. Múú ɔlebláa Simon ɔbéé, osún mú kpalobí dunka ntsusu. Inu oletsíá mútɔ súná ahá ámu ató.

<sup>4</sup>Bréá ɔɔtɔí tá á, ɔlebláa Simon ɔbéé, “Mlɪpla ɔklun amu ya okluklúkpa, amlɪɔtswi asawu le aye.”



*Aye alepú ámu buɔe amú asawutɔ da. (Luka 5:2)*

<sup>b</sup> 5:1 Genesaret paatu: Mú kén gyí Galilea ɔpu ni.



<sup>5</sup>Mú Simon lébláa mu ɔ́bée, “Owíé, anlóbwe kásíán ígye onyé fée, anuménya ɬɬɔ. Táme íniá fée ayó, su nóyɔ́ɬswi asawu amu.” <sup>6</sup>Bréá ɔ́yɔ́ɬswi asawu amu a, bele aye ɬɔ́ɬɔ́ɬɔ́. Mú su asawu amu lówa tití bi. <sup>7</sup>lno ɔ́ɔ́bwe ibi tí amú agyómá ayɔ́bá á mú búbu ɔ́klun nyɔ́ɬɬɔ́ ámu bee bubétsa amú. Beba betsa amú, bele aye amu búlá nklun anyɔ́ ámu dédééédé, ideklé ɬɬe. <sup>8</sup>Bréá Simon Petro lówun mú alí á, ɔ́leda akpawunu Yesu ayabitɔ́, bláa mu ɔ́bée, “Mí Wíé, mákpukpé mantáa mí! Lakpan ɔ́bwepú ngyi.”

<sup>9</sup>Tsúfée aye amú balé ámu lówa mu mu aba ámu wánwan. <sup>10</sup>Alí kén ulwa Sebedeo abí Yakobo mu Yohane, bugyi Simon agyómá ayɔ́bá ámu é wánwan ní.

Mú Yesu lébláa Simon ɔ́bée, “Mánya ifú! Tsú nde púya a, anyánkpúsa fée.” <sup>11</sup>Simon mu mu aba ámu benya plá nklun amu besi otsubúno alí, besi tógyítɔ́ ɬswi, kplá buo Yesu.

### **Uo Pepe ɔ́ɔ́pú ɔ́ku Tsa** (Mateo 8:1-4; Marko 1:40-45)

<sup>12</sup>Èke ɔ́ku Yesu bu wúlu kusu, \*ulo pepe ɔ́ɔ́pú ɔ́ku lówun mu. lno ɔ́lebedá akpawunu, pú ɔ́sukpi yi ɔ́sulúɔ́, kókóli mu ɔ́bée, “Owíé, ní fótulá á, fétalí há mí wí beplí.”

<sup>13</sup>Yesu létinkí ibi da mu, bláa mu ɔ́bée, “Natsúlá, fú wí ɬplí.” lno uló ámu léŋa le mu wí. <sup>14</sup>lno Yesu léda mu ɔ́lá ɔ́bée, “Mábla ɔ́haa. Natí laa afupu fú wí yosuná Bulu igyí ɔ́hapú, afuha mu ɬwígyurátɔ́ amú Mose mbla losuná tsú uló pepetsa wí ámu. Igyi adánsiɬe suna ahá aní fú wí laplí.”

<sup>15</sup>Táme Yesu wí asún létrá kleí yó ntíné dínká músú. ɔ́ɔ́m beba mu atosunáhé onukpá, ɔ́tsa amú ɔ́lɔ́pu é uló. <sup>16</sup>Táme oletsíá dáli amú ɔ́ bré ku yó \*dimbísú ɔ́tneku mu nkule yóɔ́ mpái.

### **Tsukule Osínpu Tsa** (Mateo 9:1-8; Marko 2:1-12)

<sup>17</sup>Èke ɔ́ku Yesu dé ató suná. \*Farisifo, Mose \*mbla asunápú akvá botsú Galilea pú Yudea ɔ́mátɔ́ pú Yerusalem beba

betsiá asi unv. Bulu túmi bu Yesuto há ulotsa. 18 Lnu á, ayin aku bɔsurá tsukule osínpu akpasu ba. Bekleá bɔpu mu wíé wóyítɔ́, pú mu tswi Yesu ansítɔ́. 19 Ɔɔɔm amu sv bumenya ɔkpa. Inu sv ɔyɔ́ɔvɔ obu ámu awunso, dá mú ɔtɔnekv tíí, beklíá akpa amv tswi ahá ámvɔ Yesu ansítɔ́ unv. 20 Bréá Yesu lówun ání baho mu gyi a, ɔlebláa tsukule osínpu amv ɔbéé, “Opió, nasí fú lakpan kíé fú.”

21 Mose mbla asunápu pú Farisifo ámu beblí wá nwunvɔ beé, “Ma gyí oyin ánví ɔɔe abususu blí ánví? Ma ɔbétalí sí lakpan kíé ahá ðvn Bulu nkule?”

22 Yesu lébɔ amú agywun. Mú sv ɔlefíté amú ɔbéé, “Ntogyi sù mɔ́ɔɔé ínu odu gywún? 23 Mɔmu lɔpɔn ha blí? ‘Nasí fú lakpan kíé fú.’ lóó, ntée ‘Kusu tsu fú akpa afvnatí?’ 24 Táme ndekléá mlíbú ání mí, Nyankpusa-Mv-Bi ánví mbv túmi ɔyí ánvítɔ́ sí ahá lakpan kíé amú.” Lnu ɔlebláa tsukule osínpu amv ɔbéé, “Nɔe fú bláa mbée, kusu. Tsu fú akpa afvnatí yv wóyí!”

25 Lnunvunv tsukule osínpu amv lókusú líí amú féé ansítɔ́, tsú mu akpa, ɔɔpv ɔkpa ɔyɔ́ wóyí ɔɔe Bulu kanfú. 26 Ɔnɔ lobwie ahá ámv féé. Ifú lowie amú féétɔ́, bekanfú Bulu beé, “Nɔe anlawnv ofúla!”

### Lewi Tɔ

(Mateo 9:9-13; Marko 2:13-17)

27 Mú ɔma bréá Yesu léɔali unv á, olowun \*lampɔo ɔhɔpu ɔkvá vtetí mu Lewi, tsie mu lampɔo ɔhɔkpa. Yesu lébláa mu ɔbéé, “Bobuo mɔ.” 28 Lnu Lewi lókusú, sí mu tógyítɔ́ ɔmagyáa, yóbuo mu.

29 Mú ɔma a, Lewi lótswi ɔpúnú mu wóyítɔ́ há Yesu. Lampɔo ahɔpu tsɔtsɔvtsɔ́ pú aha bambá é beba atɔ́ ámu ogyíkpa. 30 Farisifo pú Mose mbla asunápu ání bubv Farisifo ámvɔ befuté Yesu \*akasípu amv beé, “Ntogyi sù mɔla lampɔo ahɔpu pú lakpan abwepú mɔ́ɔɔé ibɔ wa gyi atɔ́, mɔ́ɔɔé ntá nú?”

31 Yesu léle mú ɔnɔ ɔbéé, “Alɔpv léhián vlɔ ɔtsapú, megyí ahá ání tvɔ bu amú ɔnlun. 32 Mmɔba aha wankláán ɔtikpa. Mboun lakpan abwepú ɔtikpa neba, ménv bédamlí klvntɔ́.”

### Ɖnóklí lwi Ason Futéhé

(Mateo 9:14-17; Marko 2:18-22)

<sup>33</sup>Aha aku bebláa Yesu beɛ, “Asú Ɖbɔpú Yohane akasípú butetsiá \*klí ɔnó bɔ mpá. Farisifo akasípú é butɔbwé alí, táme fú \*akasípú mú budegyí, buđenúu.”

<sup>34</sup>Yesu léfité amú ɔbéɛ, “Ɖtsi ɔkpáinpú anyawíe béklí ɔnó bréá ɔbu amú wá? Ekekekeke! <sup>35</sup>Táme eke ɔku béba ání békpa mu náti sí amú. Alí nke ámutɔ béklí ɔnó ní.”

<sup>36</sup>Ínu ɔleha amú yébi ɔbéɛ, “Ɖhaa tamapú tati pɔpwe tan tati dada. Ní ɔbwé mú alí á, alayíntá pɔpwe amu, pɔpwe amu pú dada amu ansí é uméekanáa aba. <sup>37</sup>Alí kén butamapú nta pɔpwe wá ɔwulú-kpákpá kente wuhétó ní. Nta pɔpwe amu ibófu fá kente amu tsítsá, yíntá kente amu é. <sup>38</sup>Ínu su ɔwulú-kpákpá kente pɔpwetɔ búɔpú nta pɔpwe wá. <sup>39</sup>Ɖhaa tamafíté nta pɔpwesu bréá alanu dánhe. Tsúfé ɔteblí ɔbéɛ, ‘Ídánhe amu bu alé ðun.’ ”

### Ɖkpúnú Ɖdaké Mu Wie

(Mateo 12:1-8; Marko 2:23-28)

**6** <sup>1</sup>Yesu mua mu \*akasípú ɔɔtsun ayó ndɔ kutɔ \*ɔkpúnú ɔdaké. Mu akasípú amu ɔpɔrúun atɔ-abí ámu ku, ɔpɔpusáa mú wí. <sup>2</sup>\*Farisifo ámu aku befíté amú beɛ, “Ntogyi sù mlíde tɔ́á aní mbla meha ɔkpa ání bubwéɛ ɔkpúnú ɔdaké bwé?”

<sup>3</sup>Yesu léfité amú ɔbéɛ, “Mlímɔ́kúkla nu tɔ́á Owíe \*Dawid lɔ́bwe bréá akún de mua mu abúopu kí? <sup>4</sup>Olebitíwíé Bulu osúmka yótsu bodobodoá bapúhá Bulu igyí ba, mua mu abúopu amu begyi. Bulu igyí ahapú nkulɛ beɛ ɔkpa bútegyi alí bodobodo amu.”

<sup>5</sup>Mú Yesu ɔlɔmɔ mu asún ɔnó ɔbéɛ, “Mí, Nyankpusa-Mu-Bi ánti gyí ɔkpúnú ɔdaké mu wie.”

### Uɔtsa Ɖkpúnú Ɖdaké

(Mateo 12:9-14; Marko 3:1-6)

<sup>6</sup>Yesu lóyɔ atɔ́ osunákpá Yudafo \*offiakpa \*ɔkpúnú ɔdaké bámbá. Oyin ɔkuá mu gyɔpɔ ibi lawú bu unu. <sup>7</sup>Mose \*mbla

asunápu pú Farisifo aku bete Yesu ki bee, obétsa ilo okpónú odaké, méni bénya mu iwí asún, púyénatí musu súná ahande. <sup>8</sup>Yesu yin amú nwuntó asún. Mú su oledbláa oyin ámúú mu ibi kule lawú ámu obée, “Kusu belí amú ansító nfi.” lnu oyin ámu lókusú belí amú ansító. <sup>9</sup>Múú Yesu lébláa amú obée, “Nde mli futé, nto mbla ámu léha okpa ání abwée okpónú odaké? Yilé lóó, ntée lalahe? Ahóó oha nkpa lóó, ntée amóó mu?” <sup>10</sup>lnu oledamlí ki amú féé fíá. Múú oledbláa oyin ámu obée, “Tínki fú ibi amu.” Olenya tínki ibi amu ali pé, oje lowie mútú.

<sup>11</sup>Oblí lekítá amú, befíté aba bee, “Nto kóún abéhié bwé Yesu anfi?”

### Akasípú Amu Adá

(Mateo 10:1-4; Marko 3:13-19)

<sup>12</sup>Eke oku Yesu lódu yó ibusu yóbo mpái há Bulu tsú onyé yéha oyi kehe. <sup>13</sup>Mú oyi kehe a, oleti mu akasípú, olele amútú dúanyó, oleti amú mu \*sumbí ayópú. <sup>14</sup>Amúgyí, Simon ání oledunká mu Petro mua mu pio Andrea; Yakobo mua Yohane; Filipo, Bartolomeo, <sup>15</sup>Mateo, Toma, Alfeo mu bi Yakobo, Simon ání ogyi iwítsutsiá adunkápú opasuato oha; <sup>16</sup>Yakobo oku mu bi Yuda pú Yuda Iskariot ání olebele Yesu há.

### Yesu Atósuná Múa Ilo Tsa

(Mateo 4:23-25)

<sup>17</sup>Yesu mua sumbí ayópú ámu beklí tsú ibu ámusu ba osulúv tantasu. Mu abúopu tsotsótsó pú odóm kponkponkponntiá botsú Yudea omátú, Yerusalem pú opu onó awúlu Tiro múa Sidonsu beba unu. <sup>18</sup>Beba bee bebá bonu mu asun blíhé, otsa amú ilo. Ahá ání \*oje laláhe de amú háan é beba, olegya oje laláhe lé amútú. <sup>19</sup>Amú féé bekleá bópu ibi da mu, tsífé oje dedali mutó, oletsa amú féé ilo.

### Oyúla Asún

(Mateo 5:1-12)

<sup>20</sup>Yesu lótsu ansí ki mu akasípú, oledbláa amú obée,

“Bulu layúlá mlhá mlímá tɔtɔ,  
tsúfé mlibú mu \*iwíegyi amu ni.

21 Bulu layúlá mlhá akún de mli séi,  
tsúfé mléba begyi mwe.

Bulu layúlá mlhá mlidésú séi,  
tsúfé mléba bɔmɔsí.

22 “Bulu layúlá mlhá bude mli lu, bude mli gyáa le amútɔ,  
síá mli, tí mli ida laláhe mí, Nyankpusa-Mv-Bi ánfɔ su.

23 Ansí igyi mli eke ámu, amlɔfuli kpayi ansigyísú, tsúfé  
mli ikɔká tɔɔ ɔsúsú. Alí amú anáin bɔbwe Bulu ɔnɔsú atɔ́pú  
amu ni.

24 Táme mli ání mlɔlanyá iwɔ séi, mligyɔwɔ ní.  
Tsúfé mli ansigyí féé mlɔlanyá á.

25 Mli ání mlɔlamwé séi, mligyɔwɔ ní.  
Tsúfé akún béba bekitá mli.

Mli ání mlidémɔsí séi, mligyɔwɔ ní.  
Tsúfé mléba begyi awɔrehɔ, su.

26 “Mli ání ahá féé bude mli kanfú, mligyɔwɔ, tsúfé alí mli  
anáin bekanfú Bulu ɔnɔsú atɔ́pú afunupu amu é ní.

### Alupódwe

(Mateo 5:38-48; 7:12a)

27 “Táme nde mli ání mlónu bláa mbéé, Mludwe mli  
alupú, amlɔbwe yilé ha amú. 28 Mliyula ahá ání butɔlwíí  
mli, amlɔbɔ mpái ha ahá ání butesíá mli. 29 Ní ɔha ɔdá fú  
ɔtɔɔ a, damli nyɔɔsɔ é ha mu ɔda. Ní ɔku ɔswíí fú tati á,  
wɔɔ fú atadɔe é ha mu. 30 Ní ɔku ɔkúlí fú atɔ́ á, ha mu. Ní  
ɔku é otsú fú atɔ́ á, máyɔhɔ mú. 31 Bwe ha ahá alíá fudeklé  
féé bubwée ha fu.

32 “Ní fú adwepú nkule futɔdwé á, ipán mɔmɔ fénya?  
Lakpan abwepú kúrää butɔdwé amú adwepú. 33 Ní ɔhá ání  
ɔtɔbwé yilé há fú nkule fúɔtɔbwé yilé há á, ntogyi sù Bulu ɔdáa  
fú ipán? Lakpan abwepú é butɔbwé alí. 34 Ní ɔhá ání fuyin  
ání obénya há fú nkule futehá ipán a, ntogyi sù Bulu ɔdáa fú  
ipán? Lakpan abwepú óó butɔpú atɔ́ pan amú aba, yínkí hɔ mú  
alí. 35 Mú su mludwe mli alupú, mlibwe yilé ha amú, mlɔpan

amú ató, mlimáti amú akó, méni Bulu óbéka mli tko tsotsótsó. Fówun mlilabwé Ósósúsú Bulu ámu abí. Tsúfé óbu awítóle há há ání ató tamagyi amú ansí pú aha laláhe féé. <sup>36</sup>Mlibwe nwe awúnpu fé alá mli Sí Bulu gyí nwe owúnpu.

### Ulále

(Mateo 7:1-5)

<sup>37</sup>“Mlumále ahá ulá, méni Bulu méele mli ulá. Mlumáha óhaa ipón, méni Bulu é ómééha mli pón. Mlisi mli aba ulá kie amú, Bulu osi mli klé kie mli. <sup>38</sup>Mliha ahá tóá de amú hián, Bulu óbélahá mli. Óbópu ato susúhe wankláán wá mú, wúsúw mú, sílá mú, íbóbulá tsítsá há mli. Tsúfé tóá fópúsúsu ha fú bá á, mú kén Bulu óbópusúsu ha fu ní.”

<sup>39</sup>Yesu létrá ha amú yébi óbéé, “Nsibi obwiepú óbétalí kpá nsibi obwiepú? Amú féé buméekpa wíé óbótó? <sup>40</sup>Ókasípú tamadon mu wie, táme ókasípú ókásí bí á, ótóbwé fé mu wie.

<sup>41</sup>“Ntogyi sú fúde ipí tókúrííbi wúun fú bá nsíbisu, táme fumedé ogyakpatín ání idun fú klésu mú wúun? <sup>42</sup>Ntéé ntogyi sú fúde fú bá bláa fee, ‘Mí píó, ha mí andunkí ipí fú nsíbisu’, táme fumedé ogyakpatín ání idun fú klésu mú wun? Apinabwebí óbwepú, gyankpa dunki ogyakpatín ámu fú nsíbisu, méni fówun ató wankláán, tálí dínkí ipí ámu fú bá klésu.

### Oyí Pú Mú Abi Swiehé

(Mateo 7:6-20; 12:33-35)

<sup>43</sup>“Oyi wankláán méetalí swíé abi laláhe. Ali kén oyi laláhe é méetalí swíé abi wankláán ní. <sup>44</sup>Tsúfé oyí-íbi butópúbí mú. Butamakpótí kankaba okplóto oyísú, butamakpótí tsókpun é tunkpa iflasu. <sup>45</sup>Óha wankláán telé tsiátó wankláán ówan tsú mu klwntó, óha laláhe é telé tsiátó laláhe ówan tsú mu klwntó. Tsúfé tóá idun óha klun a, mótédálí tsu mu ówó.

### Butású pú Osublúto Obuyíi

(Mateo 7:24-27)

<sup>46</sup>“Ntogyi sú mludé mí ti mliáa, ‘Mí Wíé! Mí Wíé!’ táme mlutamagyi mí asun blíhésv? <sup>47</sup>Nósuná mli alá óhá ání

ɔleba mí wá bonu mí asún, gyi dunká músú gyí. <sup>48</sup>Ogyi fé ɔhá ání ɔbá beyi obu á, olegyankpá kwí mú ntswiasí ɔbó yótu butá, ɔlɔwa ntswiasí ámu dínká músú. Bréá ntsu lɔbulá kítá mú á, umetalí kpínkí obu ámu, tsúfé oleyi mú wankláán. <sup>49</sup>Táme ɔhagyíɔha ání olonu mí asun blíhé, omegyí músú gyí fé ɔhá ání oleyi mu obu ɔsulúsu keke, ɔmɔwa mú ntswiasí. Bréá ntsu lɔbulá wa mú á, ilobwie dá gbloo ununu, yíntá féé!”

### Romafɔ Isá Akɔpú ɔhande Osúmpú ɔku Ilo Tsa

(Mateo 8:5-13; Yohane 4:43-54)

**7** <sup>1</sup>Bréá Yesu lébláa ahá ámu asún ánfí féé tá á, ɔlɔyɔ Kapernaum wúluto. <sup>2</sup>Romafɔ isá akɔpú ɔhande ɔku bu unu. ɔbu osúmpú ɔkuá ɔtehié kle mu asún. Osúmpú amu délɔ, odeklé owu. <sup>3</sup>Bréá isá akɔpú ɔhande amu lónu Yesu nka á, ɔlɔwa \*Yudafɔ ahande aku sísí Yesu ɔbéé, buyókokóli mu ɔbetsa mu osúmpú amu ilo ha mu. <sup>4</sup>Ahande amu behie kókóli Yesu bee, “Abwíí ipa, ní ɔku léhián fú mbua á, múmú oyin ánfí ní! <sup>5</sup>Tsúfé ɔɔdwé aní pi. Muléyi aní \*ofiakpa kúráá há aní ní.”

<sup>6</sup>Mú su Yesu mua amúnɔyɔ bɔpu ɔkpa. Bréá beta wóyí ámutɔ wie tá á, isá akɔpú ɔhande amu lówa mu anyawíe ɔbéé buyéfia Yesu, abubla mu bee, mbée, “Owíé! Máhan fú iwí, tsúfé mmɔfun ání féba mí wóyítɔ. <sup>7</sup>Nawun ání mí é mmɔfun ání néba fú wá. Fú mú bli asvanku, iwí bɔwa mí osúmpú amu ɔnlɔn. <sup>8</sup>Tsúfé mí é mbu ahande aku asi. Isá akɔpú aku é bubu mí asi. Nelé ɔnɔ mbée amútɔ ɔku ɔnátí á, ɔtenátí. Ní mbée ɔbá é á, ɔteba. Tógyítɔá nebláa mí osúmpú mbée ɔbwée á, ɔɔbwé.”

<sup>9</sup>Bréá Yesu lónu asún ánfí á, ɔnɔ lobwie mu, ɔledamlí bláa ɔɔɔm amúú bubuo mu amu ɔbéé, “Ɔnɔkwali asún, nde mli bláa, mmɔkúwun ɔhá ání ɔbu hógyi kpɔnkpɔnti ánfí odu Israelfɔtɔ kúráá kú!”

<sup>10</sup>Bréá abɔpu amúú isá akɔpú ɔhande amu lówa ámu beyínkí yó wóyítɔ a, bowun ání osúmpú amu iwí lawá mu ɔnlɔn.

### Ɔsvrapu Ɔku Mu Bi Tsinkí

11 Ɔmowa ɔpá kuku Yesu lóyo Nain wúluto. Ɔdom bubuo muva mu \*akasípú. 12 Bréá olowie wúlu ɔnó á, ɔɔtu aku, busun fúli akpasu bebá. Obi yinhé ɔkule pé ogyi há ɔsvrapu ɔku. Ɔdom kpɔnkpɔnkpɔntiá botsú wúlu amuto é bubuo ɔtsi ámu. 13 Bréá anu Wíe lówun ɔtsi ámu a, mu asún ɔwa mu nwe, ɔlebláa mu ɔbéé, “Másu!” 14 Múú ɔɔyópu ibi da akpa amu, asvrápú amu besi lí. Inu ɔlebláa fúli amu ɔbéé, “Ɔyasubi, nde fú bláa mbéé, kusu!” 15 Inu fúli amu lókusu tsíá, wá tóí bi. Yesu lópu mu wá mu yin ibito.

Luk

16 Ifú lekutá ahá ámu féé, bekanfú Bulu beé, “Bulu labɔbúá mu ahá! Mu ɔnósú ɔtópú kpɔnkpɔnti ɔku lalin anuto!”

17 Yesu iwí asún ánfí lekí wá Yudea ɔmá pú awúlu ání ibu nsiné unu féétó.

### Yesu Mva Asú Ɔbɔpú Yohane

(Mateo 11:2-19)

18 Asú Ɔbɔpú Yohane akasípú beyébláa mu asún ánfí féé. Mú su ɔɔwa amútó abanyó sísí Yesu ɔbéé, 19 buyéfité mu beé, “Fúgyí ɔhá ámuú ɔbéba amu ni, ntée akí ɔha bambá ɔkpa?”

20 Bréá ahá ámu beba bowie Yesu wá á, bebláa mu beé, “Asú Ɔbɔpú Yohane ɔbéé abéfité fú aníaa, ‘Fúgyí ɔhá ámuú ɔbéba amu ni, ntée akí ɔha bambá ɔkpa?’ ”

21 Yesu létsa ɔɔpu pú ahá ání iwí dé amú ɔsun tsɔtsɔtsɔ ali bré ámu. Olegya \*ɔɔe laláhe lé aháto, bwíí ansibi abwiepú tsɔtsɔtsɔ é ansíbi. 22 Inu ɔlele Yohane akasípú asún ámu ɔnó ɔbéé, “Mlyinki yebláa Yohane tóá mlilabowun pú múa mlilabonu. Mlilabowun ání ansibi abwiepú bude ató wúun, abo buna. \*Uu pepe ɔɔpú iwí deplí, isu atínpu bude asún nu. Afúli budetsinkí, ahiánfɔ é bude asun wankláán ámu nu. 23 Bulu obóyulá ɔhá ání mí bwehé mɔkusu líí musu.”

24 Bréá abí ámuú Yohane lówa sumbí ámu beyinkí ɔyó á, Yesu lówa tóí tsú Yohane iwí súná ɔdom amu bi. Ɔbéé, “Bréá mlilédalí yo dimbísú unu á, nto ɔkíkpa mlilóyo? Fítáa ání afú de mú tsúun lóó? Ekekeke! 25 Ní megyí mú á, nto



kóun ɔ́kíkpa mlílóyɔ? Dhá ání ɔ́dídí ntsrim. Ekekeeke! Ahá ání butedídá tati ámu odu gyi ɔ́dwe á, awíe wóyí butetsiá. 26 Mlɔ́bla mu! Bulu ɔ́nósú ɔ́tɔ́pú mlilédali yéki? Ee, Yohane ni. Ɔ́dun Bulu ɔ́nósú ɔ́tɔ́pú. 27 Mu iwɔ́ asún Bulu léblí ɔ́wanlín mú tswɔ́ bɛɛ, ‘Kɔ́, nde obí wa gya fu nkɔ́pá. Mu ɔ́béla ɔ́kpa há fú ní.’ ” 28 Yesu lóyɔ mu asónsú ɔ́béɛ, “Nde mli bláa mbéɛ, ɔ́hagyíɔ́ha ání ɔ́ha tshé laken kwí mófɔ́n mu, táme mu é ɔ́mɔ́fɔ́n \*Bulu iwíegyí ámutɔ́ ɔ́kusv kúráá.”

29 Aha ání bonu Yesu asún ánfɔ́ pú \*lampóo ahópu kúráá bowun ání Bulu asún da ɔ́kpa. Botsulá há Asú Ɔ́ɔ́pú Yohane lóɔ́ɔ́ amú \*asú. 30 Táme \*Farisiɔ́ pú Mose mbla asunápú amu mú bumeha Yohane ɔ́ɔ́ amú asú. Bekiná tóá Bulu léhúhíe ha amú bwɛ.

31 Yesu lóyɔ mu asónsú ɔ́béɛ, “Séi ánfɔ́ á, amendu nópukápú ndemba-abí ánfɔ́? Ntɔ́ belan? 32 Bugyi fé nyebíá butsie dɔ́nsu buɔ́e aba kpólí, blí bɛɛ, ‘Anɔ́lpléí ansigyísú, mlímétsa. Mú sv anɔ́lawá awírehɔ́ ɔ́lɔ́, táme mlímósú.’ 33 Mlígýí fé nyebí ánfɔ́, tsúfé Yohane léba á, oletsíá klí ɔ́nɔ́, omonu ntá, táme mɔ́lɔ́a, ‘Ɔ́ɔ́ɛ laláhe bu mutɔ́!’ 34 Mí, Nyankpɔ́sa-Mu-Bi ánfɔ́ mú naba nde atɔ́ gyí, nde ntá núu. Mú é mɔ́lɔ́a, ‘Mlɔ́ki opotsuapu pú nta ɔ́ɔ́pú. Lakpan abwɛpú pú lampóo ahópu onyawíe.’ 35 Táme ɔ́há ání ɔ́bu Bulu nyánsa á, mu tsíátɔ́ telé mú ɔ́wan.”

### Ɔ́tsɔ́ Lakpan Ɔ́bwɛpú Ɔ́ku

36 Farisiyin ɔ́ku létɔ́ Yesu atɔ́ ogyíkpá mu wóyítɔ́. Bréá Yesu tsie ɔ́púnú ámu así á, 37 ɔ́tsɔ́ ɔ́kúá ɔ́bu wúlu amutɔ́, ogyi lakpan ɔ́bwɛpú lónu Yesu nka ání batswɔ́ ɔ́púnú há mu Farisiyin amu wóyítɔ́. Inu olotsu mu ofobí fánfán ání ɔ́bu bíá prentɔ́a wankláán ɔ́ɔ́ ba inu. 38 Ɔ́lɛ́bɛ́da akpawunu Yesu ayabiasɔ́, ɔ́lekpa isú yi woo. Ɔ́ɔ́pɔ́ mu ntsú fwí Yesu ayabiasɔ́, pú mu nwunsu-imi tsítsi mú. Ɔ́ɔ́kulá Yesu ayabi pútá, tséí ofobí fánfán ámu wúlí mu ayabisu. 39 Bréá Farisiyin amú ɔ́letɔ́ Yesu amu lówun ínɔ́ á, ɔ́leblí wá nwuntɔ́ ɔ́béɛ, “Ní Bulu ɔ́nósú ɔ́tɔ́pú oyin ánfɔ́ gyí lélé á, tekɔ́ alawun ɔ́há oduá ɔ́tsɔ́ ánfɔ́ gyí asa ɔ́ɔ́pɔ́ ɔ́bi da mu, tsúfé lakpan ɔ́bwɛpú ogyi.”

40 Yesu lébláa oyin ámu ɔ́béɛ, “Simon, mbu asvanku bláa fu.”

Simon léfíté mu ɔ́bée, “Osunápú, amansu igyi? Bla mi.”

41 Yesu lébláa mu ɔ́bée, “Ahá abanyó aku bepan sika oyin ɔ́ku wá. Ɔ́kule lépan bliba-anu (5,000,000), ɔ́kule é lépan mpím lafanu (500,000)<sup>c</sup>. 42 Bumenyá kóba amu ká. Mú su oyin ámu lésikíé amú abanyó féé. Bla mi, amúts ɔ́mɔ́m ɔ́bódwe oyin ámu dun?”

43 Simon lébláa mu ɔ́bée, “Nahogyiá ɔ́mɔ́amúú mu ɔ́kɔ́ tso dun amu.”

Yesu lébláa mu ɔ́bée, “Ɖɔ́ɔkwali igyi.” 44 Inu Yesu léyinkí kɔ́ ɔ́tsi ámu, ɔ́lébláa Simon ɔ́bée, “Fawun ɔ́tsi ánfɔ́? Nɛba fú wóyító a, fumeha mí ntsu anfwɔ́ ayabiasɔ́. Táme ɔ́tsi ánfɔ́ mú lapú mu ntsú fwí mí ayabiasɔ́, pú mu nwunso-imi tsítisi mú. 45 Fumelatá mí pútá, táme tsú bréá nɛba nfi ɔ́pá á, ɔ́tsi ánfɔ́ mókúsí mí ayabi kulá pútá. 46 Fumetséi ofobí wúlí mí nwuntɔ́, táme mu mú alatséi ofobí fánfán wúlí mí ayabisu. 47 Mú su nde fú bláa mbée, ɔ́dwe tsɔ́tsɔ́tsɔ́ ánfɔ́ alalé súná mí ánfɔ́ idesuná ání Bulu lasí mu lakpan tsɔ́tsɔ́tsɔ́ ámu féé kíé mu. Táme ɔ́há ání Bulu osíi lakpan kpalobí kíé á, ɔ́dwe kpalobí ɔ́telé súná.”

48 Inu Yesu lébláa ɔ́tsi ámu ɔ́bée, “Nasí fú lakpan féé kíé fú.”

49 Ahá ámúú amúá Yesu butsie ɔ́púnúasi ámu, beblí wá nwuntɔ́ beɛ, “Ma gyí oyin ánfɔ́ ɔ́bée muna mude ahá lakpan sikíé amú.”

50 Múú Yesu lébláa ɔ́tsi ámu ɔ́bée, “Fú hógyi laho fu nkpa. Nati iwilwiitɔ́.”

### Atsɔ́ Bobuo Yesu

**8** 1-2 Inuowa ɔ́pá kuku, Yesu léki awúlu múa nkuda asi, ɔ́de \*Bulu iwíegyi ámu iwɔ́ asun wankláán ɔ́kan da. Mu akasípú dúanyɔ́ ámu pú atsɔ́ akvá olegya \*ɔ́nye laláhe lé amúts, tsá amú ɔ́ bobuo mu. Atsɔ́ ámu gyí, Magdalayintse \*Maria ání Yesu légya ɔ́nye laláhe asienó lé mutɔ́. 3 Owíe

<sup>c</sup> 7:41 Sika ánfɔ́ igyi sika futútú lafanu (500) múa aduenu (50), igyi ɔ́ha nke lafanu (500) múa aduenu (50) ikoká.

\*Herode wóyísú ɔkípú Kusa mu ka Yohana. Ɔtsi ɔkúá butetí mu Susana pú atsi tsɔtsɔɔtsɔá betsiá pú amú ató kɪ Yesu muva mu akasípúsu.

### **Ató-abí Owunyápu Iwɪ Yébi**

*(Mateo 13:1-9; Marko 4:1-9)*

4Bréá ɔɔɔm kpɔnkpɔɔnkpɔntɪ botsu awúlu-awúlusu ba befia Yesu wá á, ɔleha amú yébi ɔbéé,

5“Ɔɔɔɔɔpu ɔku lóyo ató-abí owunyákpa. Bréá ɔde mú wunyáa a, iku lówulí ɔkpatɔ, ahá betsatsáa músú, mbubwi é ɔɔtswetswéé mú féé. 6Iku lówulí abutású, ɔtínéá usi kpalobí dɪn. Uɔwa ɔsa kwe, táme bréá owí lelɪn a, ulɔɔ mú mʼ, tsúfé imenya ntsu. 7Abí ámu ku lówulí awutɔ, awu ámu ɔɔbulá kítá mú, umedan. 8Abí ámu ku lówulí ɔsulúw wankláánsú, dan. Iloswie abí tsɔtsɔɔtsɔ fé mú ámúú olodu ámu odu tsé lafa.”

Yesu lómɔ mu asún ɔnʼ ɔbéé, “Ɔhá ání ɔbu asu onúu.”

### **Tsá Svá Yesu Lótɔí Ayébisu**

*(Mateo 13:10-17; Marko 4:10-12)*

9Yesu akasípú befité mu yébi anfi asi. 10Ɔlebláa amú ɔbéé, “Bulu lahá mlɪ ɔkpa ɔbéé, mlíbú mu \*iwíegyi ámu iwɪ asun ɪáinhé. Táme nde aha bambá asún bláa ayébisu, ménɪ bówun, táme buméebi. Bónu, táme bumóonu mú asi.

### **Ató-abí Owunyápu Yébi Amu Asu**

*(Mateo 13:18-23; Marko 4:13-20)*

11“Yébi amu asi ní. Ató-abí ámu gyí Bulu asún. 12Abí ámúú ulówulí ɔkpatɔ ámu gyí ahá ání butonú asún ámu, táme Ɔbunsám teba bele mú lé amú kluntɔ, ménɪ bumóɔho músú gyi, fówun bénya nkpa ání utamatá. 13Abí ámúú ulówulí abutású amu gyí ahá ámúú bonú asún ámu pé, bahɔ mú ansigyísú, táme buma nlín. Mú su butamahogyi wa ɔpá. Ní isókɪ ku inyá tú amú pé, badɪda. 14Abí ámúú ulówulí awutɔ ámu gyí ahá ání bonú asún ámu a, bahɔ mú, táme ɔyi ánfutɔ atɔ hiánhe iwɪ gywúɪn, pú mótɔ atonyahé iwɪ ansigyí

tegyi asún ámusu. Íni su butamaswié abí dan. <sup>15</sup>Abí ámúú ulowulí ɔsulúw wankláánsú ámu gyí ahá ámúú bonú asún ámu a, butɔhɔ mu wá klun wankláán ání itonú asún, gyi músútú. Íni su butotomi swié abí tsɔtsɔɔtsɔ.

### **Ɔkandíe lwi Yébi**

*(Marko 4:21-25)*

Luk

<sup>16</sup>“Ɖhaa tamanywé ɔkandíe pú ató bun músú, ntée púwá mpá ayasi. Ɖfóákpá ɔtɔpúbian, méni ibówankí há ahá ání béba wóyí ámutɔ.

<sup>17</sup>“Tsúfé tɔtɔ má unvá ibéɲáin, uméelun ɔwan. Asun ɲáinhé kuku é ma unvá buméebi mú.

<sup>18</sup>“Mluku wankláán mli asún-nutú. Tsúfé ɔhá ání odekléá obónu mí atosunáhé amu asi á, Bulu ɔbópu iku tsía mótú há mu. Táme ɔhá ání omedékléá obónu mú asi á, Bulu ɔbóswi mu kpalóbí ámúú olosusúu ání alabí ámu kúráá.”

### **Yesu Abusuanfɔ Onutó**

*(Mateo 12:46-50; Marko 3:31-35)*

<sup>19</sup>Yesu mu yin mua mu apíó beba mu wá, táme ɔɔɔm amu su bumetalí wíé ba mu wá. <sup>20</sup>Ahá ámutɔ ɔku lébláa Yesu ɔbéé, “Fú yín mua fú apíó bulú kpankpá, budekléá bówun fu.”

<sup>21</sup>Yesu lébláa amú ɔbéé, “Mí yín mua mí apíó gyí ahá ání butonú Bulu asún ámu, gyi músú.”

### **Atsufú Asibá**

*(Mateo 8:23-27; Marko 4:35-41)*

<sup>22</sup>Eke ɔku Yesu lébláa mu akasípú ɔbéé, “Mliha afa Galilea ɔpu yɔ mú ɔbin.” Mú su ɔɔpu ɔkpa ɔɔyú. <sup>23</sup>Bréá ɔyú á, Yesu lédidi. Inu afú kɔnɔkɔnɔkɔnɔnti ku lówa tsúun bi. Ntsu ámu ideda wíé ɔklun amutɔ, ideklé me. Uɔtu amú ansí pepe. <sup>24</sup>Mú su betsinkí Yesu, bláa mu beé, “Ani Wíé! Anidé ntsu wie!”

Yesu lókusú lé ɔnɔ wa afú múa ntsu ámu, unu fée lɔlɔ. <sup>25</sup>Inu ɔlefíté amú ɔbéé, “Mli hógyi me?”

Ifú lekítá amú, ɔ́nɔ́ lobwie amú, befuté aba bee, “Nyankpusa ɔ́mɔ́mɔ́ nɛ, alalé ɔ́nɔ́ wa afú múa ntsu kúraá, banú mu ɔ́me ali?”

**Ɖɛ Laláhe Gyáa Le Ogbedéputó**  
(Mateo 8:28-34; Marko 5:1-20)

26 Yesu mua mu akasípú befa ɔ́pu tsú Galilea yówie Gerasefo<sup>d</sup> ɔ́sulósu. 27 Bréá Yesu dédali ɔ́klɔn amuto á, oyin ɔ́kúá otsú wúlu amuto, ɔ́ɛ laláhe bu muto lébefia mu. Oyin ánfí lékpa ató, tú dáli wóyító, yó otsie afúli opulákpa ulawá ɔ́pá. 28 Bréá olowun Yesu a, ɔ́lɔsurá okitikíti, dá akpawunu Yesu ayabito, kplón bí ɔ́béé, “Ɖsúsúsú Bulu mu Bi Yesu, amansu igyi? Kókoli, máputí mí ató.” 29 Ali bré ámuto á, Yesu lakplón wa ɔ́ɛ laláhe amu ɔ́béé, idáli muto dodo. Mú su oyin ámu léblí ali ní. Ɖɛ laláhe amu itowíé muto brégyíbré. Mú su butowá mu ibi pú mu ayabi ikan, gyo mu iwí. Mú óó á, otebíá ikan amu, ɔ́ɛ laláhe amu itehá mu ɔ́tesrí wíé aputu.

30 Inu Yesu léfuté mu ɔ́béé, “Nkálí butetí fú?”

Oyin ámu lélé mú ɔ́nɔ́ ɔ́béé, “Mí dá gyí ‘Ɖɔ́m.’ ” Tsúfé ɔ́ɛ laláhe tsɔ́tsɔ́tsɔ́ bu muto. 31 Ɖɛ laláhe amu bokokóli Yesu ɔ́béé, ɔ́mágya amú yówa ulán klúklúúklúá uma ɔ́kato.<sup>e</sup>

32 Mprákuo tsɔ́tsɔ́tsɔ́ aku budegýí okúku kusu unu fún. Mú su ɔ́ɛ laláhe amu bokokóli Yesu bee, ɔ́há abuyowie mprákuo ámuto. Ɖleha amú ɔ́kpa ɔ́béé buyó. 33 Inunu bedali oyin ámuto yówie mprákuo ámuto, amú féé besrí kpáklí okúku amu wíé ɔ́puto, wúwu.

34 Bréá mprákuo akpapú ámu bowun tóá ulaba a, besrí yéblí asún ánfí wúluto pú ɔ́má ámuto. 35 Inu ahá beba beki tóá ulaba. Bowun ání oyin ámú tekí ɔ́ɛ laláhe bubu muto ámu ansító ladí, alawá atadie otsie Yesu wá. Uɔ́wa amú ifú. 36 Ahá ámú bowun itó ámú uléba amu bebláa amú alá oyín ámú ɔ́ɛ laláhe bubu muto ámu lénya mu ulotsá. 37 Ɖmá ámuto ahá féé bokokóli Yesu bee, ɔ́dáli amú ɔ́mátó, tsúfé ifú lehie kíta

<sup>d</sup>8:26 Gadarafɔ́ bu nwuló dada amu akuto.   <sup>e</sup>8:31 ulán klúklúúklúá uma ɔ́ka gyí ɔ́ɛ laláhe isu ɔ́bitíkpa.

ámú. Mú su Yesu lówie ɔklun amuto ɔbéé amvnatí. <sup>38</sup>Oyin á múbú tekí ɔɲe laláhe tsie mutɔ ámu lókokóli mu ɔbéé, “Ha mí ambuo fu yɔ.” Táme Yesu méha mu ɔkpa.

<sup>39</sup>Mboún ɔlebláa mu ɔbéé, “Yinki yɔ wóyí, afuyebháa mli pi toyiléá Bulu labwé há fú.”

Mú su oyin ámu léki wúlu amu féé fiá, ɔde toyilé á múbú Yesu labwé há mu amu blí wúlu amuto féé.

Luk

### **ɔhande ɔku Mu Bi Mva ɔtsi ɔku ɔlo Tsa**

*(Mateo 9:18-26; Marko 5:21-43)*

<sup>40</sup>Bréá Yesu léyinkí yówie ɔpu amu ɔbun a, ɔɔm boho mu atúu, tsúfé bude mu ɔkpa kú. <sup>41</sup>lno oyin ɔkúá butetí mu Yairo, ogyi Yudafo \*ofiakpa ɔhande léba beda akpawunu mu ayabito, kókóli mu ɔbéé, ɔbá abuyɔ mu wóyítɔ. <sup>42</sup>Mu bi tsíhé ɔkule péá ɔbu, alaho ní dúanyɔ da odewu.

Bréá Yesu lópu ɔyɔ unu á, ɔɔm amúbú bubuo mu amu bekpá buo mu ye. <sup>43</sup>ɔtsi ɔkúá obugya de mu wulí ní dúanyɔ ní, ɔhaa mókótálí tsá mu, alayíntá mú iwísu atɔ féé ɔlo atsapú ibito bu ahá ámutɔ. <sup>44</sup>ɔtsi ánfí lótsun yɔ Yesu ɔma, pú ibi da mu tati osiebí. lnuvnu obugya amu leka itin. <sup>45</sup>Múbú Yesu léfíté ɔbéé “Ma lápú ibi da mi?”

Bréá ahá ámu féé be ɔmɔkúpú ibi da mu a, Petro léfíté Yesu ɔbéé, “Mí Wíé, ɔɔm ánfí bupu fú ánfí á, mú fúde asún ánfí fíté?”

<sup>46</sup>Táme Yesu léblí ɔbéé, “ɔku lapú ibi da mi. Nawun ání ɔɲé ku ladáli mitɔ.” <sup>47</sup>Bréá ɔtsi ámu lówun ání itɔ á múbú mabwé ámu lalin ɔwan á, ɔledali ba. ɔdekpinkí kpakpakpa, ɔleyéda akpawunu Yesu ayabito, bláa mu ahá ámu féé ansítɔ tɔá svá mɔpu ibi da mu, pú alá manyá ɔlɔtsá. <sup>48</sup>lno Yesu lébláa mu ɔbéé, “Mí bí, fú hógyi latsá fú ɔlo. Nati iwilwiiti.”

<sup>49</sup>Bréá Yesu bu mu tɔí anfisú á, ɔku lésrí tsú Yairo wóyítɔ ba bebláa Yairo ɔbéé, “Fú bí ámu ɔdikpa mɔwa alé. Mátepi trá wa osunápú tɔí.”

<sup>50</sup>Bréá Yesu lónu asún ánfí á, ɔlebláa Yairo ɔbéé, “Mánya ifú. Fú mú hogyi wule, obénya nkpa.”

<sup>51</sup>Bréá Yesu lówie wóyító unu á, ɔmeha ɔhaa obuo mu yɔ obuá kebi ámu da mútɔ́, dun Petro, Yohane, Yakobo pú kebi ámu akwúpú. <sup>52</sup>Alí bré ámutɔ́ á, ahá ámu féé budesú, bude okitikíti. Yesu lébláa amú ɔbée, “Mlusi okitikíti surá. Ɖmɔkúwú, didí ɔde.”

<sup>53</sup>Ahá ámu féé buyin ání otsibi amu lawú. Mú su bɔmɔsí Yesu. <sup>54</sup>Unu Yesu lékitá otsibi amu ibi, kpólí mu ɔbée, “Obí, kusu!” <sup>55</sup>Ɖɔ́ɔ́ é lelawíé mu, ɔɔkusu líí ɔtsáwule pé. Mú Yesu lébláa amú ɔbée, “Mludunka tɔku ha mu ogyi.” <sup>56</sup>Ɖnó lobwie otsibi amu akwúpú, táme Yesu léda amú ɔlá ɔbée, “Mlumábláa ɔhaa asún ání.”

### Akasípú Dúanyɔ́ Ámu Sumbíwa

(Mateo 10:5-15; Marko 6:7-13)

**9** <sup>1</sup>Yesu létí akasípú dúanyɔ́ ámu fia, ɔleha amú túmi, há amú ɔkpa ɔbée, buyáa \*ɔɔɔ leláhe féé, abutsa ulɔ. <sup>2</sup>Ɖɔ́ɔ́wa amú ɔbée, buyéda Bulu iwíegyi ámu ɔkan, abutsa alɔpu. <sup>3</sup>Ɖlebláa amú ɔbée, “Ní mlɔyɔ́ á, mlumátsu tɔtɔ. Mlumátsu oyi yiáhé, akpankogyo, atogyihe, kóba ntée atadi nyɔɔsi. <sup>4</sup>Wóyigyíwóyítá bɔ́hɔ mli á, mlitsia unu yófun ekeá mlédali wúlu amutɔ́. <sup>5</sup>Ní bumɔhɔ mli wúlu kusu, mlidédali mlɔyɔ́ á, mlɔkpa mli ayabitɔ́-isi wuli wúlu amutɔ́, isuna ání bumebi bwé.”

<sup>6</sup>Benatí kí nsiné unu awúlu féésú, bude asun wankláán ámu ɔkan da, tsá ulɔ.

### Herode Légyigyáa

(Mateo 14:1-12; Marko 6:14-29)

<sup>7</sup>Bréá Galilea ɔmá sú ogyípú \*Herode lónu tɔ́a ide mósú yɔ́ á, olegyigyáa. Tsúfé aku budebli beɔ, “Asú Ɖɔ́ɔ́pú Yohane lakúsú tsú afúlito.” <sup>8</sup>Aku é beɔ, “Bulu ɔnósú ɔtɔ́pú dada \*Elia lálé iwɔ ɔwan.” Aku é beɔ, “Bulu ɔnósú ɔtɔ́pú dada amutɔ́ ɔku lakúsú tsú afúlito.” <sup>9</sup>Herode lébli ɔbée, “Nahá batɔ́n Yohane. Ngya oyin ɔmɔmu iwɔ asún ntráa ndenu alí?” Mú su ɔɔɔ mbódí ání mówun Yesu.

### Ahá Mpím-nu Atogyihe Ha

(Mateo 14:13-21; Marko 6:30-44; Yohane 6:1-14)

10 Yesu \*sumbí ayɔpú amu beyinkí bá bebláa mu tʒá bayɔbwe. Ɔlekpa amú buo iwɪ, amú nkule bɔyɔ Betsaida wúluto. 11 Bréá ɔɔm amu bebi ání ɔbu unu á, begya mu ɔkpa yɔ unu. Yesu lɔhɔ amú atúu, ɔlebláa amú Bulu iwíegyi amu iwɪ asún, ɔletsa amúá budelo.

12 Bréá owí depɔɔn a, sumbí ayɔpú dúanyɔ ámu beba bebláa Yesu beɛ, “Ha amú abunati, méni bétalí yɔ awúlu ání ibu mantáa nɔfɔsú yóduká atogyihe múa ɔɔkpa, tsúfé anuméenya tɔtɔ há amú dimbí ánfɔtɔ.”

13 Táme Yesu léle mú ɔnɔ ɔbéɛ, “Mludunka atɔ ha amú abugyi.”

Akasípú amu bebláa mu beɛ, “Tʒá anɔbu féé gyí bodobodo apin anu pú ntsutso iye bwáhé anyɔ. Nkétɪ anɔlayɔhɔ atogyihe ba ahá ánfɔ féé.” 14 (Ayin ání bubu unu ɔɔbwe fé mpím-nu (5,000).)

Yesu lébláa akasípú amu ɔbéɛ, “Mliha amú abutsia okútɔ. Iku kule ibwéɛ fé ahá aduenu (50).”

15 Akasípú amu ɔɔbwe dínká músú, ɔhagyíɔha létsiá asɪ. 16 Lnu olotsu bodobodo anu pú ntsutso iye bwáhé anyɔ ámu. Lnu olotsu ansí fúá kí ɔsúsú, ɔleda Bulu ipán. Múú olebiabía mútɔ púhá akasípú amu ɔbéɛ, buyée mú ha ahá ámu féé abugyi. 17 Amu féé begyi mwe sian. Bréá akasípú amu ɔtɔsɪ isianhe amu a, ɔɔbulá alakpá dúanyɔ.

### Ɔhá Ání Yesu Gyí

(Mateo 16:13-19; Marko 8:27-29)

18 Eke ɔku Yesu nkule dé mpái bɔ, mu akasípú amu bubu unu. Múú ɔlefɔtɛ amú ɔbéɛ, “Ma ahá beɛ ngyi?”

19 Bele mú ɔnɔ beɛ, “Aku beɛ, fúgyí Asú Ɔɔɔpú Yohane. Aku beɛ, Bulu Ɔnɔsú Ɔtɔpú \*Elia. Aku é beɛ, Bulu ɔnɔsú ɔtɔpú dada ɔku lákúsú tsú afúlɔtɔ.”

20 Múú ɔlefɔtɛ amú ɔbéɛ, “Mli é mé? Mliha mígyí ma?” Petro léle mú ɔnɔ ɔbéɛ, “Fúgyí \*Kristo, (ɔhá ámuú Bulu ladá mu ofúli amu) ni.”

Luk



### Yesu Iwɔsin Pú Mu Lowu Iwi Asún Blí

(Mateo 16:20-28; Marko 8:30-9:1)

21 Iwu Yesu léda amú ɔlá kpákpáákpá ɔbée, bumábláa ɔhaa mu iwi asún ánti. 22 Ɔletrá bláa amú ɔbée, “Ilehián ánti mí, Nyankpusa-Mu-Bi ánti néhie wun iwɔsin tsɔtsɔɔtsɔ Yudafo ahande, Bulu \*igyí ahapú dehen pú Mose mbla asunápú ibito; amú fée békiná mí, há bómo mí, táme Bulu ɔbélakúsúa mi tsú afúlito eke sáásí.”

23 Iwu ɔlebláa ahá ámu ɔbée, “Ní ɔku dékléa obóbuo mi á, osíi t́á otekle bwe, otsu mu \*oyikpalíhe ekekegyíeke bobuo mi. 24 Tsúfée ní ɔku lépri mu nkpa á, ɔb́shulíu mú. Ní ɔku é lési mu nkpa há mí su é á, Bulu ɔb́sho mu nkpa. 25 Ní ɔku onyá ɔyító ató fée, táme ɔhúli mu ɔkláa a, labi mɔmu ulowa há mu? 26 Ní ɔku onyá mía mí atosunáhé péli a, mí, Nyankpusa-Mu-Bi ánti é nénya mu péli bréa nna mía mí Sí pú mu abɔpu wánkíhé numnyamto nebá. 27 Ɔnɔkwali nde mli bláa. Aku bobu mli to nfi bumóowu asa bówun Bulu iwíegyí amú.”

### Yesu Iwɔtsée

(Mateo 17:1-8; Marko 9:2-8)

28 Yesu léblí asún ánti ndawótswí ɔma a, ɔlekpa Petro mua Yohane pú Yakobo buo iwi, bɔdu yó mpái ɔbɔkpá ibu kusu. 29 Bréa ɔde mpái ámu bɔ á, mu ansító letse. Mu atadie lofulí húnánáná, ide ogyá kpa. 30-31 Iwu á, ahá abanyó ánti batsiá kɪ, bugyi Mose mua Elia bele iwi ɔwan ɔsúsú numnyamto. Amúa Yesu bɔtɔí tsú mu lowuá Bulu léhie tswi mu ánti imóowa ɔpá obówu Yerusalem iwi. 32 Petro mua mu aba ámu bedidi. Bréa bɔwan tsinkí á, bowun Yesu numnyam, ahá abanyó ámu é bulí mu wá. 33 Bréa ahá abanyó ámu budenatí á, Petro lébláa Yesu ɔbée, “Mí Wíé, ibu aléa abétsiá nfi. Ha ada abú asa. Fú klé kule, Mose klé kule, Elia é klé kule.” (Ɔmebi t́á ɔdeblí).

34 Bréa ɔde asún ánti blí á, agyinde ku lobobun amú féesú. Iwu ifu lekitá amú abasá ámu. 35 Iwu á, ɔme ku ledali tsu

agyinde amvto ɔbée, “Ōni gyí mí Bía nalé ní. Mliyaa asu amlnu mu ɔmɛ.”

36Ɔmɛ amu lótsutsúa ɔbeka tin á, ɔlasí Yesu nkule ɔnu. Akasípú amu bekpa ɔnɔ bun asún ánfisu nke ámvto. Bumebláa ɔhaa ɔtá bayówun.

### Uo Dídahe Ɔlɔpú Tsa

(Mateo 17:14-18; Marko 9:14-27)

37Mú ɔyi kehe a, Yesu mva akasípú abasá ámu bekplí tsú ɔnu ámvu, ɔɔm amu befia mu. 38Lnu amútsɔ ɔku lókpɔn ɔbée, “Osunápú, kókoli, damli kɪ mí bí ha mi. Obi yinhé ɔkule pé ogyi mí. 39Ɔɔhe laláhe ku towié mvto, ɔɔkpɔn. Ɔtedida gbla, ɔdekɔ tsikitsiki, mu ɔnɔ ɔɔwé afu. Ipiantɔ asa itesí mu, ide mu yintá. 40Nobobwií ɔpa há fú akasípú amu mbée, bugyáa mú le mvto, táme bumetalí.”

41Yesu léle mú ɔnɔ ɔbée, “Ndɛmba-abía mli má hógyi, mli tsiátɔ ma ale. Alí nétsiá mli wá, nyá klun há mli ekekegyíeke ní?”

Lnu ɔlebláa oyin ámu ɔbée, “Kpa fú bí ámu ba mu.” 42Bréa ɔlekpa kebi ámu ɔbá á, ɔɔhe laláhe amu léftɔ mu dá, ɔdekɔ tsikitsiki. Táme Yesu lókpɔn wa ɔɔhe laláhe amu, tsá kebi ámu. Lnu oleyinkía mu há mu si. 43Bulu túmi kpɔnkpɔntɔ ámu leha ɔnɔ lobwie ahá ámu féé.

### Yesu Lowu lwi Asún Blí Otse Nyɔɔsi

(Mateo 17:22-23; Marko 9:30-32)

Bréa mu bwehé ide ɔhagyíɔha wánwan wa á, Yesu lébláa mu akasípú ɔbée, 44“Mlihe yaa asu amlnu. Béle mí, Nyankpusa-Mu-Bi ánfɔ há adón bómo mí.” 45Táme akasípú amu bomonu mú asi. Bulu lópv mú asunu ɔáin amú. Mú su ɔmɔwankí amú asún áni ɔdeblí. Ifú é de amú áni béfité mu.

### Ma Ɔbɔbwe Ɔhande?

(Mateo 18:1-5; Marko 9:33-37)

46Nwéen ku léba akasípú amu nsiné, tsú amútsɔ ɔhá áni ɔbɔbwe ɔhande lwi. 47Yesu lébi amú agywun. Mú su

ɔlekpá kebi ɔku belí mu iwí wá. <sup>48</sup>Múú ɔlebláa amú ɔbéé, “Ɖhagyíɔha ání ɔlɔhɔ kebi ánfí mí dátɔ lahɔ mi. Ɖhagyíɔha ání ɔhɔ mi é lahɔ ɔhá ámúú ɔlɔwa mí ámu. Tsúfé ɔhá ání ogyi ɔtráhe mlɔtɔ féé gyí ɔdéhen.”

### **Ani Obúopu**

(Marko 9:38-40)

<sup>49</sup>Yohane lébláa Yesu ɔbéé, “Mí Wíé, anulówun oyin ɔku dépu fú dá gya ɔhe laláhe, anuléka mu tin, tsúfé ɔma anitɔ.”

<sup>50</sup>Táme Yesu lébláa amú ɔbéé, “Mlumáka mu tin! Tsúfé ɔhá ání ɔmɔkɔsú líí mlɔsu buo mlí.”

### **Samariafo Bumɔhɔ Yesu**

<sup>51</sup>Bréá nkéá Bulu obótsu Yesu ya ɔsúsú dekpukpé ba a, ɔlɔbwe agywun ání ɔbɔyɔ Yerusalem kokooko. <sup>52</sup>Ɖlɔwa abí gyankpá yɔ \*Samaria wúlu kusu ɔbéé, buyéla unu yai ha mu. <sup>53</sup>Táme bumɔhɔ mu wúlu amutɔ, tsúfé Yerusalem ɔyɔ. <sup>54</sup>Bréá mu akasípú Yakobo mua Yohane bowun ali á, befité mu bee, “Ani Wíé, fudeklé fee ahá ogyá itsu ɔsúsú bɔhɔ amú mɔ?”

<sup>55</sup>Táme Yesu lédamlí, wá iyin wá amú.<sup>f</sup> <sup>56</sup>Múú bɔpu ɔkpa yɔ wúlu bámbású a.

### **Ahá Ání Bee Bóbwe Yesu Abúopu**

(Mateo 8:18-22)

<sup>57</sup>Bréá buna ɔkpatɔ bɔyɔ á, oyin ɔku lébláa Yesu ɔbéé, “Nóbuo fu yɔ ɔtínegyíɔtínéá fɔyɔ.”

<sup>58</sup>Yesu lébláa oyin ámu ɔbéé, “Awíá bubu mbɔ, mbubwi é bubu asia, táme mí, Nyankpusa-Mu-Bi ánfí mú á, mma ɔtínéá nɔpu mí nwun tswi.”

<sup>59</sup>Yesu lébláa ɔha bambá é ɔbéé, “Bobuo mi.”

Táme oyin ámu lébláa mu ɔbéé “Owíé, ha mí anyopulá mí sí asa ambobuo fu.”

---

<sup>f</sup>9:55 Íni bu nwulú dada amu akutɔ: Ɖbéé, “Mluméyín ɔhé oduá ide mlí kpa. Tsúfé Nyankpusa-Mu-Bi ámu méba ahá ɔmɔkpá, nkpa ɔhɔkpa ɔleba.”

<sup>60</sup>Múy Yesu lébláa mu ɔbéɛ, “Si awupú<sup>g</sup> abupula amú afúli. Táme fú mú yɔ afuyeda Bulu iwíegýí ámu ɔkan.”

<sup>61</sup>Ɔku é lébláa mu ɔbéɛ, “Mí Wíé, nóbuo fu, táme ha mí anyinki yeklá mí wóyítɔ ahá asa.”

<sup>62</sup>Yesu lébláa mu ɔbéɛ, “Ɔhá ání ɔtesrí dámlí kɪ ɔma mófun ha Bulu iwíegýí ámutɔ agyómá yɔ.”

Luk

### Akasípú Aduesienɔ-nyɔ Sumbí Wa

(Mateo 10:7-16)

**10** <sup>1</sup>Ínu ɔma a, Yesu léle mu akasípú aduesienɔ-nyɔ (72)<sup>h</sup> aku é, ɔɔwa amú abanyɔ-abanyɔ ɔbéɛ bɔgyánkpa yɔ wúlugyíwúluá mu onutó móyɔ mósú. <sup>2</sup>Ɔlébláa amú ɔbéɛ, “Atɔ kpɔtíhé amu itsɔ, táme mú akpɔtípú bumɔtsɔ. Mú su mlíkòkòli ndɔ mu wie, ɔwa akpɔtípú tsɔtsɔ abɔba bɔkpɔtí mu atɔ ámu. <sup>3</sup>Mlɪnatɪ, mlɪbɪ ání nde mlɪ wa fé akúfabi ɔyɔ adúndutɔ. <sup>4</sup>Mlɪmátsu sika kente, akpankogyo ntée ntukuta kítá. Ní mlɪná ɔkpatɔ á, mlɪmálú tóntɔn ahá. <sup>5</sup>Ní mlowíé wóyígýíwóyítɔ́á a, mlɪgyankpa bla amú mlaa, ‘Bulu ɔhá mlɪ iwilwii.’ <sup>6</sup>Ní wóyí mu wie amu tekle iwilwii a, mlɪ iwilwii bésin wóyí ámuvsu. Táme ní ɔtamakle iwilwii a, íbésankí bá mlɪ wá. <sup>7</sup>Mlɪtsia wóyí ámúbú bɔhɔ mlɪ mútɔ ámutɔ. Mlɪgyi atɔ, amlɪnu tógyítɔ́á béha mlɪ, tsúfé agyómá ɔyɔpú buteká ɪkɔ. Mlɪmátu láyétsiá wóyí bámbátɔ. <sup>8</sup>Ní mlowíé wúlu kusu, bɔhɔ mlɪ á, mlɪgyi tɔ́á béha mlɪ. <sup>9</sup>Mlɪtsa alɔpu ání bubu wúlu amutɔ, amlɪbla wúlu amutɔ ahá mlaa, ‘Bulu iwíegýí lawíé wóyí tá.’ <sup>10</sup>Táme ní mlowíé wúlu kusu, bumɔhɔ mlɪ á, mlɪdalɪ yelí brɔnusu, amlɪblɪ mlaa, <sup>11</sup>‘Anidé mlɪ wúlutɔ otútúu amúbú ilawólí anɪ ayabiasɪ amu kúráá kpakpáa wulí. Táme mlɪbɪ ání Bulu iwíegýí ámu lawíé wóyí tá.’ <sup>12</sup>Nde mlɪ bláa mbéɛ, Bulu ɔbébutí wúlu amutɔ ahá ɪsu dun Sodomfɔ mu asún ogyíké amu.

<sup>g</sup> 9:60 Awupú gyí ahá ání bawú ɔhétɔ. <sup>h</sup> 10:1 Aduesienɔ-nyɔ (72): Aduesienɔ (70) bu nwulú ámu akutɔ.

**Ahá Ání Bumedamlí Klontɔ Asúngyí**  
(Mateo 11:20-24)

13“Korasinfɔ, mlɔgyɔwɪ. Betsaidafɔ, mlɔgyɔwɪ ní. Ní Tiro pú Sidon awúlu laláhe amɔɔ nɔbwe ofúla akpɔnkpɔntɪ ánfɪ nɔbwe mlɔɔ ánfɪ á, tɛkɪ buda akpekpetɔ, bakpá nsúó wá nwuntɔ púsúná ání badámlí klontɔ. 14Táme mlɔbɪ ání Bulu ɔbébutí mli ɪsu mu asún ogyíké dun Tiro múa Sidonfɔ. 15Mli Kapernaumfɔ, mludéklé mliaa mlótsu ɪwɪ fúá alu yówo ɔsúsú? Ekekekeke! Bulu ɔbéba mli asɪ yówie afúlitɔ.”

16Yesu lébláa mu akasípú amu ɔbéé, “ɔhá ání ɔho mli asún lahɔ mi. ɔhá ání olekiná mli asún ho lakíná mí asún ho. ɔhá ání olekiná mí asún ho é lakíná mí Sí ámúó ɔlɔwa mí ámu asún ho.”

**Akasípú Aduesienɔ-nyɔ Ámu Yinkí Ba**

17Akasípú aduesienɔ-nyɔ ámu beyinkí ba ansigyísú. Bebláa Yesu beé, “Anɪ Wíé, ní akplón wa \*ɔɔɔ laláhe kúráá fú dátɔ a, butobú anɪ.”

18Yesu lébláa amú ɔbéé, “Nowun ání Satan lékpa tsú ɔsúsú fé alíá nsauntɔ tɔfwí ɪbɪ beda ɔsulúɔ pɔ. 19Mlɔnu! Nahá mli túmi ání mlɔtsatsa awɔ pú nyankpɔkpíesɔ tsun, amlɔgyi ɔbunsám túmi féésú. Tɔɔɔɔ mɔɔbwe mli. 20Táme ansí mágyi mli ání ɔɔɔ laláhe labú mli. Mboún ansí igyi mli ání Bulu lawánlín mli adá tswɪ ɔsúsú.”

**Ansí Legyi Yesu**

(Mateo 11:25-27; 13:16-17)

21Alɪ bré ámɔɔ á, \*ɔɔɔ Wankíhé léha ansí lehɔe gyi Yesu. Múó ɔleblí ɔbéé, “Mí Sí, ɔsú muva asɪ Owíé! Nedá fú ɪpán ání falé tsá fɔpɔɔhín anyansapɔ pú asún abɪpú ɔwan súná ahá ání bumeyín ɔlala, bɔgyi fé nyebí. Ee, Mí Sí! Alí fudeklé fɛe ɪbá mútɔ ní.”

22Múó ɔlebláa mu akasípú amu ɔbéé, “Mí Sí lapú tógyítɔ wá mí ɪbutɔ. ɔhaa méyín ɔhá ání Obí ámu gyí, nkétɪ ɔsí ámu nkɔle. ɔhaa méyín ɔsí ámu é, nkétɪ Obí ámu, pú ɔhá ání Obí ámu latsúlá ání ɔbéle mu súná mu.”

23Bréá ɔhaa má amú wá á, ɔledamlí kɪ amú, bláa amú ɔbéé, “Mli mú á, Bulu layúlá mli, mliḍé ató ánfɪ wúun. 24Nde mli bláa mbéé, Bulu ɔnósú atóipú pú awíe tsɔtsɔtsɔ bekle ání bówun ató ánfɪ, abunu asún ánfɪ mliḍénu, táme bumenya mú alɪ.”

### Samariayin Awɔtɔlepɔ Ɔku

Luk

25Mose mbla osunápú ɔku lókusú líí fíté Yesu asún ánfɪ púsɔ mu kɪ. Ɖlefíté mu ɔbéé, “Osunápú, ntɔ mbwéé asa anya nkpa ání itamatá?”

26Yesu lébláa mu ɔbéé, “Nkálɪ Mose Mbla léblí? Nkálɪ fonu mú asɪ?”

27Oyin ámu lébláa mu ɔbéé, “Pú fú klun, fú ɔkláa, fú ɔwunlín pú fú agywun fée dwe fú Wíe Bulu, afudwe fú bá fé fú iwɪ.”

28Yesu lébláa mu ɔbéé, “Mú fablí á. Bwe mú, fénya nkpa ání itamatá.”

29Táme oyin ámu lékléá obósuná ání mú asún da ɔkpa. Mú sv ɔlefíté Yesu ɔbéé, “Ma gyí mí bá?”

30Yesu lébláa mu ɔbéé, “Bré kusv oyin ɔku lékplí tsú Yerusalem ɔyó Yeriko. Bréá ɔna ɔkpatɔ á, oleyéfia ogyo atswapú aku. Ahá ánfɪ bekpa mu tati, swíí mu ató fée, dá mu sian mu mɔ, nátí sí mu tswɪ. 31Bulu igyí ɔhapú ɔku ná ɔkpa ámu kénsú. Bréá olowun mu sísí á, ɔlebaí tsun ífúntó nátí sí mu. 32Alɪ kén Lewiyin ɔku é lóɔtɔ mu, báí tsun ífúntó nátí ní. 33Táme \*Samariayin ɔkúá ɔná ɔkpa ámusv mú léba bowotií musv. Bréá olowun oyin ámu a, ɔlɔwa mu nwe. 34Ɖlenatí yótɔ mu. Ɖletseí nta kpekplé wólí mu nɔsv, yí ofobí wá mú, klí mú, tsú mu dínká mu afrímúsú, pú mu ya afɔɔ ɔswúkpá yéki musv. 35Mú ɔyi kehe a, Samariayin amu léle sika futútú anyɔ há afɔɔ ɔswúkpá inusu ɔkípu ɔbéé, ‘Kɪ musv ha mɪ. Ní feyintá tɔku tsía a, neyínkí néka fú.’ ”

36Yesu lómɔ mú ɔnɔ ɔbéé, “Fú atɔ kihetɔ á, ahá abasá ánfɪtɔ ɔmɔmu gyí oyin ámúbú olefia ogyo atswapú ámu mu ba?”

37Mose mbla osunápú amu lébláa mu ɔbéé, “Oyin ámúbú olowun mu nwe ámu.” Yesu lébláa mu ɔbéé, “Múmú yɔ afuyɔbwe mú odu.”

### Marta Mva Maria Wá Yo

<sup>38</sup>Bréá Yesu mva mu akasípú buna ɔkpatɔ boyɔ Yerusalem a, bowie wúlu kusu. Ɖtsi ɔkúá butetí mu Marta lɔho mu ɔfɔ, ɔlekpa mu ya mu wóyítɔ. <sup>39</sup>Mu pio tshé gyí \*Maria. Maria anfi lébetsiá Yesu ayabiasɩ, ɔde mu atosunáhé nu. <sup>40</sup>Marta nkule dédamlí tsun mútɔ, alíá íbɔbwe ɔbɔbwe amú afɔɔtɔ. Uɔɔɔn mu. Múú ɔlenatí yɔ Yesu wá, yéfité mu ɔbéé, “Mí Wíé, fawun ání mí píó lasí agyómá ámu fée tswi mi nkulesu? Bla mu ɔbetsa mí.”

<sup>41</sup>Yesu lébláa mu ɔbéé, “Óo Marta, Marta! Fude fú iwí háan ntobí tsɔtsɔtsɔ iwí. <sup>42</sup>Toku kule pé déhián, Maria lalé múá íbu alé dun. Ɖhaa méetalí swíí mu.”

### Mpáíbo Iwí Atosunáhé

(Mateo 6:9-13; 7:7-11)

**11** <sup>1</sup>Eke ɔku Yesu bu ɔtineku ɔde mpái bo. Bréá ɔbo mpái ámu tá á, mu akasípú amuto ɔkule lébláa mu ɔbéé, “Mí Wíé, suna anu mpái bo fé alíá Asú Ɖɔɔpú Yohane lósuná mu akasípú.”

<sup>2</sup>Yesu lébláa amú ɔbéé, “Ní mlɔbo mpái á, mlibo mú alí.

‘Ani Sí,

ahá bubúu fú dá.

Ba begyi \*iwíe.

<sup>3</sup> Ha anu atogyiheá íbɔfun anu ekekegyíeke.

<sup>4</sup> Si anu lakpan kie anu,

fé alíá anutesíkíe ahá ání butɔpú ulá gyi anu.

Mákpa anu wá ísókito.’ ”

<sup>5</sup>Iwo ɔlebláa amú ɔbéé, “Ní mlɔto ɔku bu onyawíe a, ɔbɔkusú yɔ mu wá ɔyínsiné yébláa mu ɔbéé, ‘Mí nyáwíe, pan mi bodobodo apin asa. <sup>6</sup>Mí nyáwíe ɔku labɔswí mí sésééséi. Mma tɔtɔá néha mu obégyi.’

<sup>7</sup>“Mu nyawíe amu ɔbébláa mu sísí ɔbéé, ‘Máwa mí tɔí. Mía mí abí anuladí. Nafin obu, mméetalí kúsú beha fú tɔtɔ.’

<sup>8</sup>Nde mli bláa mbéé, fíalí onyawíe ɔkpasu á, ɔmɔɔkusú há

mu. Táme alíá ɔde mu kokóli kótóó su á, ɔbókusú há mu alíá odeklé.

9“Mú su nde mli bláa mbée, mlikvli Bulu, ɔbéha mli. Mludunka, mlówun. Mlida mu klunsu, obéfinkí mú há mli. 10Tsúfé ɔhá ání ɔtɔkúlí ató tenyá. ɔhá ání otodúnká ató towun. ɔhá ání ɔtedá klunsu bútefinkí há. 11Ɔsí ɔmɔmu bu unu, mu bi ɔkúlí mu iye a, ɔbékitá iwɔ wá mu ibitɔ? 12Ntée ní ɔkúlí mu bɔnɔ a, ɔbékitá nyankpukpíe wá mu ibitɔ? 13Mli lakpan abwepú kóráá mliyin alíá butɔpú atɔ wankláán há mli abí. Ntogyi sú mli Sí ámúbú ɔbu ɔsúsú ámu mú mɔɔpu Ɔɔɔ Wankíhé há ahá ání bude mu kulí?”

### Yesu Mva Beelsebul

(Mateo 12:22-30; Marko 3:20-27)

14Yesu légya ɔɔe laláhe lé oyin ɔkuá alató omúmutɔ. Bréá ɔɔe laláhe amu lédali a, oyin ámu lówa tɔí bi. Mú su ɔnó lobwie ɔɔm amu. 15Táme amútó aku beblí beɔ, “Ɔɔe laláhe owíe \*Beelsebul túmi ɔdeɔgya ɔɔe laláhe lé ahátɔ.”

16Amútó aku é bekleá bɔsɔ Yesu ki. Mú su bebláa mu beɔ, ɔbwée osúna pusuna ání lélé otsú Bulu wá. 17Táme Yesu lébi amú agywun. Mú su ɔlebláa amú ɔbéɔ, “Iwíe ogyíkpa ání ɔlaye anyɔ, bude aba kɔ tedida. Wóyí oduá mótó atsiápú bude aba kɔ é tobwíé. 18Ní \*Satan iwíe ogyíkpa labóí anyɔ, bude aba kɔ á, mu iwíegyí bédida. Táme mlidéblí mliaa, Beelsebul dátó nde ɔɔe laláhe gyáa le ahátɔ. 19Ní Beelsebul túmi ndeɔgya ɔɔe laláhe lé ahátɔ á, múmú ma túmi mli abí é budeɔgya ɔɔe laláhe lé ahátɔ? Mli abí ámu onutó obégyi mli asún. 20Táme íniá Bulu túmi ndeɔgya ɔɔe laláhe su á, mli bi ání Bulu iwíegyí ámu laba mli wá dodo.

21“Tsúfé ní ɔwunlínɔpú bu akɔtɔ, ɔde mu wóyí gyo a, mu tɔtɔ tamafwí. 22Táme ní ɔhá ání ɔbu ɔwunlín dun mu ɔbá begyi musu á, ɔtɔswíí mu mu akɔtɔ ámúbú mu ansí dun músú ámu, yée mu atóá olenya étó.

23“Ɔhá ání omobuo mi dé mí lu. Ɔhá ání ɔmedé mí tsa akpa ahá ba Bulu é dé amú gyáa teía mi.



**Ɔɛ Laláhe Yinkí Ba Ɔhato***(Mateo 12:43-45)*

24“Ní Ɔɛ laláhe idáli Ɔhato á, iteyéki dimbísú dúnká otsiákpá, táme utamanyá. Inu uteblí ání ibéyinkí yó mú wóyí dadato. 25Ní usánkí yó á, itowun ání baféí mótó, lá mótó wankláán. 26Iteyínkí yékpá mú aba asienó ání butɔbwé lalahé dun mu, buteba betsiá unu. Inu ɔhá ámu tsiátó teyíntá dun alíá igyi yáí.”

**Oyúla Onutó**

27Bréá Yesu dé asún ánífí blí á, ɔtsi ɔku bu ɔɔm amuto. Ɔtsi ámu lótsu ɔme fúá blí ɔbéé, “Bulu layúla opúni amúbú fedí mótó pú nyópu amúbú fɔnyɔpú ámu.”

28Táme Yesu lébláa mu ɔbéé, “Ahá ání butonú Bulu asún, gyí músú mboún Bulu layúla!”

**Bodunká Ofúla***(Mateo 12:38-42)*

29Bréá ɔɔm amu bu demoní tsíá a, Yesu léblí ɔbéé, “Ndemba-abí laláhe, mlidé osúna dúnká amliwun, táme mlumóowun kukukuku dun Bulu ɔnósú ɔɔípú \*Yona osúna amu. 30Tsúfé alí amúbú Yona lóbwe osúna há Niniwefɔ ámu a, alí mí, Nyankpusa-Mu-Bi ánífí é nóbwe osúna há ndemba-abí ní. 31Seba owíe tshé ɔbókusú líí Bulu asún ogyíké, há mli ndemba-abí ánífí ipón. Tsúfé olotsu ɔsaasí ɔmá kutɔ kéín gya ɔkpa ba, bonu \*Salomo nyánsa atosunáhé. Mlíki, ɔhá ání ɔdun Salomo líí nfi á. 32Niniwefɔ é bókusú líí Bulu asún ogyíké amu, há mli ndemba-abí ánífí ipón. Tsúfé bréá Yona léda Bulu asún ɔkan súná amú á, bedamlí klɔntɔ ba Bulu wá. Mlíki, ɔhá ání ɔdun Yona onutó líí nfi á.”

**Nyankpusa-oyí Ɔkandíe***(Mateo 5:15; 6:22-23)*

33“Ɔhaa tamanywé ɔkandíe púnjáín, ntéé pú ɔlɔ bun músú. Ɔfuákpá ɔɔpúbian, méni ubówankí há ahá ání béba wóyí

ámuto. <sup>34</sup>Fú ansíbi igyi ɔkandíe há fú nyankpusa-oyí. Ní fú ansíbi bu alá á, fú nyankpusa-oyí ámu fée bówankí. Táme ní fú ansíbi ma alá a, fú nyankpusa-oyí ámu fée ibóklun. <sup>35</sup>Mú su mlíki ání wanki onutó bú mlíto, megyí oklún. <sup>36</sup>Ní fú nyankpusa-oyí ámu lówankí, oklún ma ɔtinetine a, fú iwí fée bówankí fé alá ɔkandíe towánkí wólí fúsú.”

### Mose Mbla Asunápú Pú Farisifo Tsiátó

(Mateo 23:1-36; Marko 12:38-40)

<sup>37</sup>Bréá Yesu lótoí tá á, Farisiyin ɔku léti mu ató ogyíkpa mu wóyító. Mú su Yesu lóyo yétsiá ɔpúnú ámu asi. <sup>38</sup>Uowa Farisiyin amu wánwan ání Yesu mófwi ibi púgyúra iwí asa ɔde ató ámu gyí. <sup>39</sup>Íni su Yesu lébláa mu ɔbéé, “Mli \*Farisifo mlítofwí mli nwe pú mli ablanwé wankláán, táme ɔnsípe mba owuntɔlun sósón lábúlá mli. <sup>40</sup>Mli aha mimláhe, megyí mótó mba mú ɔma fée Bulu lóbwe? <sup>41</sup>Mlípú mli atonyahé ámu ha ahíánfo, tógyító \*iwí bétin ha mli.

<sup>42</sup>“Farisifo, mligyowí ní! Mluteye mli ɔtsutsú pú kpántánkplámá aná féeótó idú, pú \*idúsí amu há Bulu. Táme mlimédé Bulu mbla ámuó ihíe dehián, igyi asúngyí ɔɔkwalisu pú Buludwe ámusu gyí. Múdéhián ni, táme mlimákiná iyéto dúsí amu é ha.

<sup>43</sup>“Farisifo, mligyowí ní! Mlutekle otsiákpá yílé tsiá Yudafó \*ofiákpa. Mlutekle mlíaa, ahá bubún ha mli itsiá dunsu. <sup>44</sup>Mligyowí ní! Mlilabwé fé ntsán ání bumehie mú nsu<sup>i</sup>, ahá butotsun músú bumeyín ání ntsán igyi.”

<sup>45</sup>Mose mbla asunápú amuto ɔkule lébláa Yesu ɔbéé, “Osunápú, ní feblí alí á, fasiá aní é o.”

<sup>46</sup>Yesu léblí ɔbéé, “Mose mbla asunápú, mli é mligyowí ní! Tsúfé mlítópú ató dwindwín súra ahá, táme mlítamapú osrebi ɔkule kúráá tsá amú surá. <sup>47</sup>Mligyowí ní! Tsúfé mlítópwé Bulu ɔnósú atóipú amúó mli anáin bɔmɔ ámu ntsán wankláán. <sup>48</sup>Íni désuná ání mlilatsúlá dínká mli

<sup>i</sup>11:44 Yudafó amándíe ɔnó á, ní fetá ntsánsú a, ifin lada fu. Mú su butekpa mú afá futútú, púhíe mú nsu.

anáin bwehé ámusu ní. Tsúfé mli anáin bɔmɔ amú, mli é mliɔlɔpwe amú ntsán. <sup>49</sup>Mú su Bulu lópu mu nyánsa blí ɔbéé, ‘Nówa mí ɔnɔsú atɔ́pú pú mí \*sumbí ayɔpú amú́t. Bómɔ aku, dínká aku ésú.’ <sup>50</sup>Bulu ɔbéfité mli ndemba-abí ánfí mu ɔnɔsú atɔ́pú ámu obugya amú́ ulɔwulí así tsú bréá ɔyí lelin ɔpá ámu. <sup>51</sup>Ɖbéfité tsú \*Habel obugyasu alu ɔɔfun Sakaria klésv. Mu bɔmɔ \*afɔɔɔie-asubwi múa Bulu ɔtswékpa amu nsuné ní. Ee! Nde mli bláa mbéé, Bulu ɔbéfité mú tsú mli ndemba-abí ánfí wá.

<sup>52</sup>“Mose mbla asunápú, mliɔyɔwí ní! Tsúfé mliɔde asúnbi sáafi amu. Mluméfínkí wíé, mliɔméhá ahá ɔkpa é abuwie.”

<sup>53</sup>Bréá Yesu lénatí unu ɔyó á, Mose mbla asunápú pú Farisifɔ ámu ɔɔpu mu unu ɔbló, yó buɔe mu asún tsɔtsɔɔtsɔ fité púfíni mu yibi, <sup>54</sup>ki beé bénya mu ɔnɔtɔ asvanku púkítá mu.

### Apinabwebíwwe unu Ɖláda

(Mateo 10:26-27)

**12** <sup>1</sup>Igyi alí, bréá ahá mpím-mpím beba befia unu, buɔe aba ayabiasí tsatsáa a, Yesu légyankpá dá mu akasípú amu ɔlá ɔbéé, “Mlíki wankláán Farisifɔ Bodobodotu-afású,<sup>1</sup> tsúfé apinabwebí abwepú bugyi. <sup>2</sup>Tɔtɔ má unuá babun ató músv ání bumóobwíí músv. Tógyítɔ é ma unuá ileɔaín ání uméelin ɔwan. <sup>3</sup>Béda asún ání mliɔléblí nklobítɔ ɔkan. Kugyíkúá igyi, unuá bóbon.

### Ɖhá Ání Abénya Ifú

(Mateo 10:28-31)

<sup>4</sup>“Apíó aba, nde mli bláa mbéé, mliɔmánya nyankpusa ifú. Ɖbétalí mɔ mli ɔyulúv, táme ɔméetalí bwé mli tɔtɔ mɔ ɔma. <sup>5</sup>Nósuná mli ɔhá ání mliɔnyá ifú. Mogyí Bulu. Mu ɔmɔ mli ɔma a, ɔbu túmi tswí mli ɔkláa é wá usubutí ogyá ání utamaduntɔ. Ee! Mu mliɔnyá ifú ní!

<sup>1</sup>12:1 Farisifɔ Bodobodotu-afá gyí amú afunu atosunáhé. Kí Mateo 16:12.

6“Afɔnɔ butɔkuku fe akɛnsire anu kɛkɛ? Megyɔ kɔba ana? Amɔ kɔrɔɔ ɔ, Bulu tamatan ɔkukusu, 7mɛnu beɛ mɔlɔ Bulu yin mɔlɔ nwunsv imi kɔrɔɔ klɔtɔ. Mɔ sv mɔmɔnya ifɔ. Mɔlɔv ibiɔ dun akɛnsire tsɔtsɔtsɔ!”

### Adɔnsɛgyɔ Pɔ Asɔnkinɔ

(Mateo 10:32-33; 12:32; 10:19-20)

Luk

8“Nde mɔlɔ blɔɔ mbɛɛ, nɔ ɔku lɛtalɔ gyi mɔlɔ wɔ adɔnsɛ ahɔtɔ ɔ, mɔlɔ, Nyankpusa-Mu-Bi ɔnɔ ɛ nɛgyi mɔlɔ wɔ adɔnsɛ Bulu-abɔpɔ ansɔtɔ. 9Tɔme nɔ ɔku lɛkinɔ mɔlɔ ahɔtɔ ɔ, mɔlɔ ɛ nɛkinɔ mɔlɔ Bulu-abɔpɔ ansɔtɔ.

10“Dhagyɔha ɔnɔ ɔleblɔ mɔlɔ, Nyankpusa-Mu-Bi ɔnɔ wɔ asv lalɔhe a, Bulu ɔbetalɔ sikie mɔlɔ. Tɔme nɔ ɔku lɛblɔ Dɔhe Wankihe amv wɔ abususu a, Bulu mɛesikie nde, omɛesikie mɔlɔ ɔke.

11“Nɔl bekpɔ mɔlɔ ya Yudaɔ \*offakpa, ntɛɛ ɔmɔsɔ agyɔpɔ pɔ awie ansɔtɔ ɔ, mɔlɔmɔgywɔn asɔn ɔnɔ mɔleblɔ pɔkɔ wɔlɔ lɛ ntɛɛ alɔ mɔlele mɔlɔ ɔnɔ. 12Tsufɛ Dɔhe Wankihe amv obɔsunɔ mɔlɔ alɔ mɔleblɔ alɔ brɛ ɔmɔtɔ.”

### Osikani Mimlɔhe ɔku wɔlɔ Yɛbi

13Dɔɔm amɔtɔ ɔku lɛblɔɔ Yesu ɔbɛɛ, “Osunɔpɔ, bla mɔlɔ dɛhen, ɔha mɔlɔ mɔnɔyɔ aye atɔɔ anɔl sɔlɔ lɛsi yɔl anɔtɔ.”

14Tɔme Yesu lɛfitɛ mɔlɔ ɔbɛɛ, “Agya, ma lɛyɔl mɔlɔ asɔn ogyɔpɔ ntɛɛ atɔtɔ oyɛpɔ hɔ mɔlɔ?” 15Mɔlɔ ɔleblɔɔ ahɔ ɔmɔlɔ fɛɛ ɔbɛɛ, “Mɔlɔkɔ wanklɔɔn ɔnsɔpɛwasv, tsufɛ nyankpusa nkpa uma atonyahɛ tsɔtsɔtsɔtɔ.”

16Lɔv ɔleha amɔlɔ yɛbi ɔbɛɛ, “Osikani ɔku ndɔtɔ atɔl lɛhɛ wɔlɔ alɛ ofi ɔku. 17Mɔlɔ ɔlefitɛ mɔlɔ wɔlɔ ɔbɛɛ, ‘Nkɔlɔ nɔbwe mɔlɔ atɔl-abɔ? Mma ɔtɔnɛɔ nɔpɔyɔl.’ 18Lɔv ɔleblɔ ɔbɛɛ, ‘Nyin tɔɔ nɔbwe. Nɔbwe mɔlɔ idan, lɔwɔ akpɔnkpɔntɔ. Mɔlɔtɔ nɔpɔ mɔlɔ atɔkɔ pɔ mɔlɔ ntɔbɔl ɔmɔlɔ wɔlɔ nɔl. 19Fɔwun nablɔɔ mɔlɔ ɔklɔɔ mbɛɛ, ‘Mɔlɔ ɔklɔɔ, ɔklɔn idɔl fɔlɔ asɔ. Ki, fɔlɔv atɔl tsɔtsɔtsɔtɔɔ idɔl ha fɔlɔ nɔl-nɔl. Gyi, afɔnu, ansɔl igyi fɔlɔ.’ 20Lɔv Bulu lɛblɔɔ mɔlɔ ɔbɛɛ, ‘Dɔha mimlɔhe! Onyɛnu nde fɔlɔ ɔklɔɔ hɔɔ lɛ fɔlɔl ibɔtɔ. Ma obɛgyi atɔl ɔnɔl fakle yɔlɔ ɔnɔl fɛɛ?’ ”

<sup>21</sup>Yesu lómw mú wón wóéé, “Alí wóbwé wá ání olekle ató yáí há mu wí wówólúw anfíw, táme wma tótó Bulu wá ní.”

### **Ansí Pwóínká Bulusu**

*(Mateo 6:25-34)*

<sup>22</sup>Ínu Yesu lébláa mu akasípú wóéé, “Mú su nde mli bláa mbéé, mímáhan wí tóá mlégyi, tóá mlónu pú tóá mlédúdá w. <sup>23</sup>Nyankpusa nkpa dehián dun atogyihe. Mu wówólúw é idun ató dúdáhé. <sup>24</sup>Mlíki aklankpa. Butamadú, butamaséti wá idantó. Buma idan ntée ifa, táme Bulu tehá amú atogyihe. Mímá labi dun mbubwi? <sup>25</sup>Mlíw ma wóétalí han wí pú bré kpalobí tsía mu nketó? <sup>26</sup>Ní míméetalí bwé útó tókúrííbi ánfí kúráá á, ntogyi sù mlidé wí háan tráhe amúw? <sup>27</sup>Mlíki alá pututó-oyí ntwítswú tedan. Ítamayó agyómá ntée lú atati. Táme nde mli bláa mbéé, Owíe \*Salomo, mu inya féétó a, wmetalí híhie wí wá akíle fé oyí ntwítswú anfító kúku. <sup>28</sup>Ní Bulu dé ifá ání nde ulí, wke ulawú, bawá mú ogyá tati dúdá á, wméetalí dúdá mli atati dun mú? Ntogyi sù mli hógýi mótó alí?

<sup>29</sup>“Mú su mímágywún tóá mlégyi ntée tóá mlónu wí, íha mli ansí ípe. <sup>30</sup>Tsúfé íni aná wma-wma butesrí gya ni. Mli Sí ámu yin ání ide mli hián. <sup>31</sup>Ítóá mlgyánkpa dunka gyí Bulu iwíegyí, Bulu wówólúw íni tsía mútó há mli.

### **Atonyahé Puyáí Wówólúw**

*(Mateo 6:19-21)*

<sup>32</sup>“Wpasua tókúrííbi, mímánýa ífú. Tsúfé íbu mli Sí ámu wdwé ání wówólúw iwíe ogyíkpá amú há mli. <sup>33</sup>Mlífe mli wíwów ató, amlípu kóba amú kie ahá ání buma tótó. Mlíbun akenteá íméeyintá ha mli wí. Múgyí, mliyat mli siadié wówólúw. Ínu mú á, kúku méedalí mútó, tsúfé awíkplu buma ínu, atéple é butamawí ató ínu. <sup>34</sup>Tsúfé wówólúw fú siadié bu a, unú fú agywun tetsía.

### **Asúmpúá Butogyo**

<sup>35</sup>“Mlíwa atadié, amlínywe mli nkandíe. <sup>36</sup>Mlíbwé wíwów fú asúmpúá bude amú wíe wkpá kí, obótsu wká otsiákpá

ba. Fékú ní ɔbá beda klunsv á, békí há mu. <sup>37</sup>Ansí bégyi asúmpú oduá amú wíe ɔbéba ɔtu amú butsie bugyo mu. Ɖɔɔkwali nde mli bláa. Amú wíe amu ɔbésabáa tati, há amú bétisiá ɔpónúasi, mu onutó ɔbókɔnkí atogyihe amu há amú. <sup>38</sup>Ansí bégyi amú, ní ɔbá ɔtu amú butsie bugyo mu, ɔyínsiné ntée bake. <sup>39</sup>Táme mlinu asún ánti. Ní wóyí mu wie yin bréa owikplu ɔbéba mu wóyító a, tɛki omesi wóyí ámu tswi, owikplu móbwie wíe wí mu ató. <sup>40</sup>Mli é mligyo, tsúfé mí, Nyankpusa-Mu-Bi ánti néba bréa mli ansí medín mísú.”

### Osúmpú Wankláán Pú Ɖlaláhe

(Mateo 24:45-51)

<sup>41</sup>Petro léfité mu ɔbé, “Ani nkule fude yébi anfi ha lóó, ntée ania ahá ánti féé?”

<sup>42</sup>Yesu lébli ɔbé, “Ma mæ gyí osúmpúá ɔletun ansí, ɔbu ɔɔkwali? Mu ibito mu wie ɔpú mu aba atráhe wá, ɔbé ɔhá amú atogyihe dunka brésú. <sup>43</sup>Ansí bégyi osúmpú amu ní mu wie amu ɔbá bowun ání lélé ɔde mú bwe. <sup>44</sup>Ɖɔɔkwali nde mli bláa. Mu wie amu ɔbópu mu ató féé wá mu ibito. <sup>45</sup>Táme ní osúmpú amu lébli wá nwuntó ɔbé, ‘Mí wíe ibábi mɔkúfun, ɔbówa ɔpá.’ Inu su olefi asi ɔde mu aba asúmpú atsi múa ayin da, ɔde ató gyí si amú, ɔde ntá núu bu á, <sup>46</sup>mu wie amu ɔbéba bofwie mutó ekeá ɔmedín ansí. Mu wie amu ɔbéhie títi mutó, trá butí mva ahá ání ɔmɔɔɔ mu gyi isu kékéé.

<sup>47</sup>“Osúmpú oduá oyin tóá igyi mu wie apé, táme ɔmela wu bwé yái á, mu wie ɔbéhie pítí mu ató wankláán. <sup>48</sup>Táme osúmpúá omeyín mu wie apé, ɔɔbwe tóá ilehián ha ató putí á, mu wie ɔbéputí mu kpalobí. Bulu tefíté tsɔtsɔ tsú ɔhá ání ɔleha mu tsɔtsɔ wá, ɔtefíté tsɔtsɔtsɔ é tsú ɔhá ání ɔleha tsɔtsɔtsɔ wá.

### Ipián Yesu Lópuba, Megyí Iwilwii

(Mateo 10:34-36)

<sup>49</sup>“Ogyá ɔɔɔákpa néba ɔsulúv anfitsu. Ní mí nkule su mó á, tɛki idetsíí dodoodo. <sup>50</sup>\*Asúɔ ku ida misvá bóbo mí.

Mí klvn méedi mí asi yófun bréá ilamó onó. <sup>51</sup>Imábwe mli fé iwilwii nɔɔɔba ɔsulúv anfisv. Megyí iwilwii, ahá nsiné yintá nɔɔɔba. <sup>52</sup>Tsúfé tsú séi púya a, wóyí ání ahá abanú bubu mótó á, abasá bókusú líí abanyósú. Abanyó é bókusú líí abasású. <sup>53</sup>Abi yinhé múa amú asi nsiné béyintá. Abi tshé múa amú ayín é nsiné béyintá. Osia tshé múa mv sia tsíhé nsiné é béyintá.”

### Brétó Asún Asnu

(Mateo 16:2-3)

<sup>54</sup>Yesu létrá bláa ahá ámu ɔbée, “Ní nyankpu obílá busv á, mlteblí mliaa, nde nyankpu obótswie, lélé ototswie. <sup>55</sup>Ní nsainto itsú fúá á, mlteblí mliaa, nde owí ɔbélun, lélé utelun. <sup>56</sup>Apinabwebí abwepú! Mliyin alíá butelé ɔsulúsv pú nwlótáasu ató asi. Ntogyi sú mlimétálí nú utó ánfí ɔdebá séi ánfí mó asi?

### Anyabá Nsunéla

(Mateo 5:25-26)

<sup>57</sup>“Ntogyi sú mlutamatalí gyí asún wankláán há mli ɔwí? <sup>58</sup>Ní ɔkv ɔsáma fv á, wa ɔsa ha amlíblí mú wóyító, méni fú onyabá mɔɔpu fú ya asún ogyíkpa. Fówun asún ogyípú méegyí fú asún, pú fú wá prósiyin íbutó, ɔwa fú obu. <sup>59</sup>Ní megyí alí á, mméemlé fú, nkétí faká tógyító tá asa fédalí unv.”

### Mlɔdamli Uklvntó, Méni Mlimóowu

**13** <sup>1</sup>Ahá ámúv bubu unv alí bré ámutó aku bebláa Yesu bée, Pilato lamó Galileafó aku bréá bude afódié bɔ há Bulu, Yerusalem \*Bulu ɔtswékpa unv, há obugya lada afódié ámu. <sup>2</sup>Yesu léfuté amú ɔbée, “Mlíki mliaa, Galileafó ánfí bugyi lakpan abwepú dun Galileafó atráhe, sú bowun ɔwɔsin ánfí odu? <sup>3</sup>Nde mli bláa mbée, megyí alí ígyi! Ní mli é mlimédamli klvntó á, mli féé mlówu fé amú. <sup>4</sup>Ntée ahá dúkwe ámúv abansúrv lobwie dá mó Siloam ɔmanti ání íbu Yerusalemto ámu mé, mlíki mliaa, lakpan abwepú

bugyi dun aha atráhe ání betsiá Yerusalem alí bré ámutɔ féé? <sup>5</sup>Nde mli bláa mbée, megyí alí ígyi. Ní mlumédamlí kluntɔ á, mli é mlówu fé amú.”

### Pɔntɔ Máswíéhé

<sup>6</sup>Múú ɔleha amú yébi ɔbé, “Oyin ɔku lótswie pɔntɔ mu ndɔtɔ. Eke ɔku ɔɔyɔ yéki be, abí ku idun mútɔ. ɔɔyɔ á, kuku medín mútɔ. <sup>7</sup>Íni su ɔlebláa mu ɔpayin ɔbé, ‘Nfinsa ní, nna oyí ánfɔ asi. Mmɔkówun kukuuku mútɔ. Ntogyi sù íbétrá lú yíntá ɔsulúv? Kun mú da!’ <sup>8</sup>Táme ɔpayin amu lébláa mu ɔbé, ‘Mí wíé, fú mú si mú itra lu ofi ɔkule, ampulipuli mú asi, kpa wúna wa mú asi. <sup>9</sup>Ní offéba iloswie á, ibu alé, táme ní imoswie á, nakun mú dá.’ ”

### ɔtsi ɔku ɔlɔ Tsa ɔkpúnú ɔdaké

<sup>10</sup>Yesu lóyɔ ɔde atɔ suná Yudafo offiakpa \*ɔkpúnú ɔdaké ɔku. <sup>11</sup>ɔtsi ɔkúv ɔhe laláhe lówa mu ɔlɔ nfí dúkwe ní, ilahá mu alaklo, ɔmetálí bwíí nátí bu unu. <sup>12</sup>Bréá Yesu lówun mu á, ɔletɔ mu bláa mu ɔbé, “Ani yín, iwɔ iwá fú ɔnlɔn!”

<sup>13</sup>Ínu ɔɔpɔ ɔlɔ ɔtsi ámu. Ínunu olotswíí lí kánfú Bulu.

<sup>14</sup>Offiakpa ɔhande amu lénya ɔblɔ ání Yesu latsá ɔha ɔkpúnú ɔdaké. Mú su ɔlebláa ahá ámu ɔbé, “Nkensíe bu unu há agyómá yɔ. Mlíba nke ámutɔ, abutsa mli ɔlɔ. Megyí ɔkpúnú ɔdaké!”

<sup>15</sup>Ani Wíe Yesu léle mɔ ɔnɔ ɔbé, “Apinabwebí abwepú! Mlíto okugyíɔku tɔwɔ́í mu nnantswie ntée afrímú lé íbantɔ, pú amú ya ntsu onúkpa ɔkpúnú ɔdaké.

<sup>16</sup>Mú ima aléá mí mú nésankí

*ɔtsiá alaklo, ɔmetálí bwíí nátí. (Luka 13:11)*



\*Abraham mu na ánfí Ɖbunsám lakíklí mu nńí dúkwe kéké ánfí ɔkpónú ɔdaké?” 17Mu asun blíhé anfi léha péli lékutá mu alupú ámu, ansí légyi atráhe amu féé, ofúla kpɔnkpɔntu ámúú ɔdebwe ámu su.

### Takyí-akpin Ibí Yébi

(Mateo 13:31-32; Marko 4:30-32)

18Inu Yesu léfuté ɔbéé, “Nto Bulu iwíegyí ámu lɛlian? Ntée nto nɔ́pukápú mu? 19Igyi fé takyí-akpin ibí, oyin ɔku lódu wá mu ndɔ́tɔ. Uɛdan mlí oyi yilé, mbubwi butogyónká mú abámbitɔ.”

### Bodobodotu-afá Yébi

(Mateo 13:33)

20Yesu létrá blí ɔbéé, “Nto mpúkarpɔ Bulu iwíegyí ámu? 21Igyi fé Bodobodotu-afá ání ɔtsi ɔku lóputsiá bodobodo nfúó kente kule, ɛleha mú ilotu.”

### Obu-ɔnɔ́ Kplánhe

(Mateo 7:13-14, 21-23)

22Bréá Yesu ɔyɔ́ Yerusalem a, ɔlotsun nkudasi pú awúlusu. Ɖna ɔde amú atɔ́ suná. 23Ɖha ɔku léfuté mu ɔbéé, “Owíé, ahá kpalobí ku obénya nkpa?”

Yesu lébláa ahá ámu ɔbéé, 24“Mlɛɔ́ mbódí amlɛtsun obu-ɔnɔ́ kplánhe amutɔ. Tsúfé ahá tsɔtsɔɔtsɔ́ bɔ́ɔ́ mbódí ání bótsun wie unu, táme buméetalí. 25Táme ní wóyí mu wie ɔkúsú fin obu ámu, mlebá belí klun ɔma, dá klun amusu mlaaa, ‘Owíé, finki ha aní!’ á, ɔbébláa mlí ɔbéé, ‘Mmeyín mlí, mmeyín ɔtínéá mlotsú.’ 26Inú mléblí mlaaa, ‘Ania funyo létsiá gyi atɔ́, nú ntá, fetsiá suná atɔ́ aní dɛnsu!’ 27Táme ɔbéle mú ɔnɔ́ ɔbéé, ‘Mmeyín mlí. Mmeyín ɔtínéá mlotsú. Mlɛnatɔ́ tɛi mísú, mlí lalahe abwepú féé!’ 28Ní mlowun \*Abraham, \*Isak, \*Yakob pú Bulu ɔnɔ́sú atɔ́pú amu féé bubu Bulu iwíé ogyíkpá, táme bumeha mlí mú ɔkpa amlɛwie unu á, unú mlósu kpisií ní. 29Ahá bótsu owí ɔdalíkpa pú owí ɔkplíwíékpá, bunasu múa gyoɔ́pɛsu ba betsiá atɔ́ ogyíkpá Bulu

iwíegýí ámuṭo. <sup>30</sup>Ɖnɔkwali, amapu aku bémlí agyankpawu. Agyankpawu aku é bémlí amapu.”

### Yesu Lósú Ha Yerusalem

(Mateo 23:37-39)

<sup>31</sup>Ɔnu Farisifo aku beba Yesu wá bebláa mu beɛ, “Dali Galilea ɔmátó nfi, tsúfé ɔmású ogyípu \*Herode dékléá ɔbómɔ fú.”

<sup>32</sup>Yesu lébláa amú ɔbéɛ, “Mliyebláa ɔkpataku ámu mliaa, ‘Négya ɔɛ laláhe lé ahátɔ, tsá ahá ɔɔ nde, gya le ɔke, mó mú ɔnɔ klái.’ <sup>33</sup>Táme ilehián ání nɔyɔ mí ɔnátí amusu nde, ɔke múa klái. Tsúfé ɔkpa má uná bómɔ Bulu ɔnósú ɔtɔípu ɔkuku ɔtunetune, dun Yerusalem!

<sup>34</sup>“Óo Yerusalemfɔ, Yerusalemfɔ! Mlitómó Bulu ɔnósú atɔípu, dá abí ání Bulu lawá sísí mli abwi mó ní. Ntekleá nóbun mli abísú brégyíbré, fé alíá bate tobun mu abísú, táme mlitamahá mí ɔkpa. <sup>35</sup>Mliki, Bulu obési mli ɔtswékpa tswi mli. Nde mli bláa mbéɛ, mli méetrá wun mi ekekekeke, yófun ekeá mléblí mliaa, ‘Bulu oyúla ɔhá ámú ɔbá mu dátó ámu.’”

### Ɖɔpu Ɖku Tsa

**14** <sup>1</sup>Farisifo ɔhande ɔku léti Yesu ató ogyíkpá mu wóyító \*ɔkpúnú ɔdaké. Ahá ɔɔpu ansí yi Yesusu, bude mu téɛ. <sup>2</sup>Ɔnu oyin ɔkúá alapúnyá léba Yesu wá. <sup>3</sup>Yesu léfité Mose mbla asunápu pú Farisifo ámu ɔbéɛ, “Ani mbla léha ɔkpa ání butsaá ɔɔ ɔkpúnú ɔdaké lóó, ntée imeha ɔkpa?”

<sup>4</sup>Amútó ɔkuku móbwii ɔnɔ. Múy Yesu lékutá oyin ámu, tsá mu ɔɔ, olesi mu ɔlenatí. <sup>5</sup>Ɔnu ɔlefité ahá ámu ɔbéɛ, “Mlito ma mu bi ntée mu ɔnanswie ɔbékpadá wíé ibúntó ɔkpúnú ɔdaké, ɔmóɔkɔsí lé mu?”

<sup>6</sup>Bumetalí lé mó ɔnɔ.

### lwiasibá

<sup>7</sup>Ɔnu Yesu lówun ání ahá ámú beti ató ogyíkpá unu ámuṭo aku bude otsiákpá yilé dunká bétsiá. Múy ɔleha amú

Luk

yébi ɔbée, <sup>8</sup>“Ní ɔku ɔtí fú ɔká otsiákpá a, máyétsiá ɔfvákpá. Fíali ɔleti ɔhande ɔkuá ɔdun fu. <sup>9</sup>ɛnu ɔhá ámúbú ɔleti mli ámu ɔbebláa fu ɔbée, ‘Mí wíé, kusu pu obiá ha ɔhá ánfí.’ ɛnu péli békutá fú, fépetí yódunká ɔtneku tsíá. <sup>10</sup>Mú su ní ɔha ɔtí fú ató ogyíkpá a, yetsiá obiá kusubisu mboún, ɔhá ámu ɔbebláa fu ɔbée, ‘Mí wíé, betsiá ɔfvákpá nfi.’ ɛni obótsu fú ansító fúá ahá ámu féé ansító. <sup>11</sup>Tsúfé ɔhagyíɔha ání ototsú iwí á, Bulu teba mu asi. ɔhagyíɔha ání ɔteba iwíasi é á, Bulu totsú mu fúá.”

<sup>12</sup>Yesu lébláa ɔhá ámúbú ɔleti mu ató ogyíkpá amu é ɔbée, “Ní ɔtswí ɔpúnú ɔpa onyé á, máti fú anyawíé, fú apíó, fú abusuanfɔ ntée iwí anyapúbá butsie mantáa fú. Ní ɔɔbwé mú ali á, amú é bélatí fú amú kle asi ká ɛku. <sup>13</sup>Mboún ti ahiánfɔ, tsukule asínpu, abubúpu pú ansibi abwiepú. <sup>14</sup>Bulu obóyulá fú, tsúfé buma tɔtɔá bɔpuká fú ɛku. Bulu ɔbéka fú ɛku ekeá ɔbɔkusúa aha yilé tsú afúlitɔ.”

### Nke Kpɔnkpɔnti Ku Yébi

(Mateo 22:1-10)

<sup>15</sup>Ahá ámúbú amúa Yesu butsie ɔpúnúasi ámutɔ ɔkule lónu mu asun blíhé anfi, ɔleblí ɔbée, “Ansí bégyi ahá ání bégyi ató Bulu ɔpúnú ɔtswíke mu \*iwíegyí ámutɔ!”

<sup>16</sup>Táme Yesu lébláa mu ɔbée, “Oyin ɔku lótswí ɔpúnú kpɔnkpɔnkpɔnti ku, ɔleti ahá tsɔtsɔtsɔ. <sup>17</sup>Bréá beniná atogyihe amu tá á, ɔlɔwa mu asúmpú ɔbée buyébláa ahá ámúbú ɔleti ámu bee, ‘Babwé tá!’ <sup>18</sup>Táme amú féé beblí bee amú ibi de. Ogyankpapu ɔbée, ‘Nahɔ ɔsulúu ku. Ilehían ání néyéki mú. Mú su mlikita mútɔ ha mi.’ <sup>19</sup>Onyɔɔsi é ɔbée, ‘Nahɔ nnantswie yínhé idú, bɔpulipúli mí ndɔɔ há mí. Neyékapú amú ki. Mú su mlikita mútɔ ha mi.’ <sup>20</sup>ɔbambá é ɔbée, ‘Nwéen kótóó netsiá ɔká. Mú su mméetalí ba.’

<sup>21</sup>“ɛnu osúmpú amu léyinkí bebláa mu wie. ɔbls lekutá mu wie amu, ɔlebláa mu ɔbée, ‘Wa ɔsa sri yeki dunsu pú brɔnusu, afukpa ahiánfɔ, tsukule asínpu, ansibi abwiepú pú abubúpu ba.’ <sup>22</sup>ɛmɔwa ɔpá osúmpú amu léba bebláa mu ɔbée, ‘Mí wíé, nayó sumbí ámu, táme otsiákpá trá da.’ <sup>23</sup>Mu

wie amu lébláa mu ɔ́béé, “Tsun mmuátse múa nkpakwí fée. Ti ɔ́hagyíɔ́ha ání fówun fée ɔ́bá, méni ahá bɔ́bulá mí wóyítɔ́. <sup>24</sup>Nekáse, ahá ámúbú nehie tí ámutɔ́ ɔ́kuku méeda mí atɔ́ ánfɔ́ ɔ́nɔ́!”

### Yesu Búoto Ipian

(Mateo 10:37-38)

Luk

<sup>25</sup>Yesu mva ɔ́ɔ́m kɔ́nkɔ́nkɔ́ntɔ́ ámu ná bɔ́yɔ́. Múbú ɔ́ledamlí bláa amú ɔ́béé, <sup>26</sup>“ɔ́hagyíɔ́ha ání ɔ́leba mí wá, táme ɔ́de mu si, mu yin, mu otsiába, mu abí, mu apíó, mu onutó kúráá iwɔ́ dwe dun mi á, ɔ́méetalí bwé mí ɔ́kasípú. <sup>27</sup>ɔ́há ání omotsu mu \*oyikpalíhe bobuo mi mɔ́fun ání ɔ́bɔ́bwe mí ɔ́kasípú.

<sup>28</sup>“Mlɔ́ ɔ́mɔ́mu bú inu, ní obéyi obu kɔ́nkɔ́nkɔ́ntɔ́ á, oméetsiá asɔ́ kɔ́ tɔ́á obéyintá, wun ání mu kɔ́ba bɔ́fun? <sup>29</sup>Ní ɔ́meki mú alɔ́, asa ɔ́ɔ́kusú wá obu ámu ntswasi, pwé mú fun ɔ́kpatɔ́, ɔ́metalí mɔ́ mú ɔ́nɔ́ á, obu ámu awúnpu fée bɔ́mɔ́sí mu. <sup>30</sup>Béblí beé, ‘Oyin ánfɔ́ lɔ́kusú ɔ́de obu yíi, ɔ́metalí mɔ́ mú ɔ́nɔ́.’

<sup>31</sup>“Ntée owíe ɔ́mɔ́mu bu inuá ní owíe ɔ́ku dé akɔ́pú mpím-advanyɔ́ (20,000) ɔ́bá ɔ́kɔ́ mu a, oméetsiá asɔ́ kɔ́ alɔ́ ɔ́bɔ́bwe ɔ́bɔ́pu mu isá akɔ́pú mpím-dú (10,000) yéfia amú? <sup>32</sup>Ní owun ání ɔ́méetalí á, ɔ́bɔ́wa abí ɔ́sasú bóyókokóli mu há ukulebwe, bréá bumɔ́kúnyá kpókpe ba. <sup>33</sup>Inu su mlɔ́ ɔ́há ání omesi mu tóyítɔ́ ɔ́magyáa ɔ́méetalí bwé mí ɔ́kasípú.

### Nfólá lma Labi

(Mateo 5:13; Marko 9:50)

<sup>34</sup>“Nfólɔ́ bu alé, táme ní itá ɔ́dwe á, ntu bélapúwá mú ɔ́dwe? <sup>35</sup>lɔ́ráa ma ale há tɔ́tɔ́tɔ́ bwe. Tseí butetséí mú tsítsá wúnasu. ɔ́há ání ɔ́bu asu onúu asún ánfɔ́.”

### Kufa Fwthé

(Mateo 18:12-14)

**15** <sup>1</sup>Èke ɔ́ku \*lampóo ahópu pú lakpan abwepú beba Yesu asun blíhé onukpá. <sup>2</sup>Farisífo pú Mose mbla

asunápú amu bowuntí mu bée, “Oyin ánfí mva lakpan abwepú ténátí, butɔwá ibi gyi ató kúráá.” <sup>3</sup>Mú su Yesu léha yébi púsúná amú ató ɔbée,

<sup>4</sup>“Mluto ma bú akúfa lafakule (100), ɔkule ɔfwí á, omesi adukwebá-kwebá (99) tráhe wá dimbító unu, yódunká mu alu kpéfún bréá obówun mu? <sup>5</sup>Nahogyi mbée, ní owun mu a, ansí bégýi mu, obótsu mu wá nkɔnkɔ, <sup>6</sup>pú mu ya wóyító. Ɖbétu mu anyawíe pú mu aba, bláa amú ɔbée, ‘Mliha anya ansigyí. Nawun mí kufa amúbú ɔɔfwí ámu!’ <sup>7</sup>Alí kén nde mli bláa mbée, ní lakpan ɔbwepú ɔkule pé ɔdamlí kluntó á, ansí béhíe gyi ahá ɔsúsú unu dun alíá ibégýi amú aha wankláán adukwebá-kwebá (99) ání bumetrá hián kluntódamlí iwí.

### Kóba Fwihé

<sup>8</sup>“Ntée ní ɔtsi ɔku bu sika futútú dú, mótó kule lafwí á, omóonywe ɔkandíe kíkí mu wóyító wankláán, kpákpá ntobító kí, féí wóyí ámutó wankláán yófun bréá alawun mú? <sup>9</sup>Ní owun mú á, ɔbétu mu apíó aba, bláa amú ɔbée, ‘Mliha anya ansigyí. Nawun mí sika futútú ámúbú ɔɔfwí ámu. <sup>10</sup>Nde mli bláa mbée, alí ansí béhíe gyi Bulu-abɔpu ní lakpan ɔbwepú ɔkule ɔdamlí kluntó ní.’ ”

### Obi Fwihé Ɖku

<sup>11</sup>Yesu létrá ha amú yébi ɔbée, “Oyin ɔku létsiá, ɔbu abi yinhé anyɔ. <sup>12</sup>Ɖkusv amu lébláa mu si ɔbée, ‘Mí sí, ye fú atótó, afupu mí klé ha mi.’ lnu mu si lékitá mu atótó ye há amú. <sup>13</sup>Imegyí nke kuku ɔkusv amu lókulá mu ató féé, olotu ɔkpa yó tsútsúútsú ɔmá kutó. lnu oleyétsiá nkpa laláhe yíntá mu ató ámu féé. <sup>14</sup>Bréá oleyintá ató ámu tá á, akón kpɔnkpɔnti ku léba ɔmá ámutó, ɔɔwa akón di bi. <sup>15</sup>Mú su ɔɔpu iwí yémantá unuyin ɔkusv, oyin ámu lékpa mu yáa mu ibúasi ɔbée, ɔyéki mu mprákuosu ha mu. <sup>16</sup>Teki olekleá obétsiá gyi mprákuo atogyihe amu ku, táme ɔhaa méha mu mú iwí ɔkpa. <sup>17</sup>Bréá mu ansí leyinkí ba mu iwísu á, ɔlefíté mu iwí ɔbée, ‘Apafɔ amɔmu kúráá má mí sí wóyító, bumedé ató gyí sian ekekegyíeke? Mú ntsie nfi, akón de mí mɔ?’ ”

18Nókusú yínkí yó mí sí wá, yébláa mu mbée, mí sí, napú ulá gyí Bulu, púgyi fú é. 19Mmekanáa ání fétrá ti mí fú bí. Pu mí bwée fú apafó ámutó okule.’ 20Mú su okokusú pú okpa obá mu si wá.

“Bréá olowotií, mu si lówun mu sísí á, okwa mu nwe, olesrí yéfia mu, látá mu pútá. 21Inu mu bi ámu lébláa mu obée, ‘Mí sí, napú ulá gyí Bulu, púgyi fú é. Mmekanáa ání fétrá ti mí fú bí.’ 22Táme mu si létu mu asúmpú, bláa amú obée, ‘Mliwa oša yotsu atadie wankláán ámu okwa mu. Mliwa mu opetia, amlwa mu ntukuta. 23Mliyele onantswie yínhé kánáhe amú alawá nfo ámu ba, amlibokwu mu, apugyi nke ha mu. 24Tsúfé mí bí ánfu lawú tsínkí. Okofwi, anilawun mu.’ Inu okwa nke gyí bi.

25“Alí bré ámutó á, obi dehen amu bu ndoto. Bréá olotsu ndo ámutó obá, alatá wóyító wie tá á, olonu ání pléi de wóyító nu. 26Mú su okletu mu si asúmpú amuto okule, fíté obée, ‘Amansu lába?’ 27Osúmpú amu léle mú onó obée, ‘Fú pió laba. Mú su fú sí lahá bamó onantswie kánáhe amu, tsúfé alayínkí oktu mu, oku nkpa, oku onlu.’

28“Okó lekutá okéhen amu. Mú su olesin mmuáa. Mu si lédalí ba bokokóli mu obée, oká wóyító. 29Táme oklele mú onó obée, ‘Mí sí, kí nfi dúdúbdúá napótsiá fú wá súm fú. Mmókúbwé mábúla kuku kí. Táme fomokúhá mí okpalábi fee mía mí aba apúwa iwí ansigyí kí. 30Táme fú bí ánfu alayintá fú tógyító, mu akipú bayégyi nkpa ánfu mú laba a, famó onantswie yínhé kánáhe amú alawá nfo ámu há mu!’ 31Inu mu si lébláa mu obée, ‘Mí bí, yee fú mú fúbu mí wá brégyíbré. Fúbú mí ató féé. 32Fú pió ánfu lawú tsínkí. Okofwi, anilawun mu. Mú su lehián ání abégyi mú nke, nyá ansigyí.’ ”

### Agyómású Okípu Anstínpu Oku

**16** <sup>1</sup>Yesu lébláa mu akasípú obée, “Iwí onyapú oku létsiá, oku agyómású okípu. Ahá bowi tsá mu wie amusu bee okde mu gyí. <sup>2</sup>Inu su okletu oyin ámu, fíté mu obée, ‘Nto asún ndenu tsú fú iwí alí? Bobu akúnta ha mi, tsúfé

fuméetrá kú mí agyómású.’ <sup>3</sup>Agyómású ɔkípu amu léfité mu ɔwɔ ɔbée, ‘Nkáli nóbwe? Mí wíe ɔbá begya mi. Mma ɔwɔnlín ání nénatí dɔ ha ahá. Ibu mi péli ání nénatí kúlí ató é. <sup>4</sup>Ibu alé! Nyin tóá nóbwe, ménu ní osí mí á, nénya ahá ání bóho mi wá amú wóyító.’

<sup>5</sup>“Mú su ɔletí ahá ání bude mu wie ɔkɔ kulekule. ɔlefíté ogyankpapu ɔbée, ‘ɔkɔ afinu fúde mí wíe?’ <sup>6</sup>ɔkɔ ɔkitápú amu léle mú ɔnó ɔbée, ‘Nfɔ agbɔngbɔ lafa-anyɔ (200).’ Agyómású ɔkípu amu lébláa mu ɔbée, ‘Tsan fú adánsie ɔwulú ámutɔ, afɔwanlɔn lafakule (100).’ <sup>7</sup>ɔlefíté ɔku é ɔbée, ‘ɔkɔ afinu fúde?’ ɔkɔ ɔkitápú amu lébláa mu ɔbée, ‘Bodobodo nfúo akente ɔpím-ɔkule (1,000).’ Agyómású ɔkípu amu lébláa mu ɔbée, ‘Tsan fú adánsie ɔwulú ámutɔ afɔwanlɔn lafakwe (800).’

<sup>8</sup>“Osikani ámu lékanfú agyómású ɔkípu anfí ɔma ɔɔkwali ánfí ání alatálí tɔn ansí alí.” Yesu lómɔ mú ɔnó ɔbée, “Ndemba-abí ání bubuo ɔyító ató ansítɔn ání ɔɔpu butsie amú abatɔ idɔn amúá buyin Bulu klé.

<sup>9</sup>“Nde mli bláa mbée, mɔpu ɔyító ató bwe apíó, ménu ní itá á, Bulu ɔbóho mli wá mu wóyíá ibu ɔnu bré féétó. <sup>10</sup>ɔhá ání ɔletalí kítá ató túkúríbí, olegyi ɔɔkwali músú á, mu kén obégyi ɔɔkwali ató kɔɔkɔntɔ é sú nɔ. Táme ɔhá ání ɔmɔwa ɔɔkwali ató túkúríbísisu ɔmɔwa ɔɔkwali ató kɔɔkɔntɔsu. <sup>11</sup>Mú su ní mlumá ɔɔkwali ɔyító atósú a, ma mee ɔbóho mɔisu gyi, pú ɔsúsú ató onutó wá mli ɔbitɔ? <sup>12</sup>Ntéé ní fuma ɔɔkwali ɔku klésu á, ma mee ɔbópu fú klé há fú?

<sup>13</sup>“Osúmpú ɔkuku méetalí súm awie anyɔ. ɔbódwe ɔkule, lí ɔkule. Ntéé obóbu ɔkule, omóobu ɔkule. Fuméetalí súm Bulu, súm Kóba.”

### Yesu Asun Blíhé Ku

(Mateo 11:12-13; 5:31-32; Marko 10:11-12)

<sup>14</sup>Farisifɔ butɔdwé kóba. Mú su bréá bonu Yesu asun blíhé anfí á, ɔbɔwe mu ahinlá. <sup>15</sup>Ibu Yesu lébláa amú ɔbée, “Mlitélé ɔwɔ súná ání aha yilé mɔgyí ahá ansító, táme Bulu

mú yin mli kluntɔ. Tsúfé tʒá nyankpusa tekiá ibu labi igyi Bulu akisítɔ.

16“Mose Mbla ámu pú Bulu ɔnʒsú atɔ́pú amu asun wanlínhé loyɔ agyómá alu bɔfun Asú Ɖbɔpú Yohane brésú. Tsú musu bude Bulu iwíegyí ámu iwɪ asun wankláán ɔkan da, ahá é budeprú wie mótɔ. 17Ɖsú mʒa asɪ bétalí mʒ ɔnʒ, táme itoduáhé ntée asúnbi ukule kúráá móowu Mose Mbla ámutɔ.

18“Oyin okíná mu ka láyétsiá ɔtsɪ bámbá á, alatʒ mbua. Oyingyioyin ání otsiá ɔtsɪ ánfɪ mu kulu lakíná mu é latʒ mbua.”

### Iwɪ Onyapú Ɖku Mva Lasaro

19Yesu lébláa amú ɔbéé, “Iwɪ onyapú ɔku létsiá. Atati wuluhe ɔtedídá, otegyi nkpa wankláán ekekegyíéke. 20Atʒ ɔkúlíp ɔkuá mu iwɪ letsitsíí nlo é létsiá. Butetí mu Lasaro. Betsiá pú ohiáni ánfɪ yéyaí iwɪ onyapú ámu ɔkpa ɔnʒ. 21Ɖkiá obénya atogyihe mpupubiá ibékpakpáa bun oyin ámu ɔpónúasi gyi. Akíai létsiá beyintá mu nlo ámu kúráátɔ.

22“Bréá ohiáni ánfɪ lówu á, Bulu-abɔpɔ botsu mu ya, oleyétsiá anɪ náin Abraham wá ɔsúsú. Iwɪ onyapú ánfɪ é lóbowu, bopulá mu. 23Ɖloɔyɔ ɔbu isubití ogyá ání utamaduntɔ, ɔde iwɪɔsin wúun. Olotsu ansí fúá, olowun ání Lasaro tsie Abraham wá tsútsúútsú. 24Inu ɔɔkplón ɔbéé, ‘Anɪ sí Abraham-ée! Wun mi nwe, afuha Lasaro ɔyɔpɔ mu osrebi da ntsutso pubeda mí ɔdandusu, ilwii kpalobí. Nde iwɪɔsin wúun ogyá ánfɪtɔ dubi!’

25“Táme Abraham lébláa mu ɔbéé, ‘Obí, kaun, fú nkpatiátʒ a, fegyɪ ɔdwe, Lasaro é letsiá ɔsuntɔ. Séi á, ɔbu ɔdwetɔ, fú é fúbu ɔsuntɔ. 26Ɖma a, ulán kpɔnkɔpɔnkɔntɪ ku da anɪa funyɔ nsúné. Mú su ɔhaa méetalí fá tsú nfi ba fú wá unu, ɔhaa é méetalí fá tsú unu ba anɪ wá nfi.’ 27Oyin ámu lébláa Abraham ɔbéé, ‘Múmú nobwíí ipa, anɪ sí Abraham, wa Lasaro sɪsɪ mí sí wóyítɔ. 28Mbu apio yinhé abanú aku unu, ɔyeda amú ɔlá, méni bowú á, buméeba bowun iwɪɔsin ánfɪ odu.’



29“Abraham léle mú ɔ́nɔ́ ɔ́béé, ‘Mose mua Bulu ɔ́nɔ́sú atɔ́ípú amu nwulú bu amú wá, ide amú ɔ́lá da. Bunúu mú, abugyi músú.’ 30Oyin ámu léle mú ɔ́nɔ́ ɔ́béé, ‘Ani sí Abraham, asún ámu nu keke mééha amú abudamli klntɔ́. Mboún ní ɔ́ku ɔ́kúsú tsú afúlitɔ́ ý amú wá á, bédamli klntɔ́.’ 31Táme Abraham lébláa mu ɔ́béé, ‘Ní bumegyí Mose mua Bulu ɔ́nɔ́sú atɔ́ípú amu nwulú́tɔ́ asún ámusu á, ɔ́ku ɔ́kúsú tsú afúlitɔ́ ý unu kúráá á, bumóonu ɔ́há ámu asún.’ ”

**Lakpanbwe**

(Mateo 18:6-7, 21-22; Marko 9:42)

**17** 1Yesu lébláa mu akasípú amu ɔ́béé, “lbwébwéébwé á, tɔ́ku béha nyankpusa ɔ́bɔ́bwe lakpan, táme ɔ́há ání una musu mu ba ló́bwe lakpan ɔ́gyó́wɔ́ ní. 2Ní ɔ́ku léha ahá ánti bumɔ́kúdan mísú hógýitɔ́ ántitɔ́ ɔ́ku ló́bwe



*Nfúókwebu (Luka 17:2)*

lakpan á, ní beda nfúókwebu síán mu ɔ́metɔ́, tswɔ́ mu wá ɔ́pu okluklúkpa pó á, ɔ́bu alé dɔ́n. 3Mú su mlíkɔ́ mli ɔ́wɔ́ wankláán.

“Ní fú bá ɔ́pu ɔ́lá gyi fu á, wa ɔ́yin wa mu. Ní ɔ́ledamli klntɔ́ á, sikie mu. 4Ní ɔ́ɔ́pu ɔ́lá gyi fu tse sien<sup>k</sup> ekewóle owítɔ́, ɔ́lela bobwií ɔ́pa há fú á, sikie mu.”

**Hógyi**

5Yesu \*sumbí ayɔ́pú ámu bebláa mu beé, “Ha aní hógýi imoni tsa.”

6Yesu léle mú ɔ́nɔ́ ɔ́béé, “Ní mli hógýi lómoní fé takyí-akpin ibí á, mlétalí bláa keli ánti mlihaa, ‘Puli yelú ɔ́putɔ́.’ lbɔ́bwe dínká músú.

<sup>k</sup> 17:4 Idesuná ání tsé dúdúá ɔ́ɔ́pu ɔ́lá gyi fu.

### Osúmpú Gyumagyihe

7“Ní mlto oku bu osúmpúá otɔyɔ agyómá mu ndɔto ntée otɛki mu akúfasu, otsú agyómátɔ ba a, bláa mu wie tɛbláa mu obée, ‘Wa ɔsa bwe afugyi atɔ?’ Ekekekeke! 8Bláa otɛbláa mu obée, ‘Tsu tati saba, afubɔtswi ɔpúnú ha mi. Belí mí angyi atɔ. Negyi ta á, fayégyi fú klé.’ 9Otedá osúmpú amu ipán obée, alabwé tɔá mɔwa mu bwe? Ekekekeke! 10Inu su ní mli é mlɔbwé tɔá bɔwa mli bwe tá á, mlibli mlíaa, ‘Asúmpú keke anigyí. Tɔá igyi anu bwehé anlabwé á.’ ”

### Uo Pepe Alɔpú Dú Tsa

11Yesu ná Samaria pú Galileafɔ okasu ɔyɔ Yerusalem. 12Bréá ɔleta wúlu kusu wie tá á, \*uo pepe alɔpú dú aku buna bebá befia mu, besi lí tsútsú. 13Inu bɔkplón blí beɛ, “Yesu! Owíé! Wun anu nwe.”

14Yesu lótsu ansí kɪ amú, ɔlebláa amú obée, “Mlɔpu mli twi yosuná Bulu igyi ɔhapú.”

Bréá bɔpu okpa bɔyɔ á, amú twi lépli. 15Okule mú lówun ání mu twi laplí a, oleyinkí ɔdekplón kanfú Bulu kúklókúb. 16Olebemlí bún Yesu ayabitɔ, ɔde mu ipán da. \*Samaraiyin oyin ánti gyí. 17Inu Yesu léfité obée, “Megyí ahá idú natsá? Mú kwebá atráhe mé? 18Mú su amótɔ okuku méba bekanfú Bulu dun Samariayin ɔfɔ́ ánti nkule?” 19Inu ɔlebláa oyin ámu obée, “Kusu natu. Fú hógyi latsá fú uo.”

### Bulu Iwíegyi Ámu Ibá

(Mateo 24:23-28, 37-41)

20Farisifɔ aku befité Yesu beɛ, “Omenke Bulu iwíegyi ámu íbɛba?” Yesu lébláa amú obée, “Megyí tɔá ɔha ɔbɔpu ansíbi wun Bulu iwíegyi ámu igyi. 21Ohaa méetalí blí obée, ‘Kɪ, múbu nfi.’ Ntée ‘Múbu nána á.’ Tsúfé mli kluntɔ Bulu iwíegyi amu bu.”

22Inu Yesu lébláa mu akasípú obée, “Eke oku íbá, mlódunká ání mlówun mí, Nyankpusa-Mu-Bi ánti ekewóle

<sup>1</sup>17:14 Abubi ání mli twi laplí Mose mbla okpasu.

pé, táme mlimóowun mó. <sup>23</sup>Ahá bébláa mli bæe, ‘Obu nfi.’ ntée ‘Obu nána,’ táme mlimásrí buo amó yéki. <sup>24</sup>Tsúfé mí, Nyankpusa-Mu-Bi ánti ɔ́báke bóbwe fé alí ámúú nyankpu tɔ́fwí ibi, butowun mú nsaunto féé ámu. <sup>25</sup>Táme négyankpá wun iwɔ́sun tsɔ́tsɔ́tsɔ́, ndemba-abí ánti é békiná mí. <sup>26</sup>Alí ámúú ilegíi \*Noa brésú amu a, alí ibégyi mí, Nyankpusa-Mu-Bi ánti é ibábi ni. <sup>27</sup>Ahá betsiá, bude ató gyí, bude ntá núu; bude aká tsiá, bude atsi kítá há akúlu alu yófun ekeá Noa lówie mu dáka kpɔ́nkɔ́nti ámutɔ́, ntsu lóbulá bɔ́mɔ́ amó féé. <sup>28</sup>Alí kén ileba \*Lot é brésú ni. Ahá betsiá, bude ató gyí, bude ntá núu, bude ató hɔ́, bude ató fe; bude ató du, bude ibu yíi, <sup>29</sup>yófun ekeá Lot lédalí Sodom wúluto, ogyá múa \*atonkodu lotswie tsu ɔ́súsú behi amó féé. <sup>30</sup>Alí kén mí, Nyankpusa-Mu-Bi ánti iwɔ́wanleké bófwie ahátɔ́ ní.

<sup>31</sup>“Eke ámu a, ɔ́há ání ɔ́din obusu, mu ató ibu obuto ɔ́mákpílí bɔ́tsu tɔ́tɔ́. Alí kén ɔ́há ání ɔ́bu ndɔ́tɔ́ é máyinkí bɔ́tsu tɔ́tɔ́ ni. <sup>32</sup>Mlikaun Lot mu ka asúnsú!” <sup>33</sup>Tsúfé ní ɔ́ku lóduká ání ɔ́bépri mu nkpa á, ɔ́bɔ́hulíu mú. Táme ní ɔ́ku lóhulíu mu nkpa á, ɔ́bélanyá mú. <sup>34</sup>Nde mli bláa mbée, alí eke ámu onyé á, ní ahá abanyó buɔa ɔ́klan kulesu á, Bulu obótsu ɔ́kule sí ɔ́kule.

<sup>35-36</sup>“Ní atsi abanyó buɔe nfúó kwe á, Bulu obótsu ɔ́kule sí ɔ́kule.” <sup>37</sup>Yesu akasípú amu befité mu bæe, “Ani Wíe, nkónú ibéba?”

Yesu lébláa amó ɔ́bée, “Ɔ́tínéá ito wuhé da a, unó alása butefia ni.”

### Ɔ́surapu Mva Asón Ogyípú Ɔ́ku

**18** <sup>1</sup>Unu Yesu léha yébi ku púsúná ání bubɔ́ɔ́ mpáú brégyíbré, umákpɔ́n amó. <sup>2</sup>Ɔ́lebláa amó ɔ́bée, “Asón ogyípú ɔ́ku létsiá wúlu kusv. Ɔ́tamanyá Bulu ifú, ɔ́tamanyá ɔ́haa é péli. <sup>3</sup>Ɔ́surapu ɔ́ku é létsiá wúlu amutɔ́. Oletsíá

<sup>m</sup> 17:32 Bréá omobu Bulu, ɔ́ledamlí ki ɔ́ma a, olemli nfólúsin. Ki Genesis 19:26. <sup>n</sup> 17:36 Múts yée 36 bu nwlú dáda amu akuto: Ní ayin abanyó buɔe agyómá yɔ́ ndɔ́ kuletɔ́ á, Bulu obótsu ɔ́kule sí ɔ́kule.

bokokóli mu ɔbéɛ, ogyíi mu asún ɔɔkwawisu ha mu, ɔle mu tsu mu olupú ibitɔ! <sup>4</sup>Teki olekle okina, táme ɔma-ɔma a, ɔlebláa mu iwɛ ɔbéɛ, ‘Ubu mútɔ́á ntamanyá Bulu ifú, ntamanyá ɔhaa é péli. <sup>5</sup>Táme ali ánfɛ ɔsurapu anfi ná ɔde mí háan anfi su á, négyi mu asún ɔɔkwawisu. Ní megyí ali á, oméesi mí tɔ́i wa. Ɔméesha mméenyá ɔkpa bwé tɔɔ.’ ”

<sup>6</sup>Yesu lóyɔ músú ɔbéɛ, “Mlíki alíá asún ogyípu anfi ɔtamagyi asún ɔɔkwawisu ánfɛ lablí. <sup>7</sup>Mómú nkáli Bulu mú méegyí mu ahá ámúú alalé, budesú kpolí mu ɔpa-onyé ámu asún ɔɔkwawisu? Obési amú asún wá obiátɔ? Ekekekeke! <sup>8</sup>Nde mli bláa mbéɛ, obégyi mú ɔɔkwawisu há amú ɔsasɔ. Táme ndefuté mbéɛ, ní mí, Nyankpusa-Mu-Bi ánfɛ neyínkí bá a, nówun ahógyipu aku ɔsulúv anfisɔ?”

### Lampóo Ɔhɔpu Mwa Farisiyin

<sup>9</sup>Yesu létrá ha yébi ku púsúná amú atɔ tsú ahá ání buteki amú iwɛ yilé abwepú dun amú aba. <sup>10</sup>Ɔleha yébi amu ɔbéɛ, “Ayin abanyɔ́ aku bɔɔɔ yɔ́ mpái ɔɔkpá Bulu ɔtswékpa. Amúɔ́ ɔkule gyí Farisiyin, ɔkule é gyí lampóo ɔhɔpu.

<sup>11</sup>“Farisiyin amu lókusú líí, bó mpái wá nwuntɔ ɔbéɛ, ‘Bulu, nedá fú ipán ání mmegyí fé aku. Mí mú mma ɔnsípe, ntamasísi ɔha, ntamatɔ́ mbua, mmegyí fé Lampóo ɔhɔpu anfi é. <sup>12</sup>Nteklí \*ɔnɔ́ tse nyɔ́ ndawótswí ikuletɔ. Nteye mí atɔ́ féétɔ́ dú, lé idúsí há fú.’

<sup>13</sup>“Táme lampóo ɔhɔpu amu mú léyelí tsútsú, oloko nwuntɔ wá. Omotsulá tsú ansí kúráá fúá kɛ ɔsúsú. Ɔɔpu ɔbumáa dá ibitɔ, kókóli Bulu ɔbéɛ, ‘Óo Bulu, wun mi nwe, lakpan ɔbwepú ngyi.’ ” <sup>14</sup>Yesu lómɔ́ mú ɔnɔ́ ɔbéɛ, “Nde mli bláa mbéɛ, asa beyinkí yɔ́ wóyí á, Bulu ansí légyi lampóo ɔhɔpu amu iwɛ dun Farisiyin amu. Tsúfé ɔhá ání ototsú iwɛ á, Bulu ɔbéba mu asɛ. Ɔhá ání ɔteba iwiasɛ é á, Bulu obótsu mu fúá.”

### Nyebí Yulá

(Mateo 19:13-15; Marko 10:13-16)

<sup>15</sup>Aha aku bɔpu amú abí ba Yesu beɛ, ɔpúv ibi dinka amúsú, oyula amú. Mu akasípu bowun amú. Mú su bɔwa

tyin wá amú. <sup>16</sup>Táme Yesu létí nyebí ámu ba mu iwí wá, òlebláa akasípú amu òbée, “Mlha nyebí ámu abuba mí wá. Mlumátin amú òkpa, tsúfè ahá ánfí odu bú Bulu iwíegýí amu ni. <sup>17</sup>Ònòkwali nde mli bláa. Óhá ání òmòhò Bulu iwíegýí ámu fé kebi á, omóowie mótó.”

### Atonyahé Iwí Atosunáhé

(Mateo 19:16-30; Marko 10:17-31)

<sup>18</sup>Èke òku Yudafo òhande òku lébefíté Yesu òbée, “Osunápú yilé, ntò nóbwe asa nénya nkpa ání utamatá?”

<sup>19</sup>Yesu létíté mu òbée, “Ntogyi sù fude mí tí òha yilé? Óhaa mégyí òha yilé, nkétí Bulu nkule. <sup>20</sup>Yée fuyin Bulu mbla ámu o. Múgyí, mátò mbua, mámò òha, máwi ató, máka asún dínká fú bású, bu fú sí mua fú yín.”

<sup>21</sup>Óhande amu lébláa mu òbée, “Tsú mí nyebítò òpá nde mú féésú gyí.”

<sup>22</sup>Yesu lónu mu asun blíhé anfi á, òlebláa mu òbée, “Toku kule ulasí ání fóbwe. Yefe fú iwísu ató féé, afuye kóba amu ha ahiánfo, méni fénya siadié òsúsú. Fóbwé mú tá á, ba afubobuo mi.” <sup>23</sup>Bréá oyin ámu lónu asún ánfí á, ulòtò mu klun, tsúfè óhíé òbu ató.

<sup>24</sup>Yesu lówun ání ulahan mu. Mú su òleblí òbée, “Ìbu ònlun asa iwí onyapú obówie Bulu iwíegýí ámutò. <sup>25</sup>Lélé mú á, ulòpòn ha \*kpósó ání òbótòsun òbun-atò òbótó, dun ání iwí onyapú obówie Bulu iwíegýí ámutò.”

<sup>26</sup>Ahá ání bonu asún ánfí befíté bée, “Múmú ma mee Bulu òbòhò nkpa?”

<sup>27</sup>Táme Yesu lébláa amú òbée, “Tóá nyankpusa méetalí bwé mòdún Bulu bwé.”

<sup>28</sup>Ìnu Petro lébláa Yesu òbée, “Mí Wíe, kí, anulasí anu wóyí tswí bobuo fu.”

<sup>29</sup>Yesu lébláa amú òbée, “Ònòkwali nde mli bláa. Óhaa má unvá obési mu wóyí, mu ka, mu apíó, mu akwípú ntée mu abí tswí Bulu iwíegýí ámu su, <sup>30</sup>Bulu méelawá mú otsiákpá há mu tsé dú tsé lafa séi, láha mu nkpa ání utamatá bré ámúbú íbá ámutò.”

### Yesu Lowu Iwɪ Asún Blí Otse Saasi

(Mateo 20:17-19; Marko 10:32-34)

31 Yesu létɪ akasípú dúanyɔ ámu ya utsétɔ, ɔlebláa amú ɔbé, “Ayɔ Yerusalem. Inú asún amú Bulu ɔnɔsú atɔpú amu bɔwanlín tsú mí, Nyankpɔsa-Mu-Bi ánfɪ iwɪ ámu fée béba mótɔ ní. 32 Bée mí há ahá ání bumegyí Yudafo. Bɔbwe mí ahinlá, síá mí, tú atsvnɔ wólí mí. 33 Bépɪtí mí atɔ, mɔ mí. Mú eke sáásí a, nɔkɔsú tsú afúlitɔ.”

34 Akasípú amu bumonu ínɪ asi, tsúfé Bulu lɔpɔɔjáin amú. Bumebi tɔá ɔdeblí é.

### Ansibi Obwiepú ɔku Ilo Tsa

(Mateo 20:29-34; Marko 10:46-52)

35 Yesu léta Yeriko wúlutɔ wie tá á, ansibi obwiepú ɔku tsie ɔkpa ɔnɔ, ɔde atɔ kulí. 36 Ansibi obwiepú ámu lónu ání ɔɔm budetsúun. Mú ɔlefuté ɔbé, “Amansu igyi?”

37 Ahá bebláa mu be, “Yesu Nasaretyin amu détsúun.”

38 Inu ansibi obwiepú ámu lɔkplun blí ɔbé, “Anɪ wie \*Dawid mu na Yesu, wun mi nwe!”

39 Ahá amú bugya Yesu nkpa ámu bɔkplún wa ansibi obwiepú ámu be, ɔwáa ɔsa kpa ɔnɔ bun. ɔlelakplún dun ali ɔbé, “Anɪ wie Dawid mu na, wun mi nwe!”

40 Yesu lési lí, ɔleha ɔbé bukpa mu ba mu. Bréa bekpa mu ba a, Yesu léfuté mu ɔbé, 41 “Ntɔ fudeklé fe mbwée ha fu?”

ɔlele mú ɔnɔ ɔbé, “Owíe, ha mí anwun atɔ!”

42 Yesu lébláa mu ɔbé, “Fú hógyi latsá fú ilo. Wun atɔ.”

43 Inunu mu ansíbi lobwií, ɔlekplá buo Yesu, ɔde Bulu kanfú. ɔɔm amu fée bowun ínɪ, amú é bekanfú Bulu.

### Yesu Mva Sakeo

**19** <sup>1</sup>Yesu déka tsun Yeriko wúlutɔ. <sup>2</sup>Lampóo ahópu ɔhande ɔkuá ɔbu kɔba bu wúlu amutɔ, butetí mu Sakeo. <sup>3</sup>Oyin ánfɪ dékléá ɔbópu ansíbi wun Yesu, táme ɔma iswí, ahá é bɔdubi. <sup>4</sup>Mú su ɔlesrí yɔdu pɔntɔ-oyí kuá

Yesu ɔbɔtsun mú asi, ménti obówun mu. <sup>5</sup>Bréá Yesu lówie oyí ámu asi á, olotsu ansí fúá, wun Sakeo, ɔlebláa mu ɔbéé, “Sakeo, wa ɔsa kplɪ ba. Nde, fú wóyí nɔ́swuí ní.”

<sup>6</sup>Sakeo lówa ɔsa kplɪ, pú ansigyí kpá mu ya wóyítɔ́. <sup>7</sup>Ahá ání bowun mú féé bowuntí beé, “Oyin ánfɪ layɔ́swuí lakpan ɔbwepú wóyítɔ́.”

<sup>8</sup>Sakeo lɔ́kusú líí wóyítɔ́ unu, bláa anɪ Wíe Yesu ɔbéé, “Mí Wíé, kɪ, néye mí atótɔ́ anyɔ, pú ifun kíé ahiánfɔ. Ní nasísi ɔku é á, nélahá mu mú aku ana.”

<sup>9</sup>Yesu lébláa mu ɔbéé, “Nde Bulu laho wóyí ánfɪ nkpa, tsúfé Abraham mu na ɔ́ni ánfɪ é gyí. <sup>10</sup>Ahá ání bafwí odunkákpa mí, Nyankpusa-Mu-Bi ánfɪ neba, anho amú nkpa.”

### Asúmpú Kóba Ha

(Mateo 25:14-30)

<sup>11</sup>Ahá ámu bude asón amúú Yesu déblí ámu nu. Alɪ bré ámutɔ́ á, Yesu latá Yerusalem wie tá. Mú su ɔleha amú yébi pútswíí amú, tsúfé budesusúu beé Bulu iwíegyí béfi asi ununu. <sup>12</sup>ɔleha yébi amu ɔbéé, “lwi onyapú ɔku lɔ́bwe agywun ɔbéé, mótu ɔkpa yɔ́ amú owíe dehen wá, ɔyai mu owíe, oyinki begyi iwíe mu ɔmátɔ́. <sup>13</sup>Asa ɔbɔyɔ́ á, ɔleti mu asúmpú idú, oleye pɔ́ɔnu kulekule há amú féé. ɔlebláa amú ɔbéé bupúyɔ́ agyómá yɔ́fun ekeá méba. <sup>14</sup>Táme mu wúluto ahá bolu mu, wá abí buo mu beé, bumedékléá ɔbwée amú owíe.

<sup>15</sup>“Táme mú óó á, owíe dehen amu léyaí mu iwíe amu, ɔlesankí ba wóyí. Olenya wíe pé ɔleha betɪ mu asúmpú amu, ɔkɪ tɔ́a banyá dínká kóba amusu. <sup>16</sup>Ogyankpawu léba bebláa mu ɔbéé, ‘Mí wíé, nanyá pɔ́ɔnu dú tsía fú klé amutɔ́.’ <sup>17</sup>Múú ɔlebláa osúmpú amu ɔbéé, ‘Fabwé atɔ́. Osúmpú wankláán fúgyi. Ínɪá fawá ɔ́nɔkwaltɪ utɔ́ túkúrííbi ánfɪ lwi su á, nɔ́pu awúlu idú wá fú ibutɔ, fékɪ músú.’ <sup>18</sup>Onyɔ́ɔsi léba bebláa mu ɔbéé, ‘Mí wíé, nanyá pɔ́ɔnu anu tsía fú klé amutɔ́.’ <sup>19</sup>Owíe amu lébláa mu ɔbéé, ‘Fú é fékɪ awúlu anusu.’

<sup>20</sup>“ɔbambá é léba bebláa mu ɔbéé, ‘Mí wíé, fú sika ámu nu. Neda mú wá dúkubi ɔ́nɔ́ yáí. <sup>21</sup>Nyin fu. Nde fú ifú nya, tsúfé fú asón bu ɔ́nlɪn. Futotsú atɔ́ ɔ́tínéá fumɔ́pu tɔ́tɔ́ yáí,

fútoḱpótí ató é otínéá fumodu toḱo.’<sup>22</sup> Mu wie amu lébláa mu ɔbéé, ‘Osúmpú laláhe. Fú ɔnótó asún nópugyi fu asún. Yéé fuyin ání mí asún ihíé bu ɔnlun, ntotsú ató otínéá mmɔpu toḱo tswi, kpótí ató otínéá mmodu toḱo a?’<sup>23</sup> Mú ntogyi sù fumɔpu mí kóba amu yótswi sika oyaíkpa. Féki ní neyínki ba a, nóyɔho mba músú abí?’

**24**“Lnu owíe amu lébláa ahá ání bubu unu ɔbéé, ‘Mlswu osúmpú anfi kóba amu ha ɔmvamúú olenya idú ámu.’<sup>25</sup> Táme ahá ámu bebláa mu beé, ‘Nanáin, ɔbu pɔɔnu dú dodo o!’<sup>26</sup> Owíe amu lébláa amú ɔbéé, ‘Nde mli bláa mbéé, ɔhá ání odekléá obónu mí atosunáhé amu asi á, Bulu ɔbópu iku tsía mótó há mu. Táme ɔhá ání omedékléá obónu mí atosunáhé amu asi á, Bulu ɔbóswú mu kpalobí ámúú alabí ámu kúráá.’<sup>27</sup> Séi á, mlikpa ahá ámúú bɔkusu líi mísú beé mmágyi iwíe amu ba, amlibɔmɔmótó amú mí ansító nfi!’ ”

### **Boho Yesu Fé Owíe Yerusalem**

(Mateo 21:1-11; Marko 11:1-11; Yohane 12:12-19)

**28** Yesu léha amú yébi anfi tá á, ɔlɔtsun gyankpá pú ɔyó Yerusalem. **29** ɔleta Betfage mba Betania awúluá idun Nfo-nyíbu<sup>o</sup> ámusu wie tá á, ɔlɔwa mu akasípú abanyó gyankpá, **30** bláa amú ɔbéé, “Mlyɔ wúlu anfi ida mli ansító ánfisu. Ní mlowíé wúlu ɔnó á, mlówun afrímú kanáhe ɔku da ɔfétó, ɔhaa mókútsiá musu ki. Mlisanke mu ba mi. **31** Ní ɔku ɔfíté mli ɔbéé, ‘Ntogyi sù mli dé mu sankí?’ á, mlibla mu mlíaa, ‘Ani Wíe dé mu hián.’ ”

**32** Akasípú abanyó ámu boyówun afrímú kanáhe ámu fé alíá Yesu lébláa amú. **33** Bréá bude mu sankí á, mu awíe befité amú beé, “Ntogyi sù mli dé mu sankí?”

**34** Bele mú ɔnó beé, “Ani Wíe dé mu hián.” **35** Besi bekpa afrímú kanáhe amu ba Yesu, beyai amú atati dínká musu, tsú Yesu bian musu. **36** Bréá Yesu tsie musu ɔyó á, ahá ámu bekpa amú atati yái tswi ɔkpatɔ, ɔlenatí músú tsun.

<sup>o</sup> 19:29 *Nfo-nyíbu* igyi obubwí kuá ibu mantáa Yerusalem, butetí mú Olifbu.



37 Bréá Yesu lówa Nfɔ-nyíbu ámu kplí ɔyó Yerusalem wúluto bi a, mu abúopu amu fée bɔtswi opé kánfú Bulu kóklókúú, ofúla amúú ɔlobwe, bowun amu fée su. 38 Bɛɛ, “Bulu oyúla owíe anfi ɔbá mu dátó ánfí! Iwilwii bu ɔsúsú. Numnyam ibwée Bulu klé ɔsúsúúsú unu.”

39 Farisifo aku bubu ɔɔm amuto. Inu bebláa Yesu bɛɛ, “Osunápú, ka fú abúopu anfi itin!”

40 Yesu lébláa amú ɔbée, “Nde mli bláa mbée, ní ahá ánfí behíé kpá ɔnó bun kúráá á, abwi ánfí bókplɔn kanfú Bulu.”

### Yesu Lósú Yerusalem Su

41 Bréá Yesu léta Yerusalem wie tá, olowun wúlu amu sísí á, olosu ha mú. 42 Ɖbée, “Yerusalemfɔ, teki ilehián ání mlébu tóá utɔpú iwilwii ba nde, táme mlumétálí bí mú. 43 Bré ku íbá, mli alupú békafia mli abuntíi, pwé okpó wá mli, sá mli tin ɔkpagyíɔkpasu. 44 Béhu wúlu anfi pú mútó atsiápú. Buméesi íbwi kule dínká mú bású, tsúfé mlumébi bréá Bulu léba mli nkpa ɔhókpa!”

### Ibíá Agyípú Gyáa Le Bulu Ɖtswékpa Wunsínésú

(Mateo 21:12-17; Marko 11:15-19; Yohane 2:13-22)

45 Bréá Yesu lówie Yerusalem a, ɔɔyɔ Bulu ɔtswékpa wunsínésú. Olenya wíé unu alí, ɔɔwa íbíá agyípú gyáa bi. 46 Ɖlebláa amú ɔbée, “Bɔwanlín wá Bulu asún ámutɔ bɛɛ, ‘Béti mí ɔtswékpa bɛɛ, mpái ɔbɔkpá.’ Táme mlilapú unu mlí awikplu ɔhainkpá.”

47 Oletsíá súná ató Bulu ɔtswékpa unu ekekegyíeke. Bulu \*igyí ahapú dehen, Mose mbla asunápú pú Yudafɔ ahande amu bodunká ɔkpa ání bótson mósú mósú mu. 48 Táme bumenya, tsúfé ahá ámu fée bubuo mu asun blíhé.

### Yesu Túmi lwi Asun Futéhé

(Mateo 21:23-27; Marko 11:27-33)

**20** 1 Eke ɔku Yesu bu Bulu ɔtswékpa wunsínésú unu ɔde Bulu asún wankláán ámu ɔkan da, ɔde ató suná. Inu Bulu igyí ahapú dehen, Mose mbla asunápú pú \*Yudafɔ

ahande beba bɔtu mu. <sup>2</sup>Befuté mu beɛ, “Ma léha fú ɔkpa fúde ntobí ánfɛ bwe? Ma léha fú túmi?”

<sup>3</sup>Yesu léle mú ɔnɔ ɔbéɛ, “Mí é nfíte mli asun kua kule. <sup>4</sup>Bulu wá Asú Ɖɔɔpú Yohane lénya túmi púɔ́ ahá \*asú lóó, ntée nyankpusa? Mlibla mi.”

<sup>5</sup>Amú wulewule bɔɔɔ asún ánfɛɔ beɛ, “Ní ablí aniaa itsú Bulu wá á, ɔbéfité anɔ ɔbéɛ, mú ntogyi sù anumóhɔ mu gyi? <sup>6</sup>Ní ablí aniaa nyankpusa wá é á, ɔɔɔm anfi béda anɔ abwi mɔ́, tsúfé bohogyi ání Bulu ɔnɔ́sú ɔɔɔpú Yohane gyí.” <sup>7</sup>Mú su bele mú ɔnɔ beɛ, “Ohwée! Anuméyín ɔtínéá olenya mu túmi tsú.”

<sup>8</sup>Yesu lébláa amú ɔbéɛ, “Múmú mí é mméébláa mli túmi oduá ndepubwé ntobí ánfɛ.”

### Apafɔ Laláhe Aku

(Mateo 21:33-46; Marko 12:1-12)

<sup>9</sup>Ɔnu Yesu létrá ha amú yébi ɔbéɛ, “Ɖɔɔɔɔɔɔ ɔku lóɔɔ \*wáun ndɔ, ɔɔɔɔ ndɔ ámu wá apafɔ ibɛɔ, tú ɔkpa yɔ́ ɔmá kutɔ yétsiá unu nfi-nfi. <sup>10</sup>Bréá wáun-abí ámu kpɔtíbi ɔɔɔn a, ɔɔɔwa mu osúmpú apafɔ ámu wá ɔbéɛ, ɔyɔ́hɔ mu ogyíkpa ba mu. Táme apafɔ ámu beda obí ámu, gya mu sísí ibikpan. <sup>11</sup>Ɖɔɔɔɔɔɔ amu lélawá mu osúmpú nyɔɔɔ amú wá. Apafɔ ámu beda mu, sùpa mu, gya mu é sísí ibikpan. <sup>12</sup>Ɖletrá lawá ɔba sáásí. Apafɔ ámu bepilán mu, gya mu lé ndɔ ámuɔ. <sup>13</sup>Múú ndɔ mu wie amu léblí ɔbéɛ, ‘Nkálí kúráá nɔ́bwe? Nɔ́wa mí onutó mí bí ɔdwepú amú wá. Fíalí bóbu mu mú.’ <sup>14</sup>Táme bréá apafɔ ámu bowun mu bi ámu sísí á, bebláa aba beɛ, ‘Ɖni obégyi mu si atɔ ní. Mliha amɔ mu, ménu ndɔ ámu ibémlí anɔ klé.’ <sup>15</sup>Ɔnu bekutá mu, bítiá mu dáli ndɔ ámuɔ yɔ́mɔ mu.

“Ntɔ mlilahogyi mliáa ndɔ mu wie amu ɔɔɔbwe apafɔ ánfɛ? <sup>16</sup>Ɖbéba bɔmɔ amú, pú ndɔ ámu wá apafɔ bámbá ibɛɔ.”

Bréá ahá ámu bonu asún ánfɛ á, beblí beɛ, “Ɔnu mú ɔsúɔn anɔsu!”

<sup>17</sup>Yesu lékɛ amú ansítɔ díín, ɔlefuté amú ɔbéɛ, “Bulu asún ánfɛ asi mé?”

‘Ibwi ámú obu ayípu bekiná ámu  
lébemlí okonkísúbwi ní.’

18 ǪhagyíǪha ání Ǫledida ibwi ámúsu obébiabía blúblúblúblú.  
Ní ibwi ámu isúnkí dá Ǫkusú é á, ubǪkwe mu fíkǪfíkǪfíkǪ fé  
nfúó.”

### Lampóoka

(Mateo 22:15-22; Marko 12:13-17)

19 UǪwankí Mose mbla asunápú pú Bulu igyí ahapú amu  
ání amú iwí yébi alahá. Iwu bekleá békítá mu, táme benya  
ahá ámu ifú. 20 Mú su bodunká Ǫkpa ání bǪtsun músú kítá  
Yesu. Iwu bele ahá bee bupína bwe iwí fé aha wankláán,  
abute mu kí bee bónu aswanku tsú mu ǪnǪ, méni béli músú  
kítá mu ya Ǫmáshú ogyípú. Mubúv túmi gyi mu asún. 21 Yesu  
atépu amu befité mu bee, “Osunápú, anyin ání ǪnǪkwaliwu  
fugyi, fútosúná mú é. Futamaki Ǫhaa ansító. Mboún  
futosúná Bulu Ǫkpa ámu ǪnǪkwaliwu. 22 Afíte fú! Aní mbla  
leha Ǫkpa ání akáa lampóo ha Roma owíe dehen Kaesare,  
ntéé anumáka?”

23 Táme Yesu lówun amú agywun. Mú su Ǫlebláa amú  
Ǫbéé, 24 “Mliwu kǪba amu ku ba mí anki.” BǪpuba mu. Múv  
Ǫlefíté amú Ǫbéé, “Ma nwun pú mu idá dín músú?”

Bele mú ǪnǪ bee, “Kaesare.”

25 Múv Ǫlebláa amú Ǫbéé, “Múmv mliwu tǪá igyi Kaesare  
klé ha Kaesare, amliwu múá igyi Bulu klé é ha Bulu.”

26 Mú su bumetalí líl Yesu asun blíhé anfíwú kítá mu ahá  
ámu ansító. ǪnǪ é lobwie amú, bumetalí trá bwií ǪnǪ.

### Kusú Tsú Afúlito Iwí Asun Futéhé

(Mateo 22:23-33; Marko 12:18-27)

27 \*Sadukifo Ǫpasua buteblí bee, kusú tsú afúlito ma iwu.  
Amútsó aku beba Yesu wá, 28 befité mu bee, “Osunápú, Mose  
lówanlín tswi aní Ǫbéé, ‘Ní Ǫku mua mu ka bumǪkwíú asa  
olowu sí mu ka ámu a, mu pio otsú mu ka ámu tsia, fékí  
Ǫkwu ha owupú ámu.’ 29 Oyin Ǫkule abí abasiénǪ aku betsiá.  
Amútsó ogyankpapu létsiá Ǫká, táme ǪmǪkwíú asa olowu.

<sup>30</sup>Mu gyama lótsu ɔsurapuka amu tsía, táme mu é ɔmɔkwí. <sup>31</sup>Ɔsaasi é lótsu ɔtsi ámu tsía. Mu é ɔmɔkwí. Alu yótu osienósí amu. Amótɔ ɔkuku mɔkwí asa olowu. <sup>32</sup>Ɔma-ɔma a, ɔsurapu amu é lóbowu. <sup>33</sup>Afúli ɔkusúké a, amótɔ ɔmɔmu ɔbɔbwe mu kulu? Tsúfé amú abasiénɔ́ ámu fée betsiá mu.”

<sup>34</sup>Múu Yesu léle mú ɔnɔ́ ɔbé, “Ɔyi ánfɔtu ahá tétsía aká múa akúlu. <sup>35</sup>Táme iméeba alí bré ámúú íbá ámutɔ. Ahá ámúú ɔɔfun ání bókusú tsú afúlitɔ, tsía nkpa ɔyi ámúú íbéba amutɔ ámu mú buméetsiá akúlu, buméetsiá aká. <sup>36</sup>Buméetrá wu, tsúfé ɔbɔbwe fé Bulu-abɔpu. Bulu ahá bugyi, tsúfé bakúsú tsú afúlitɔ. <sup>37</sup>Ani náin Mose kúráá lówanlín atɔ tsú afúlikusú iwí. Tsúfé ɔlwanlín ɔbé, eke ámúú olowun oyíbi ku de ogyá tsíi, táme imedéhɔ́ amu a, ɔletí Bulu ɔbé, ‘Abraham mu Isak pú Yakob Bulu.’ <sup>38</sup>Megyí awupú Bulu ógyi, akɔnkpapu Bulu ógyi, tsúfé mu ansítɔ́ mú á, amú fée bubu nkpa.”

<sup>39</sup>Ɔnu Mose mbla asunápú amu aku beblí be, “Osunápú, fabí lé mú ɔnɔ́!” <sup>40</sup>Mú su amótɔ ɔkukukuku métrá wa klun fité mu asvansu.

### Ma Gyí Kristo Amu?

(Mateo 22:41-46; Marko 12:35-37)

<sup>41</sup>Ɔnu Yesu léfité mbla asunápú amu ɔbé, “Nkáli ulɔbwe asa ahá be, Owíe Dawid mu na gyí Kristo amu? <sup>42</sup>Tsúfé owíe Dawid onutó léblí \*Israelfɔ́ ulu ámutɔ ɔbé,

‘Ani Wíe Bulu lébláa mí Wíe ɔbé,

Tsia mí gyɔpu,

<sup>43</sup> yófun bréá nɔ́pu fú alupú bwé fú ayabi oyíkpa.’

<sup>44</sup>Owíe Dawid létí Kristo amu ɔbé, mu wie. Mú nkáli su ɔtráa ogyi mu na?”

### Mose Mbla Asunápú Tsiátɔ́

(Mateo 23:1-36; Marko 12:38-40)

<sup>45</sup>Ɔnu ɔlebláa mu akasípú ahá ámu ansítɔ́ ɔbé, <sup>46</sup>“Mluku Mose mbla asunápú anfí wankláán. Butekle ligá wa náti kí. Butekle be ahá bubún ha amú itsiá dunsu. Otsiákpá

yilé butekle tsiá Yudafo ofiakpa pú nke ogyíkpa. <sup>47</sup>Butɔswíí asurapu amú wóyí, butepina bɔ mpái títítúntín aháto póbun amú lalahesu. Bulu ɔbébití amú ɛsu kínkíínkín!”

### **Ɔsurapu Ɖku Tswitswi**

*(Marko 12:41-44)*

**21** <sup>1</sup>Bréá Yesu tsie mantáa tswitswi dáka ámu Bulu ɔtswékpa unu á, olowun alíá ahá ání amú ɛbitɔ bu odwin buɔepu kɔba akpɔnkpɔnti bɔwa dáka ámutɔ. <sup>2</sup>Unu ɔsurapu ohiáni ɔku é lɔpu mu kɔba ana bɔwa mútɔ. <sup>3</sup>Múú Yesu léblí ɔbéé, “Ɖnɔkwali nde mli bláa, tswitswiá ɔsurapu anfi, ɔma tɔtɔ anfi lawá á, ɛɔun ɔhagyíɔha klé. <sup>4</sup>Tsúfé atráhe amu féé á, amú kɔba tsɔtsɔtsɔ balé kpalobí tsú bɔwa. Táme ɔsurapu anfi mú íniá ɔma tɔtɔ su tɔá ɔbu féé alapú bɔwa á.”

### **Bulu Ɖtswékpa Amu Bwie**

*(Mateo 24:1-2; Marko 13:1-2)*

<sup>5</sup>Yesu akasípú aku buɔetɔí tsú alíá bɔpu abwi ání ɛbu bíá yi Bulu ɔtswékpa amu, pú atokiehé wankláán lá mútɔ. Táme Yesu lébláa amú ɔbéé, <sup>6</sup>“Bré ku ɛbá, bóbwie mú féé bun. ɛbwi kule kúráá méesian ɔnká mú bású.”

### **Ɔwɔsun Múa Ɖklán**

*(Mateo 24:3-14; Marko 13:3-13)*

<sup>7</sup>Múú mu akasípú amu befité mu beé, “Osunápú, bré mɔmɔtɔ íni féé béba? Osúna mɔmu abɔpubíá bré ámu ɛlafun?”

<sup>8</sup>Unu Yesu lébláa amú ɔbéé, “Mlíki wankláán, ménu ɔhaa méemlé mli. Tsúfé ahá tsɔtsɔtsɔ bɔpu mí dá ba beé, amúgyí Kristo amu ni. Mú bré lafun ta, táme mli mábuo amú. <sup>9</sup>Ní mlonúá ɛsá múa kpokiti ladá á, opúni mátsíí mli. Tsúfé ilehián ání íni aná bégyankpá bá, táme ɔyí ɔnɔmɔké ɛméeba unu.”

<sup>10</sup>Unu ɔlebláa amú ɔbéé, “Ɖmá bɔkɔ aba. Awíe bɔkɔsú líí abasu. <sup>11</sup>Ɖsolúú ɛbékpunkí ntíné-ntíné. Akún múa ɛlɔ

tsánkíhé é béba ntíné-ntíné. Ntobíá ihíé bu ifú pú osúna akpɔkpɔnti béba tsú ɔsúsú. <sup>12</sup>Táme asa mú fée béba a, békutá mli, béhie dínká mli, pú mli ya Yudafo ofiakpa yégyi mli asún, wá mli obu. Mí su békpa mli ya awíe pú ɔmású agyípú ansítú. <sup>13</sup>Íni ɔbéha mli ɔkpa mlétalí gyi mí tɔwí adánsie súná amú ní. <sup>14</sup>Táme mli máhan mli tɔwí susúu alíá mléle tɔwí ɔnó. <sup>15</sup>Tsúfé néha mli nyánsa múa ɔnɔwanki, mli anyabá ámutɔ ɔkuku méetalí gyi mli nwéén. <sup>16</sup>Mli akwúpú, mli apíó, mli wóyítú ahá pú mli anyawíe kúráá béle mli há, bómo mlitɔ aku. <sup>17</sup>Mí su ahá fée bólu mli. <sup>18</sup>Táme mli nwunso-imi kule kúráá mɔɔfwí. <sup>19</sup>Ní mletalí líí kínkín á, mlénya nkpa ání utamatá.

### Yerusalem Bwie tɔwí Asún Blí

(Mateo 24:15-21; Marko 13:14-19)

<sup>20</sup>“Ní mlowun ání ísá akɔpú bakáfía Yerusalem wúlu a, mli búá wúlu amu íbá obwiekpá. <sup>21</sup>Múmú ahá ání bubu Yudea ɔmátú busrí yɔ abusu. Ahá ání bubu Yerusalem wúlutɔ budáli. Amúá buma wúlu amutɔ é bumáyinkí ba. <sup>22</sup>Tsúfé alí nke ámu íbɔbwe Israelfɔ ísɔbití nke fé alíá Bulu ɔnósú atɔpú amu ɔɔwanlín tswí. <sup>23</sup>Amenyapú pú abí ayín ání bupia abi ɔbɔwe alí bré ámutɔ, bɔgyɔwí ní. Tsúfé asun wunhe amu ɔnó bówa ɔnlun. Iklplán kpɔkpɔnti béba ɔsolúsu, ísɔbití kpɔkpɔnti é íbéba mósú atsiápúsú. <sup>24</sup>Amútú aku bésin ɔdayí ɔnó. Békutá amú aku é ndoun ya ɔmá-ɔmátú. Yerusalem wúlu bétsiá ɔmá bámbásúfɔ así, alu yɔfun bréá amú ɔmá ámu asútsiábí lamó ɔnó.

### Nyankpusa-Mu-Bi Ámu Ibábi

(Mateo 24:29-31; Marko 13:24-27)

<sup>25</sup>“Bówun osúna owí, ɔtsra pú ntsrakpabisu. ɔpu béda ífúsú. ɔsolúsu atsiápú bénya ífú, buméebu tóá bubwée. <sup>26</sup>Nwulótáa múa mótú atú fée békpunkí. Mú su ahá bénya ífú, tún ñé tóá ídebá su. <sup>27</sup>Alí bré ámutɔ á, ɔhagyíɔha obówun ání mí, Nyankpusa-Mu-Bi ánfí napú túmi múa numnyam kpɔkpɔnti mbu nwulótáatɔ tsú ɔsúsú nebá. <sup>28</sup>Ní

ntobí ánfí ide mósú yó á, mlíkusu lu, amlitsu ansí fua kí, tsúfé mli nkpahóbí lafun.”

### **Ɔyí Ɖnómɔ lwi Osúna**

*(Mateo 24:32-35; Marko 13:28-31)*

<sup>29</sup>Yesu léha amú yébi ɔbé, “Mlípukí pɔntɔ múa nyí atráhe. <sup>30</sup>Ní ide ate pɔpwe le á, mlitowun mú, bí ání awikpan bré lafun ta. <sup>31</sup>Alí kén, ní mlowun ání ntobí ánfí fée ide mótó bá a, mlibi ání Bulu iwíegyí ámu ulawíe wóyí tá.

<sup>32</sup>“Ɖnɔkwali nde mli bláa. Ndemba-abí ánfí fée bumóowu tá, asa íni fée béba mótó. <sup>33</sup>Ɖsú múa asi fée bótsun, táme mí asun blíhé mótótsun ekekekeke.

### **lwɩsuda**

<sup>34</sup>“Mlíki wankláán, méni opotsuawa, ntábu pú ɔyító ató ɔmagyáa méegyí mli agywunsu, méni mí, Nyankpusa-Mu-Bi ánfí ɔbáke amu méebekítá mli fé yibi. <sup>35</sup>Tsúfé íbéba ɔyító ahá féesú. <sup>36</sup>Íni su mligyo, amlibo mpái, méni mlénya ɔwɔnlín tálí tsun ofúla amu féeétó, belí mí, Nyankpusa-Mu-Bi ánfí ansító.”

<sup>37</sup>Nke ámvto á, Yesu létsiá yósuná ató Bulu ɔtswékpa unu ɔpa. Onyé á, alanátí yó Nfɔ-nyíbu ámusu. <sup>38</sup>Ahá tsɔtsɔtsɔ butɔkúsú ba Ɖtswékpa unu bake, bonu mu asun blíhé.

### **Bekiklí Yesu Nwunsu**

*(Mateo 26:1-5; Marko 14:1-2; Yohane 11:45-53)*

**22** <sup>1</sup>Israelfɔ \*Bodobodo Mátúhé \*Nke, igyi amósú Katsun \*Nke ámu gyí íbá bɔfun. <sup>2</sup>Bulu \*igyí ahapú dehen pú Mose mbla asunápú amu bodunká ɔkpa ání bótsun mósú kítá Yesu njaintɔ, mó mu, tsúfé bude ahá ámu ifú nya.

### **Yuda Iskariot Lótsulá Ání Ɖbéle Yesu Há**

*(Mateo 26:14-16; Marko 14:10-11)*

<sup>3</sup>Unu Ɖbunsám lówie Yuda Iskariot, ogyi Yesu akasípú dúanyɔ ámvto ɔkuletɔ. <sup>4</sup>Mú su ɔloyɔ Bulu igyí ahapú dehen pú Bulu ɔtswékpa agyópu dehen wá, bekítá agywun alíá

ɔbéle Yesu há amú. <sup>5</sup>Ansí légyi amú. Mú su botsulá ání béka mu ɔkɔ. <sup>6</sup>Yuda lótsulá. Mú su olodunká ɔkpa ání ɔbótsun músú híéé lé Yesu há amú, bréá ahá tsɔtsɔtsɔ ámu buma unu.

### Katsun Atogyihe Gyí

(Mateo 26:17-19; Marko 14:12-21; Yohane 13:21-30)

Luk

<sup>7</sup>\*Bodobodo Mátúhé \*Nke ámuɔ ekeá butómó Israelfɔsu Katsun \*Nke akúfa ɔfon. <sup>8</sup>Yesu lówa Petro mua Yohane ɔbéé, buyɔbwe Israelfɔsu Katsun atogyihe amu yai ha amú. <sup>9</sup>Petro mua Yohane befité mu bee, “Ani Wíé, nkónu ayɔbwe mú yai?”

<sup>10</sup>Múú ɔlebláa amú ɔbéé, “Ní mlowíé wúlu ɔnó á, mléfia oyin ɔkúá ɔsu ntsu-ɔl. Mlibuo mu yɔ wóyít. <sup>11</sup>Mlowíé á, mlifite wóyí mu wie amu mliaa, ‘Osunápú ɔbéé, afíte fú, nkónu afɔɔ ɔswúkpá bu, ání mía mí akasípú abéba begyi Katsun atogyihe amu?’ <sup>12</sup>Obósuná mli abansúru yílé kúá balá mútɔ yál. Mlibwe atɔ ámu yai unu.”

<sup>13</sup>Petro mua Yohane bɔpu ɔkpa. Boyówun tógyítɔ alí ámúú Yesu lébláa amú ámu pépéépé, bɔbwe Katsun atogyihe amu yál unu.

### Yesu Ntúpwe Atogyihe Tráhe

(Mateo 26:26-30; Marko 14:22-26; 1 Korintofɔ 11:23-25)

<sup>14</sup>Atɔ ámu gyíbi ɔfon, Yesu mua mu \*sumbí ayɔpú beba betsiá ɔpónú ámu asi. <sup>15</sup>Yesu lébláa amú ɔbéé, “Nhíé ndeklé mbéé, mía mlunyɔ abégyi \*Katsun Nketɔ atogyihe anfi asa mí anwun iwɔsun. <sup>16</sup>Tsúfé nde mli bláa mbéé, mméetrá gyi mú ekekekeke yɔfon ekeá itɔ ámúú atogyihe anfi ulí há ámu laba mútɔ Bulu iwíegyí amuɔ.”

<sup>17</sup>Unu olotsu ntá-ewe, dá Bulu ipán, ɔlebláa amú ɔbéé, “Mliho amlinu ha aba. <sup>18</sup>Tsúfé nde mli bláa mbéé, mméetrá nu \*wáun-abí ntá ánfi ekekekeke yɔfon bréá Bulu iwíegyí ámu ibéba.”

<sup>19</sup>Unu ɔlele bodobodo ipín, ɔleda Bulu ipán, bíábía mútɔ púhá amú, blí ɔbéé, “Mí ɔyulúá mli su nasí há ní. Mlitsia



bwe íni pukau nísú.”<sup>20</sup> Alí kén, bréá begyi ató ámu tá á, olotsu ntá-ewe ámu há amú, bí ɔ́bée, “Ntá-ewe ánfí gyí Bulu ntam ɔ́ɔpwe ání nétseí mí obugya wólí púsí mósú há mli ní.

<sup>21</sup> “Íniá ndeblí á, mía ɔ́há ámú ɔ́bée mí há ámu íbì da ɔ́lepe ɔ́kuletɔ. <sup>22</sup> Mí, Nyankpusa-Mu-Bi ánfí nówu fé alíá Bulu léhúe yáí, táme ɔ́há ámú ɔ́bée mí há ámu ɔ́gyówu.”

<sup>23</sup> Inu befi asi bude aba fité bee, “Ngya anito ma ɔ́ɔ́bwe íni?”

### Ma ɔ́ɔ́bwe ɔ́hande?

<sup>24</sup> Nwéengyí léba sumbí ayɔ́pú ámutɔ, amú ɔ́ ɔ́múvá ɔ́ɔ́bwe ɔ́hande su. <sup>25</sup> Yesu lébláa amú ɔ́bée, “ɔ́mátɔ́fɔ awíe bubu túmi amú ahásv. Ahá ámu butetí amú ahande bee, ‘Buale agyíú.’ <sup>26</sup> Táme mli ɔ́ mú á, imába alí. ɔ́há ání odekléá ɔ́ɔ́bwe mli ɔ́hande ɔ́bwée mu iwí ɔ́tráhe. ɔ́há ání odeklé ɔ́bée, mɔ́bwe mli nkpá ogyápu é ɔ́bwée mu iwí fé osúmpú. <sup>27</sup> Ma dún mu ba? ɔ́há ání otsie ɔ́púnúasi lóó, ntée ɔ́há ání odesúm ɔ́púnú ámu asi? Megyí ɔ́há ámú ɔ́tsie mú asi ámu dun? Táme mbu mli ɔ́ fé osúmpú.

<sup>28</sup> “Mlúswa klun buo mi mí isóki féétɔ ní. <sup>29</sup> Alí ámú mí Sí layáí mí owíe amu a, alí mí é nde mli yáí ní, <sup>30</sup> méni mlétsiá mí ɔ́púnúasi, gyi ató, nú ntá mí iwíe ogyíkpa unu. Mlétsiá awíe mbíású, gyi \*Israel abusuan dúanyɔ ámu asún.”

### Petro ɔ́bóswí ɔ́bée Mumeyín Yesu

(Mateo 26:31-35; Marko 14:27-31; Yohane 13:36-38)

<sup>31</sup> Yesu lébláa Simon Petro ɔ́bée, “Simon, Simon! Kí, ɔ́bunsám dé ɔ́kpa kulí ɔ́bée, obófuní mli fé ayó. <sup>32</sup> Táme nakókóli Bulu há fú mbée, fumádúda hógyitɔ. Ní feyínkí ba mí wá á, wa fú aba ámu é ɔ́wunlín.”

<sup>33</sup> Petro lébláa mu ɔ́bée, “Mí Wíé natsúlá, ní obu igyi kúráá mía funyɔ abédi. Ní lowu ígyi é á, mía funyɔ abówu.”

<sup>34</sup> Yesu lébláa mu ɔ́bée, “Petro, nde fú bláa mbée, nde, asa bate ɔ́bée ɔ́nɔ á, fóswí pú íbì wá ogyá tse sa fée fumeyín mí.”

### Iwuklí Ání Ibéba Ekékó

35 Inu Yesu léfité akasípú amu óbée, “Bréá nɔwa mli sumbí, mlimédé sika akente, mlimédé akpankogyo ntée ntukuta nyɔɔsi a, tɔku lehián mli?”

Bele mú ɔnó bee, “Ekekeeke! Tɔtɔ mehián anu.”

36 Mú ɔlebláa amú óbée, “Táme séi mú á, fúá fúbu sika kente, ntée akpankogyo a, tsu kita. Ní mlito ɔku má ɔdayí ɔya anyo á, ɔfé mu tati puho ku! 37 Tsúfé ilehián ání mí iwí asún ámú ɔbu Bulu asun wanlínhéto ámu ibéba mútɔ. Bɔwanlín bee, ‘Bekla mu wá lakpan abwepútɔ.’ Tsúfé asún ámú ɔbwanlín tsú mí iwí ámu ibá lafun ta.”

38 Akasípú amu bebláa mu bee, “Ani Wíe, ki, ndayí anyo ní.”

Mú Yesu lébláa amú óbée, “Ito.”

### Mpáɔ Nfɔ-nyíbusu

(Mateo 26:36-46; Marko 14:32-42)

39 Yesu lédalɔ wúluto yó Nfɔ-nyíbu ámusu, fé alɔ́ otetsiá yó unu yáí. Mu akasípú é bobuo mu. 40 Bréá bowie unu á, ɔlebláa amú óbée, “Mlikokoli Bulu, méni mlimóowie ɔsókito.”

41 Mú ɔledalɔ amú ɔyó nkpa kpalobí fé nfi múa nfi, yéda akpawunu bó mpái óbée, 42 “Mí Sí, ní fótsulá á, ha ntá-ewe ánfi<sup>p</sup> ɔtsun misu. Táme megyí tɔ́a ndeklé, múa fudeklé ibá mútɔ.” 43 Inu Bulu-ɔbɔpu lótsu ɔsúsú bá bele iwí ɔwan súná mu, wá mu ɔwunlín. 44 Asún ihíe de mu háan. Mú su ɔlɔbɔ mpái kinkíinkín. Uleha mu apípi lemlí fé obugya, ɔdetún da ɔsulóto ta-ta-ta.

45 Bréá ɔlɔkusú tsú mpái ámu ɔbɔkpá, yínkí ba akasípú amu wá á, olowun ání budedidi. Awireho de amú. Mú su iwí lawú amú. 46 Mú ɔlefíté amú óbée, “Ntogyi sù mlidédidi? Mlikusu amlikokoli Bulu, méni mlimóowie ɔsókito.”

<sup>p</sup> 22:42 Ntá-ewe ánfi igyi iwɔsun ání Yesu obówun.

### Yesu Kitá

(Mateo 26:47-56; Marko 14:43-50; Yohane 18:1-11)

47 Yesu ɔ́nɔ́ mesi, ɔ́ɔm bowotíí amó́sú. Akasípú dúanyɔ́ ámvɔ́ ɔ́kuleá butetí mu Yuda gyá amú nkpá. Inu ɔ́lenatí tó Yesu ɔ́béé, amvlata mu puta, 48 táme Yesu léfité mu ɔ́béé, “Yuda, latá félatá mí, Nyankpusa-Mu-Bi ánfí pútá, pólé mí há?”

49 Akasípú amó́ bubu Yesu wá ámu bowun tóá íbá. Mú su befíté Yesu bée, “Akóó amó? Anibu ndayí.” 50 Inu amótó ɔ́kule lótswi mu ɔ́dayí kpá Bulu igyí ɔ́hapú dehen osúmpú ɔ́ku gyɔ́ɔɔɔ-ɔ́su lé.

51 Yesu lébláa ɔ́kasípú amu ɔ́béé, “Mábwe! Isíí mli ɔ́ka!” Inu ɔ́ɔpu íbi da osúmpú amu ɔ́su ámu, ileyinkí tsá.

52 Mú Yesu léfité Bulu igyí ahapú dehen, Bulu ɔ́tswékpa agyópu ahande pú Yudafɔ́ ahande amó́ beba mu ɔ́kitákpá amu ɔ́béé, “Ogyo otswapú ngyi, sù mlilatsú nkpotí pú ndayí mlebá mí ɔ́kitákpá?” 53 Ntsie mli wá Bulu ɔ́tswékpa wunsunésú ekekegyíeke, mlimópu íbi da mi ekekeeke. Táme mli bré ní, oklún túmi dé iwíé gyí.”

### Petro Lóswí ɔ́béé Mmeyín Yesu

(Mateo 26:57-58, 69-75; Marko 14:53-54, 66-72;  
Yohane 18:12-18, 25-27)

54 Inu ahá ámu bekítá Yesu, kpá mu ya Bulu igyí ɔ́hapú dehen wóyító. Petro lépetí obuo amú ɔ́ma tsútsúútsú. 55 Táme bréá bosun agyabi wunsunésú inu, butsie mú así á, Petro léyétsiá amú wá. 56 Otsibi ɔ́kúvá ogyi osúmpú inu lówun ání Petro tsie ogyá ámu así, ɔ́leki mu díín, blí ɔ́béé, “Oyin ánfí é buo Yesu!”

57 Táme Petro lópu ɔ́nɔ́lí blí ɔ́béé, “Otsi, mmeyín mu ɔ́tinetiné!”

58 Uɔ́bwe kpalobí á, ɔ́ha ɔ́ku é lówun Petro, ɔ́lebláa Petro ɔ́béé, “Fú é fúbú amótó.”

Táme Petro lébláa mu ɔ́béé, “Owíé, megyí mí ní!”

59 Fé ɔ́nɔ́hwírí kule ɔ́ma a, ɔ́ha bambá é léba botsulá mósú ɔ́béé, “Lélé, oyin ánfí é létsiá mu wá, tsúfé Galileayin ogyi.”

60Táme Petro léle mú ɔ́nɔ́ ɔ́béé, “Agya! Kɪ, mmeyín asún ánfɪ ɪwɪ kuku.”

Petro ɔ́nɔ́ mesi, bate lóɓɔn. 61Anɪ Wíe Yesu lédamlí kɪ Petro. ɪnu Petro lékaín asún á múbú anɪ Wíe lébláa mu ɔ́béé, “Fóswú tse sa fée fúmeyín mí asa bate ɔ́béle ɔ́nɔ́ onyenu.” ámuvsu. 62ɪnu ɔ́ledalɪ yó kpankpá híé yósu.

### Yesu Ahinlá Bwe

(Mateo 26:67-68; Marko 14:65)

63Yesusu akípu befi asɪ buɗe mu ahinlá bwe, buɗe mu da. 64Bɔpu ató klí mu ansíbi, fíté mu beé, “Bulu ɔ́nɔ́sú ɔ́tɔ́pú, maláɗá fú? Bla anɪ.” 65Bekpa mu asiabí, bláa mu nyányáala.

### Yudafɔ Asún Agyípú Ansító Lú

(Mateo 26:59-66; Marko 14:55-64; Yohane 18:19-24)

66Yudafɔ ahande, Bulu igyí ahapú dehen pú Mose mbla asunápú amu befia ɔ́yɪ kehe nyankɪ-nyankɪ, bebitía Yesu belí amú ansító. 67Bebláa Yesu beé, “Ní fúgyí Kristo, (ɔ́há á múbú Bulu ladá mu ofúli amu) a, bla anɪ.”

Yesu lébláa amú ɔ́béé, “Ní nebláa mlɪ kúráá, mlumóohogyi. 68Ní nefité mlɪ asvanku é á, mluméele mú ɔ́nɔ́. 69Táme tsú séi púya a, mí, Nyankpusa-Mu-Bi ánfɪ nétsiá Bulu Otúmípu amu gyɔ́pɪsu.”

70Amú fée befité Yesu beé, “Mú sv fúgyí Bulu mu Bi ámu nɪ?”

Yesu lébláa amú ɔ́béé, “Ee, ɔ́ɔkwali amu mlɪlablí á.”

71ɪnu befité aba beé, “Ntogyi sù abétrá dunká adansfɔ bámbá? Mú anɪlanú tsú mu onutó ɔ́nɔ́ á.”

### Yesu Kpa Ya Pilato

(Mateo 27:1-2, 11-14; Marko 15:1-5; Yohane 18:28-38)

**23** 1ɪnu ahá á múbú befia ɪnu ámu ɔ́kɔ́sú kpá Yesu ya ɔ́má́sú ogyípú Pilato. 2Beka asún dínká musu beé, “Anɪlawun ání oyin ánfɪ dé ɔ́má ánfɪtɔ́ ahá yintá. ɔ́ɗe amú bláa ɔ́béé, bumátra ka lampóo há Roma owíe dehen. ɔ́ɗeblí

é ɔ́bée, mɔgyí Kristo, (ɔhá ání Bulu ladá mu ofúli amu), idesuná ání owíe ogyi.”

<sup>3</sup>Pilato léfuté Yesu ɔ́bée, “Fúgyí Yudafɔ owíe amu ni?”

Yesu léle mú ɔ́nɔ ɔ́bée, “Ee, mú fablí á.”

<sup>4</sup>Pilato lébláa Bulu igyí ahapú dehen pú ɔ́dɔm amu ɔ́bée, “Mmɔkúwun tsitsa kukvá oyin ánfí labwé.”

<sup>5</sup>Táme amú mú buɔe mútɔ kótóó beɛ, “Ɖɔɔpɔ mu atosunáhé tí utrɛ múa ɔ́kɔ wá Yudea ɔ́má ánfítɔ. Olefi mú así tsú Galilea, alapú bowie nfi.”

### Yesu Líí Herode Ansítɔ

<sup>6</sup>Bréá Pilato lónu asún ánfí á, ɔ́lefuté ɔ́bée, “Galileayin oyin ánfí gyí?” <sup>7</sup>Bréá ɔ́leɔ́lɔ́ ání Yesu otsú Galilea, ɔ́tínéá owíe \*Herode dé iwíe gyí a, ɔ́leha beɔkpa mu ya Herode. Alí bré ámutɔ á, Herode bu Yerusalem wúlutɔ unu. <sup>8</sup>Bréá owíe Herode lówun Yesu a, ansí lehiɛ gyi mu. Tsúfé olodunká ání obówun mu dodoodo, mu iwí asún ání alanú su. Odeklé ání Yesu ɔ́bwéé osúna ku suna mu. <sup>9</sup>Mú su ɔ́lefuté Yesu asún tsɔtsɔɔtsɔ, táme Yesu méle kuku ɔ́nɔ. <sup>10</sup>Bulu igyí ahapú dehen amu pú Mose mbla asunápú amu bulí unu, buɔekplón ka asún dínká musu. <sup>11</sup>Owíe Herode mua mu ɔ́sá akɔpú ámu é ɔ́ɔsupáa mu, bwé mu ahinlá. Ɖɔpɔ sríkí ligá ku wá mu, beyinkía mu ya Pilato. <sup>12</sup>Owíe Herode mua Pilato bemlí anyawíe tsú eke ámu. Tekí amú nsiné uma ale yáí.

### Yesu Lowu ɔ́pón Ha

(Mateo 27:15-26; Marko 15:6-15; Yohane 18:39-19:16)

<sup>13</sup>Pilato létí Bulu igyí ahapú dehen, Yudafɔ ahande pú ɔ́má ámu féé befia. <sup>14</sup>Mú ɔ́leɔ́lɔ́ amú ɔ́bée, “Mliléɔkpa oyin ánfí ba mi mlíaa, ɔ́de ɔ́má ámu agywun yintá. Nafité mu ɔ́nɔtɔ asún mli ansítɔ, nawun ání asún ámutú mliléka dínká musu ámu uma mútɔ. <sup>15</sup>Owíe Herode é lawun mú alí. Mú sù alayínkía mu sísí aní ní. Oyín ánfí mɔ́kúbwé tɔtɔá ɔ́mɔ mu. <sup>16</sup>Íni su néha béputí mu atɔ, mí ansi mu ɔ́natí.”

17-18 Inu ɔɔm amu fée bɔkplɔn blí beɛ, “Le mu inu, afusi Baraba ha aní!”<sup>a</sup> 19 (Baraba anfi da obu, tsúfɛ ɔɔkusú lí wúlu amusu, ɔɔmɔ ɔha é mótó.)

20 Pilato lékléá obési Yesu. Mú su ɔletrá tɔí kplá ɔɔm amu. 21 Táme bɔkplɔn kúklúkúú bláa mu beɛ, “Da mu manta \*oyikpalíhesu! Da mu manta oyikpalíhesu!”

22 Pilato lébláa amú otse saasi ɔbéɛ, “Tsitsa mɔmu alabwé? Mmɔkúwun tɔá alabwé, sù néha bómmu mu. Néha abupiti mu ató, ɔnati.”

23 Táme bubu mósú budekplɔn kuklúkúú beɛ, ɔháa abuda mu manta oyikpalíhesu. Inu bɔɔun mu ɔnɔlí. 24 Mú su Pilato lɔbwe dínká tɔ ámúú buɔedunká ámusu. 25 Olesi oyin ámúú ɔɔkusú lí ɔmá ámusu, mɔ ɔha mótó sù ɔda obu ámu, olesi Yesu há mu isá akɔpú ɔbéɛ bubwée mu alíá ahá ámu buɔeklé.

### Yesu Da Mántá Oyikpalíhesu

(Mateo 27:32-44; Marko 15:21-32; Yohane 19:17-27)

26 Bréá bekpa Yesu bɔyɔ́ á, befia Kireneyin ɔkúá butetí mu Simon. Otsú abúasi. Isá akɔpú ámu beka mu híɛ beɛ ɔsúra oyikpalíhe amu buo Yesu.

27 ɔɔm bobuo Yesu. Atsiá bubu amútó bupu amú anyɔ́pu, buhíɛ buɔesú ha Yesu. 28 Yesu lédamlí, ɔlebláa amú ɔbéɛ, “Yerusalemfɔ atsi, mlumásu mi. Mlisu mli iwi pú mli abí. 29 Tsúfɛ nke ku tɔbá mléblí mliáa, ‘Bulu layúlá atsiá bumɔkúkúwí ki, obí mɔkúdí amú opúnitɔ ki, obí mɔkúnyɔ́pú amú é ki.’ 30 Alí bré ámutɔ á, ahá bébláa abu beɛ, ‘Mlibwie bun anisu. Nkúku, mliɔpula aní.’ 31 Tsúfɛ ní buɔe oyi bɔbwe ogyá wa alí á, nkálí bɔbwe oyi wulihɛ?”<sup>r</sup>

32 Isá akɔpú ámu bekpa lalahe abwepú abanyɔ́ é mántá Yesusu, bɔyɔ́mmu amú. 33 Bréá bowie ɔtinekúá butetí inu

<sup>a</sup> 23:17 Mótó yée 17 bu nwulú dada amu akutɔ: *Katsvn Nke kugyíkɔtɔ á, lehián aní Pilato obési obu ɔɔpú ɔkɔle aní Yudafo ámu buɔeklé há amú.* <sup>r</sup> 23:31 Ní mí anfi mí asún da ɔkpa anfi kúráá buɔebwe alí á, nkálí Bulu ɔbɔbwe ahá aní bégyi pón mu ansító?



*Yesu Da Mántá Oyikpalíhesu ni. (Luka 23:32)*

“Nwun Okokobi” a, beda Yesu mántá oyikpalíhesu. Beda amú abanyó ámu é mántá nyikpalíhesu. Okule bu Yesu gyɔpɔsu, okule é bu mu bɔnasu. <sup>34</sup> Inu Yesu léblí ɔbéé, “Mí Sí, sikie amú, tsúfé bumeyín t́á budebwe.”<sup>s</sup>

Isá akɔpú ámu ɔɔtswi abi ye Yesu atadiɔɔ. <sup>35</sup> Ahá tsɔtsɔɔtsɔ ámú bobuo amú ý unu ámu besi bulú unu bude mu kí. Yudafo ahande amu ɔɔbwe mu ahinlá bée, “Oloho ahá nkpa. Ní lélé mugyí Kristo, (ɔhá ámú Bulu ladá mu ofúli), mu Bulu lalé ní á, ɔhɔɔ mu iwɔ nkpa!”

<sup>36-37</sup> Isá akɔpú ámu é ɔɔpɔ ntá ɔdái tin mu ɔnɔ, bwé mu ahinlá bée, “Ní fúgyí Yudafo owíe amu ni á, le fú iwɔ!”

<sup>38</sup> Bɔwanlín ató mántá oyikpalíhe amu awunso bée, “YUDAFɔ OWÍE AMU NI.”

<sup>39</sup> Lalahe abwepú ámú beda mántá oyikpalíhesu ámutɔ okule léblí Yesu iwɔ abususu ɔbéé, “Megyí fúgyí Kristo amu ni? Le fú iwɔ, afule anɔ mɛe!”

<sup>s</sup> 23:34 Múts yéé 34 uma nwuló dada amu akutɔ.

40Táme onyɔɔsi amu lɔwa iyin wá mu ɔbée, “Fumédé Bulu ifú nya! Fúa munyɔ fée dé usubití kule hóɔ. 41Ani mú á, ani usubití ida ɔkpa, ani lakpan ání anlóbwe su. Táme oyin ánfí mú mókúbwé laláhe kuku.” 42Mú ɔlebláa Yesu ɔbée, “Yesu, ní febá fú iwíe ogyíkpa a, kain mísú!”

43Yesu lébláa mu ɔbée, “Ɔnɔkwali nde fú bláa. Nde, mía funyɔ abétsiá \*Paradiso.”

Luk

### Yesu Lowu

(Mateo 27:45-56; Marko 15:33-41; Yohane 19:28-30)

44-45Alí bré ánfí ibóbwe fé ɔpa dódúanyɔ. Owí leta ɔsulúv amusu fée alu yɔfun ntópwe ɔsato. Owí metrá lun ε. Inu á, tati ámúb ɔɔpuká Bulu Ɔtswékpa obu ámutɔ ɔlebalí anyɔ. 46Yesu lɔkplun kúklúkú blí ɔbée, “Mí Sí, napú mí ɔhé wá fú ibutɔ.” Olenya blí alí tá pé, ɔlele ɔhé.

47Bréá isá akɔpɔ ɔhande amu lówun tɔá ɔlaba a, ɔlekanfú Bulu ɔbée, “Lélé, ɔha yilé oyin ánfí gyí.”

48Ahá ámúb bulú unu ámu fée bowun tɔá ɔlaba, ɔɔpu awireho náti ɔyɔ wóyí. 49Táme amúb buyin Yesu pú atsi ámúb bobuo mu tsú Galilea ɔmátɔ ámu besi bulú tsútsúútsú bude ɔtɔá ide músú yɔ kí.

### Yesu Pulá

(Mateo 27:57-61; Marko 15:42-47; Yohane 19:38-42)

50-51Oyin ɔku létsiá, butetí mu \*Yosef. Otsú Yuda wúlu kvá butetí mú Arimateatɔ. Ɔha yilé ogyi, obú é bu musu. Ibu mútɔá ɔbu ɔmá ámu asún agyípútɔ, táme omotsulá dínká amú agywun pú amú bwehé ánfisu. Otsie ogyo Bulu iwíegyí ámu. 52Oyin ánfí lóyɔ Pilato wá, yɔkulí mu ɔkpa ɔbée, osíi Yesu fúli amu ha mu. Pilato léha mu ɔkpa. 53Inu Yosef léyesueí Yesu fúli, ɔɔpu ɔhráda kíklí mu iwí, pú mu yɔwa ɔbɔ kvá mu onutó ɔleha beda butátɔ há mu iwí, bumɔkúpúlá ɔhaa mútɔ kí. 54Eke ámu igyi Fieda. Eke ámu igyi \*ogyá ɔdudáké. Owí inyá tá pé, ɔkpúnú ɔdaké ámu lafi asi.

55Atsi ámúb bubuo mu tsú Galilea amu bobuo Yosef yéki Yesu opulákpá pú alá ɔɔpu fúli amu tswi ɔbɔ ámutɔ.



<sup>56</sup>Beyinkí yó wóyí yókwe \*ohuam, chíén pú ofobí fánfán ání bópu yékpá Yesu. Botsutsúa abubwe ta á, owí latá, beda ɔkpúnú ɔkpúnú ɔdaké ámu fé alá Mose Mbla leblí.

### Yesu Kusó Tsú Afúlitó

(Mateo 28:1-10; Marko 16:1-8; Yohane 20:1-10)

**24** <sup>1</sup>Kwasieda, igyi ndawótswító eke gyankpapu bake a, atsi ámu bɔkusú tsú afá ámúú bɔkwe yáí ámu yó Yesu ntsán ámu asi. <sup>2</sup>Bowun ání bamína ibwi ámúú bɔputin ɔbó ámu ɔnó ámu lé unu. <sup>3</sup>Mú su bebitíwíé ɔbó ámutɔ, táme bumowun Yesu fúli amu. <sup>4</sup>Besi bulí, bude nwuntɔ bu. Beki a, ayin abanyó aku líí amú wá unu á. Amú atadie de ogyá kpa. <sup>5</sup>Ifú lekitá atsi ámu, beda akpawunu pú ansító bun ɔsulótɔ. Táme ayin ámu befité amú bee, “Ntogyi sù mlidé ɔkɔankpapu dunká afúlitó? <sup>6</sup>Ɔma nfi, alakúsú! Mlɔkaun asún ámúú ɔlebláa mli bréá mliá munyo mliɔ Galilea ɔmátó ámusu. <sup>7</sup>Ɔbéé, ‘Ilehián ání béle mí, Nyankpusa-Mu-Bi ánti há lakpan abwepú. Béda mí mántá oyikpalíhesu. Mú eke sáásí a, nókusú tsú afúlitó.’ ” <sup>8</sup>Unu atsi ámu bekaín Yesu asún ántisu. <sup>9</sup>Beyinkí tsú ntsán ámu asi bebláa \*sumbí ayɔpú dúɔkun ámu pú aha atráhe amúú bubu unu ámu féé tóá bayówun.

<sup>10</sup>Atsiá bɔyo ntsán ámu asi gyí, Magdalayintse Maria, Yohana pú Yakobo mu yin Maria. Amúá atsi akvá bubu amúú lékla asún ánti suná sumbí ayɔpú ámu. <sup>11</sup>Asún ámu lobwe sumbí ayɔpú ámu fé mimlála. Mú su bumɔhɔ músú gyi. <sup>12</sup>Táme Petro mú lókusú, tsíí ɔsɔ yó ntsán ámu asi. Olobun kpeléki ɔbó ámutɔ. Tati ámúú bɔpupúlá Yesu nkule olowun ání ida ifúntó. Oleyinkí yó wóyító, ɔde nwuntɔ bu tsú asún ánti ulaba anfi iwi.<sup>t</sup>

### Emaus Wúlutó Yo

(Marko 16:12-13)

<sup>13</sup>Eke ámu kén á, abúopu amu abanyó benatí bɔyó wúlu kuá butetí mú Emaustɔ. Tsú Yerusalem ya unu bóbwe fé

<sup>t</sup>24:12 Múú yéé 12 uma nwulú dada amu akutɔ.

máali asienó. <sup>14</sup>Amú nkule buna bude nkombó gyí tsu asún ámúú ulaba amu iwí. <sup>15</sup>Bréá bude mútú yó á, Yesu onutó é lóbotu amú, mua amúnyo buna. <sup>16</sup>Bulu létin amú ansí. Mú su bumebi mu. <sup>17</sup>Yesu léfité amú óbéé, “Amansu iwí nkombó mluná mlidégyí ali?”

Besi lí tikpa, awireho lekitá amú. <sup>18</sup>Amútú okuleá butetí mu Kleopa léfité óbéé, “Fú nkule gyí ófó Yerusalem wúluto, fúmeyín asún ání ulaba unu nke ánfuto?”

<sup>19</sup>Yesu léfité mu óbéé, “Amansu igyi?”

Bebláa mu bee, “Yesu, Nasaretyin amu iwí asún igyi. Bulu ónósú ótópú ogyi. Ólobwe ofúla akpónkpónti, bí Bulu asún tímísu, Bulu mua anyánkópósa féé ansítú. <sup>20</sup>Ani Bulu igyi ahapú dehen pú wúlu ahande bapú mu há ahá, bahá mu lowu ipón, dá mu mántá oyikpalíhesu. <sup>21</sup>Teku mugyí óhá ání anuléki okpa aniaa, óbéha ani Israelfó abégyi iwí ní. Nde eke saásí ópá asún ání lébá. <sup>22-23</sup>Múá idun kúráá á, anito atsi aku bayó mu ntsán ámu asi bakiení, táme bumowun mu fúli amu. Bee, bayówun Bulu-abopu aku babláa amú bee, óbu nkpa. Tóá beyinkí bebláa ani lawá ani wánwan. <sup>24</sup>Ínu su anito aku é basrí yó ntsán ámu asi, bayówun mú fé aliá atsi ámu beba beblí. Amú é bumowun fúli amu.”

<sup>25</sup>Yesu lébláa amú óbéé, “Mlilémmíla o! Mli agywun tamayó agyómá ósasú. Nkáli igyi sú mlumóho asún ámúú Bulu ónósú atópú amu beblí tswi amu féésú gyi? <sup>26</sup>Mluméyín mliáa, ilehián ání Kristo, (óhá ání Bulu ladá mu ofúli amu) obówun iwíwun, asa obénya mu numnyam?” <sup>27</sup>Ínu Yesu léle mu iwí asún ání ówanlín wá Bulu asun wanlínhé amuto, tsú Mosesu botu Bulu ónósú atópú amu féésú asi súná amú.

<sup>28</sup>Bréá bowie wúlu amuto boyó á, Yesu lóbowe fé ódetsóun óyó ótine bambá. <sup>29</sup>Táme abúopu amu bebláa mu bee, “Ani sí, owí lapón, di ani wá nde.” Mú su Yesu lébaí yó amú wá. <sup>30</sup>Bréá bude ató gyí a, Yesu léle bodobodo ipín, dá Bulu ipán. Múú olebiabía mútú púhá amú. <sup>31</sup>Ínunu amú ansísú letitú amú, bebi mu, táme ólfo wí sí amú. <sup>32</sup>Ínu befité aba bee, “Ansí mehíe gyí ani bré ámúú ania munyo aniná, óde

anɪ asún bláa, ɔde Bulu asun wanlínhé amu asɪ le súná anɪ ámu?”

<sup>33</sup>Bɔkusú unonu yínkí ba Yerusalem. Beba a, sumbí ayɔpó dúɔkun ámu pú aha tráhe bafia, <sup>34</sup>búdeblí beɛ, “Lélé, anɪ Wíe lakúsú. Alalé iwɪ ɔwan súná Simon!”

<sup>35</sup>Mú su ahá abanyó ámu é beblí tśá bayówun ɔkpatɔ. Tśá bɔpubí mu gyí bodobodo amú oleye ha amú ámu.

### Yesu lwiɔwanle Súná Mu Akasípú

(Mateo 28:16-20; Marko 16:14-18;

Yohane 20:19-23; Gyumagyihe 1:6-8)

<sup>36</sup>Ahá abanyó ámu bubu mósú budetɔí alɪ á, Yesu onutó léba belí amú nsiné. ɔleblí ɔbéɛ, “lwi ilwíi mli.”<sup>u</sup>

<sup>37</sup>Opúni letsíi amú, bɔwan. Uɔbwe amú fé fúli budewúun. <sup>38</sup>lɪnɪ Yesu léfité amú ɔbéɛ, “Ntogyi sú mlidé ifú nya, mlidé nwéen gyí mli klɪntɔ alɪ? <sup>39</sup>Mlɪkɪ mí ibɪ, amlɪkɪ mí ayabiasɪ. Megyí mí onutó ní? Mlɪkɪta mí amlɪkɪ. Fúli má ɔyɪlɔbɔ múa awú fé alhá mbu.”

<sup>40</sup>Bréa ɔleblí asún ánfi tá á, ɔɔpɔ mu ibɪ pú mu ayabi súná amú. <sup>41</sup>Ansí lehiɛ gyi amú, asún ámu é lówa amú wánwan. Mó su bumohogyi ání lélé mu ni. lɪnɪ ɔlefíté amú ɔbéɛ, “Mlɪbu atogyihe ku nfi?” <sup>42</sup>Beha mu iye tɔhé itin ku, <sup>43</sup>ɔɔhɔ mú, wí mú amú ansítɔ unɔ.

<sup>44</sup>lɪnɪ ɔlebláa amú ɔbéɛ, “lɪnɪ gyí asún ání nebláa mli bréa mbu mli wá ní. Nebláa mli mbéɛ, ilehián ání mí iwɪ asún kugyíkúá bɔwanlín wá Mose Mbla, Bulu ɔnɔsú atɔɔpú nwulú pú \*Israelfɔ ulɔ ɔwulútɔ féé béba mútɔ.”

<sup>45</sup>lɪnɪ olobwií amú agywun, méni bónu Bulu asun wanlínhé amu asɪ. <sup>46</sup>ɔlebláa amú ɔbéɛ, “Bɔwanlín tswɪ beɛ, Kristo, (ɔhá amú Bulu ladá mu ofúli amu) amu obówun iwɔwun, wú. Bulu ɔbɔkusúa mu mú eke sáásí tsú afúlitɔ. <sup>47</sup>Mú ɔma a, ahá béda Bulu asun wankláán ámu ɔkan mí ɪdátɔ há ɔmá féé beɛ budámli klɪntɔ, fékɪ Bulu obési amú lakpan kíé amú. Béfi mú asɪ tsú Yerusalem. <sup>48</sup>Mlɪgyí mí

<sup>u</sup> 24:36 ɔleblí ɔbéɛ, “lwi ilwíi mli.” uma nwulú dada amu akɔtɔ.

adansifo há asún ánfí ní. <sup>49</sup>Nópu \*Dje Wankíhé amú mí Sí léhie yáí há mli ámu sísí mli. Mú su mltsia wúlu anfito alu yófun ekeá Dje Wankíhé amu obótsu ɔsúsú bá beha mli túmi.”

### Yesu Ɔsúsú Yɔ

(Marko 16:19-20; Gyumagyihe 1:9-11)

Luk

<sup>50</sup>Bréá Yesu léblí asún ánfí tá á, ɔlekpa amú dáli, bɔyɔ Betania wúluto. Inu olotsu ibi fúá, yúlá amú. <sup>51</sup>Bréá ɔde amú yulá á, mva amónyɔ nsiné lówa ifó wa bi, Bulu lótsu mu ya ɔsúsú. <sup>52</sup>Inu beda akpawunu súm mu, bɔpu ansigyí kpɔnkpɔnti yínkí yétsiá Yerusalem. <sup>53</sup>Betsiá yó Bulu ɔtswékpa unu brégyíbré, yékanfú Bulu.